

INSTITUTIONUM

PHILOSOPHICARUM

TOMUS PRIMUS

QUI COMPLECTITUR

HISTORICAM PHILOSOPHIAE SYNOPSISIN
LOGICAE ELEMENTA ET
ONTOLOGIAM

AD USUM

SEMINARII NEAPOLITANI.



NEAPOLI MDCCLXXXII.

Ex Officina AMATI CONSI.

Prostant apud MICHAELEM STASIUM.

UTRIUSQUE POTESTATIS PERMISSU.

Die 18. mensis Julii 1782.

Reimprimatur , regiis juribus , legibus ,
moribusque Regni semper salvis .

VARGAS MACCIUCCA .



Carulli .

LECTORI BENEVOLO

MICHAEL STASIUS.




*Institutiones Philosophicas, quae
in usum florentissimi Seminarii
Neapolitani jamdiu in lucem
prodierant, tertium edendas ag-
gressus, ne quid superioribus haec praesens
ἐκδοσις invideret, illius curandae provin-
ciam SALVATORI ROGERIO deman-
davi. Is quidem pro ea, quae mihi cum
illo intercedit amicitia, quemadmodum quod
in hac Institutiones χρήσεως καὶ πηΐσεως
jus habet, totum id mihi attribuit, ita non
modo in typographicis mendis abstergendis
summam adhibuit diligentiam, verum etiam
nonnulla, quae inter legendum operarum
festinatio ipsi expressit, qua castigando,
qua addendo interspersit. Quamobrem tu-*

am, humanissime Lector, demeruisse gratiam mihi blandior, cum, ut bono tuo consularem, hujusmodi Institutiones, quarum paucissima exstabant exemplaria, tum emendatiores & locupletiores, tum nitidioribus formis expressas in publicum emittere curaverim.



PRAE-

PRAEFATIO.

 **N**IL homini melius, nihil praestantius, nihil magis expetendum esse, quam Philosophicis disciplinis excultum animum, is profecto intelliget, qui cogitatione comprehendet, tanto Philosophiae studium esse ceteris nobilius, quanto res, de quibus agitur, censentur nobiliores. Cujuscunque enim artis prae aliis praestantiam metiri rebus, quas tractandas suscipit, oportet. Philosophantis oculo immensa rerum, quae late patet, universitas consideranda obversatur; quae quemadmodum nihil pulchrius, aut admirabilius esse potest, ita longe omnibus studiis Philosophia praestare videtur. Hac enim duce & comite humanae Mentis acies in universum dirigitur mundum; ac primo in rerum terrenarum contemplatione defixa earum naturam studiose rimatur, causasque exquirat; mox singulis orbis terrae partibus peragratis ad caelum usque evolat ratos astrorum ordines, certosque eorumdem motus contemplatura: neque illic stare scit, inquieta,

donec veluti e corporis vinculis soluta
Deum ipsum attingat .

Verum paucis abhinc annis novo quodam inuesto philosophandi genere nonnulli e grege Philosophorum rebus studentes novis mirum est, quantum studii curaeque posuerint, ut incorruptam verae & elegantis Philosophiae integritatem violarent atque imminuerent . Hinc quanta maxima contentione possunt, tanto animi ardore conantur, ut quae ἀποδεικτικῶς demonstrata suam cuique sanae mentis homini veritatem probant, in dubium revocent, caligine ac tenebris involvant, & funditus si fieri potest labefactent . Imo eo dementiae devenere, ut a natura, atque adeo a semetipsis desciscentes suam ipsi Mentem suumque Auctorem existere per summam impudentiam negare sint ausi . Atque hi quidem sibi persuaferunt solos se scire omnia, se meros crepant Philosophos, soli videri volunt sapientes, nomenque sibi *Spirituum fortium*, quasi dicas arrogantis atque impudentis, vindicando, ceteros tanquam imbecillis animi, vanaque imbutos superstitione contemnunt, despiciunt, illudunt . Nullum enim eorum iudicio Religionem inter superstitionemque interesse discrimen videtur . Ex quo factum est, ut

nupera isthâec Philosophiae ratio nec tam multis grata & probata, pluribus etiam, iisque sapientissimis doctissimisque viris, suspecta & invisa sit. Atque eo vel magis, quod quae antea facem ad Theologiam praeferre consueverat, nunc máximo sit impedimento, quominus ad eam perveniat. Ea est enim humani ingenii indoles, ut si qui non ultra tangendi occurrant fines, vel retrorsum eat, si imbecille sit, ac timidum; vel si promptum ac temerarium rupto quovis obice huc illuc errabundum vagetur.

At vera a falsa Philosophia immane quantum distat! Illa enim solam semper sectatur veritatem, nec defatigata studium exquirendi relinquit prius, quam in ea inventa adquiescat. Haec contra verum licet perscrutetur, haud tamen idcirco investigat, ut in illo adquiescat, sed ut quod in speciem quaerit, reipsa non assequatur. Illa internis externisque adhibitis experimentis, institutis in rerum naturam observationibus tota in eo versatur, ut ex rerum notissimarum cognitione occultarum investigationem deducat. Haec vero his omnibus abutitur, ut iis, quae patent, quaeque sunt oculis subjecta fidelibus, sempiternam veluti noctem offundat. Altera

demum in universo rerum orbe veluti insculptam Dei intuetur imaginem, & caelestium rerum atque terrestrium admirabilitate excitata tanti operis rectorem, & tanquam architectum apprehendit. Altera tantae varietatis rerumque pulchritudinis aspectu nihil commota mundum perinde sibi repraesentat, atque adhuc esset rude & indigestum Chaos: adeo quidem, ut perpetuae potius dubitationis spinas, quam scientiae segetem colligat: atque ubi haereat, non quo perveniat, longo ac salebroso examine perscrutetur.

Est modus in rebus adhibendus, sunt quidam praescribendi fines, quos ultra progredi Philosopho sit nefas; siquidem non omnia omnibus scire permissum est. At ubi Philosophia metam ponit: illinc cursum Theologica instituit disciplina. Quamobrem rebus Philosophicis operam dabimus eo scilicet consilio, ut per illas facilius ad Theologiam pateat nobis aditus. Illuc enim omnia recidunt oportet: illa veluti terminus vestrarum cogitationum statuendus est vobis praesertim, Adolescentes, quibus in sortem Domini vocatis Theologiae studium proprium est ac peculiare.

In his igitur Institutionibus nihil nobis fuit

fuit antiquius, quam ut sapientissimorum virorum vestigiis insistentes superflua coërceremus, singula presse persequeremur, ac brevius angustiusque omnia terminaremus. Verba insolentia vitare studuimus, non vero quae Philosophicae scientiae propria sunt; singulae enim artes verbis quasi privatis utuntur ac suis. Tum vero nihil impensius, & diligentius curavimus, quam ut plane, ac perspicue omnia expedirentur. Latinitate usi sumus, qualem Philosophica disputatio ferre posset: quamdam vero sermonis elegantiam quoad ejus fieri potuit consecrari fategimus; ea potissimum de caussa, quia non raro fieri videmus, ut adolescentes ab amoeno humaniorum litterarum studio profecti in ipso Philosophiae limine haereant, horridum ac spinosum differendi genus stomachati.

Hae autem Institutiones Scholarum nostrarum more duorum annorum spatio concluduntur: quantum scilicet temporis satis esse possit, ut prima Philosophiae elementa explicentur, quae rectissima ad illam traditur via; ac veluti intento digito monstretur iter, quo ad verae Philosophiae fastigium ascendatur. Eos autem, qui in contemplanda perspiciendaque rerum natura totos se posuerunt, ampliora

volumina adire jubemus : ut beatos fontes potius hauriant , quam rivulos confectentur . Desiderabantur tamen adhuc breves & concinnae Institutiones , quibus nostri Seminarii Juventus ad Philosophiam informaretur : ipsius igitur usui destinatae nunc in lucem prodeunt hae qualescunque sint , non ut (quod iterum praemonere volumus) in doctissimorum virorum manus perveniant , sed ut nostrae Juventutis votis satisfactum eant .

CONSPPECTUS

EORUM QUAE HOC TOMO I.

CONTINENTUR.

PHILOSOPHIAE SYNOPSIS HISTORICA.

pag. I.

I. De Hebraeis.	5
II. De Chaldaeis.	13
III. De Persis.	20
IV. De Sabaeis.	27
V. De Phoenicibus.	29
VI. De Aegyptiis.	36
VII. De Indis, & Sinis.	44
VIII. De Celtis, Scythis, atque Etruscis.	51
IX. De Graecorum Philosophia Mythologica.	58
X. De Graecorum Philosophia Politica.	64
XI. De Graecae Philosophiae Sectis. Et primo de Ionica.	ibid.
XII. De Socrate, & ductis ab eo Sectis.	71
XIII. De Secta Platonica.	75
XIV. De Secta Peripatetica.	84
XV. De Secta Stoica.	87
XVI. De Secta Italica.	90
XVII. De Secta Eleatica.	97
XVIII. De Secta Epicurea.	100
XIX. De Pyrrhone & Scepticis.	102
XX. De Eclecticis ac de Philosophiae ruina, ejusdemque restauratione.	103

LO.

LOGICAE ELEMENTA.

ANTELOQUIUM. 110

LOGICAE ELEMENTORUM

PARS I. 114

CAPUT I. <i>De Ideis.</i>	ibid.
§. I. <i>De Ideis secundum originem inspectis.</i>	115
§. II. <i>De Idearum proprietatibus.</i>	116
§. III. <i>De Mentis Abstractione.</i>	121
§. IV. <i>De Ideis Singularibus, Particularibus, & Universalibus.</i>	123
§. V. <i>De Ideis ad objecta relatis.</i>	125
§. VI. <i>De Definitione, & Divisione.</i>	130
CAPUT II. <i>De Idearum Signis, seu de Vocibus.</i>	132
§. I. <i>De Vocum Origine.</i>	ibid.
§. II. <i>De Vocum Divisione.</i>	133
§. III. <i>De recto Vocum Usu.</i>	135
§. IV. <i>De Arte Hermeneutica.</i>	137

LOGICAE ELEMENTORUM

PARS II. 141

CAPUT I. <i>De Judicii & Propositionis natura.</i>	ibid.
CAPUT II. <i>De Propositionis Divisione.</i>	143
§. I. <i>De Propositionibus Simplicibus, Complexis, Compositis, & de Compositarum vario genere.</i>	ibid.
§. II. <i>De Propositionibus Universalibus, Particularibus, & Singularibus.</i>	146
§. III. <i>De Propositionibus Affirmantibus & Negantibus.</i>	148
§. IV. <i>De Propositionibus Oppositis.</i>	150
CAPUT III. <i>De Propositionum Veritate & Falsitate.</i>	151

LO-

LOGICAE ELEMENTORUM
PARS III.

154

CAPUT I. <i>De Natura Ratiocinationis.</i>	ibid.
CAPUT II. <i>De vario argumentandi genere.</i>	155
§. I. <i>De Syllogismo.</i>	ibid.
§. II. <i>De Syllogismi Figuris & Modis.</i>	157
§. III. <i>De Syllogismi Vitiis.</i>	158
§. IV. <i>De Veri Syllogismi Fundamento.</i>	159
§. V. <i>De ceteris Argumentationum Speciebus.</i>	166
<i>Enthymema.</i>	ibid.
<i>Epichirema.</i>	ibid.
<i>Prosyllogismus.</i>	167
<i>Sorites.</i>	ibid.
<i>Dilemma.</i>	168
<i>Inductio.</i>	171
CAPUT III. <i>De Fallaciis Argumentorum.</i>	
CAPUT IV. <i>De Causis errorum.</i>	176

LOGICAE ELEMENTORUM
PARS IV.

183

CAPUT I. <i>De Methodi Analyticae Regulis</i>	183
CAPUT II. <i>De Methodi Syntheticae Regulis.</i>	189

METAPHYSICAE ELEMENTA 195

ANTELOQUIUM. ibid.

METAPHYSICAE ELEMENTORUM
PARS I. 196

CAPUT I. <i>De Principiis Cognitionis Humanae.</i>	ibid.
§. I. <i>De Principio Contradictionis.</i>	ibid.
PROPOSITIO. <i>Contradictionis Principio humana-</i>	
	<i>rum</i>

<i>rum cognitionum, quae res necessarias respiciunt, veritas innuitur.</i>	198
§. II. <i>De Principio Rationis sufficientis.</i>	201
PROPOSITIO. <i>Nihil est sine Ratione sufficiente, cur potius sit, quam non sit.</i>	204
§. III. <i>De Criterio Veritatis.</i>	209
PROPOSITIO. <i>Adest nobis Criterium veritatis, illudque in Evidentia situm est.</i>	211
§. IV. <i>Consutatur Scepticismus.</i>	213
§. V. <i>De prima Veritate cognita.</i>	229
PROPOSITIO I. <i>Mens singularia prius cognoscit.</i>	ibid.
PROPOSITIO II. <i>Per characteres communes res prius cognoscuntur.</i>	230
PROPOSITIO III. <i>Se ipsam existere Mens primum cognoscit.</i>	232
CAPUT II. <i>De Ente ejusque Formis.</i>	233
§. I. <i>De Essentia atque Existentia.</i>	234
§. II. <i>De Ente Rationis & Reali.</i>	236
§. III. <i>De Ente Possibili & Impossibili.</i>	237
§. IV. <i>De Ente Necessario & Contingente.</i>	238
§. V. <i>De Substantia & Accidente.</i>	240
CAPUT III. <i>De Attributis Entis.</i>	241
§. I. <i>De Unitate.</i>	ibid.
§. II. <i>De Individuo, Supposito, & Persona.</i>	243
§. III. <i>De Identitate, & Distinctione.</i>	244
§. IV. <i>De Veritate & Bonitate.</i>	248
§. V. <i>De Duratione.</i>	251
§. VI. <i>De Finito & Infinito.</i>	254
CAPUT IV. <i>De Caussis.</i>	258

*Illustrissimus ac Reverendissimus Dominus D. Franciscus Can.
Valle S. Tb. Magister, & Curiae Archiep. Exam. Synod.
revideat, & in scriptis referat. Datum Die 21. Maji 1769.*

F. X. EP. VENA FR. VIC. GEN.

JOSEPH SPARANUS CAN. DEP.

EMINENTISSIME PRINCEPS

INstitutiones Philosophicas ad usum Archiepiscopalis Lycei
nuper mihi traditas ut legi, gratulatus sum ipse mihi,
quod tandem aliquando ejusmodi Philosophiae Elementa in
lucem prodierint, quae Tironibus Cleri nostri ad superiora
potissimum sacra studia facem praeferrent. Ea enim est In-
stitutionum harum brevis & clara methodus, ea verborum
sententiarumque concinnitas, ea argumentorum vis & uber-
tas, ut optimam spem concipere fas sit, imbutos Adole-
scentes principiis *et* *per* *se* ad altiora quaeque fore eri-
gendos. Adeo facta testis manent fides, & pietas, Religio-
nis, ac Theologiae quoque jura, ut demandari typis posse
censeam, dum id tibi, Praeful Eminentissime, probatum
fuerit. Datum Neapoli XIII. Calendas Octobris Anno Do-
mini MDCCLXIX.

Eminentiae tuae

*Humillimus, Obsequentissimus
Franciscus Canonicus Valle.*

*Attenta relatione Domini Revisoris imprimatur.
Datum die 23. Septembris 1769.*

F. X. EP. VENA FR. VIC. GEN.

JOSEPH SPARANUS CAN. DEP.

Re

*Reverendissimus U. J. D. D. Joseph Canonicus Simioli in hac
Regia Studiorum Universitate Professor Primarius revident
& in scriptis referat. Datum Neapoli die 1. Julii 1769.*

NICOL. DE ROSA EP. PUT. C. M.

ILL. AC REV. PRAESUL

Institutiones Philosophicas brevi, clara, simplici methodo
concinatas, Ecclesiasticae Juventuti accommodatas, ut
Christianae Theologiae praecursoria, & altiorum Scientiarum
praecursoria, dici vix potest quanta voluptate perlegerim:
quod salubre ac sinuosum iter planum directumque a
Viro Clarissimo factum viderim, expeditamque ad reliqua
stratam viam. Saepe ac diu expectas huiusmodi Institutiones,
quae recentiora complectantur, & antiquiora non ne-
gligant, adoptatis etiam Scholarum lectissimis verbis, ad
Seminarium maxime commodum typis edi posse, si Tuum
accefferit jus, plane censeo. Datum Neap. XIII. Kalendas
Augusti 1769.

*Humillimus Adversarius. Obsequentijs. Famulus
Joseph Can. Simioli Reg. S. Th. Professor.*

Die 1. Mensis Septembris 1769. Neapoli.

*Viso Rescripto suae Regalis Majestatis sub die 26. proximi
elapsi Mensis Augusti currentis anni ac relatione Reverendi Jo-
sephi Canonici Simioli, de Commissione Reverendi Regii Cap-
pellani Majoris, ordinis praefatae Regalis Majestatis.*

*Regalis Camera Sanctae Clarae providet, decernit, atque
mandat, quod imprimatur cum inserta forma praesentis sub-
plicis libelli, ac approbationis dicti Reverendi Revisoris. Ve-
rum in publicatione servetur Regia Pragmatica: Hoc suum &c.*

GAETA

SALOMONE.

Vidit Fisc. R. C.

*Illustr. Marchio Citus Praef. S. R. C. tempore subscriptionis
impeditus, & alii spectabiles Aularum Praefecti non inter-
fuerunt.*

Reg. fol.

Carulli.


Athanasius.

PHI-



PHILOSOPHIAE

SYNOPSIS HISTORICA.


 UM in more positum sit apud illos, qui se ad ceterarum scientiarum atque artium studium conferunt, ut earum antea historiam percurrant, ratio profecto postulat, ut nos, qui Philosophiae operam damus, antequam fontes hauriamus, ejusdem Scientiae historiam delibemus. Si enim disciplinarum origines scrutari, & quemadmodum illae paullatim adollescere coeperint, donec ad maturitatem suam pervenerunt, attentis oculis inspicere, tum dulce tum utile esse nemo diffitetur: Philosophiae certe historiam plurimum jucunditatis atque emolumenti prae se ferre fateamur necesse est. Eam enim humanae Mentis historiam recte dixeris. Cum enim tam longe retro respicimus, & singulis perlustratis aetatibus quae de rerum natura diversae Gentes senserint, & praestantissimi quique Viri docuerint, investigamus: illuc certe rem deducimus, nimirum ut deprehendere aliquando liceat, quo

2 PHILOSOPHIAE

pacto humana Mens prima illa veluti sapientiae femina, nobis a natura insita, paulatim evoluta explicaverit. Quid igitur jucundius simul, atque utilius hominum animo esse potest, quam ut suarum virium effecta intueatur?

Quamobrem Philosophicas Institutiones, quas Deo dante aggredimur, historica Philosophiae *αἰσθησις* antecedit, quae veluti quaedam picta tabula intuentium oculis exhibebit, quibus illa profecta initiis ad nostra usque tempora sensim adoleverit, quique illam pro diversa temporum ferie, & sectarum varietate excoluerint. Atque ut inde usque incipiam, si quis Philosophiae incunabula investigare amat, is ad ipsa Mundi exordia oculos intendant; cum unum idemque fuerit hominis ac sapientiae principium. Insitus enim & quasi in animo consignatus est amor ille, quo natura ipsa ad veritatem investigandam ducimur.

Homines porro cum universam Mundi compagem ornatissimam & pulcherrimam conspexerint, caeli, siderum, & corporum omnia ornatum ac varietatem, rerumque consentientem, conspirantem, & continuatam cognationem contemplati, horum omnium admiratione correpti sunt. Tum illorum aspectus impulit eos & admonuit, ut plura quaerere. Inde est orta indagatio initiorum, unde scilicet essent omnia nata, generata, concreta: inde rerum omnium causas perscrutari coeptum est. Atque hisce gradibus rerum cognitio, & naturae explicatio paulatim invaluit.

Ut igitur quantum hujusmodi studium apud
fin-

SYNOPSIS HISTORICA. 3

singulas quasque Gentes viguerit, videamus: ipso in limine non abs re erit animadvertere, difficile admodum dictu esse, quid prisci gentium sapientes de Dei, animique nostri natura, & de prima rerum origine senserint. 1. *Ob monumentorum inopiam*. Tot enim illustrium virorum operibus partim incendio, partim temporis edacitate deperditis, pauca admodum antiquitatis monumenta nobis supersunt; ex quibus, tamquam ex discerptis membris, quale fuerit veterum sophorum doctrinae totius *σύνμα* (*corpus*) divinare vix possumus.

2. *Ob varium, ac multiplex linguarum ingenium*. Quo fit, ut verba in alienam linguam translata vim primigeniam saepe amittant, idque interdum praesferant, quod est ab Auctoris mente remotissimum. Jam vero quidquid barbaricae eruditionis nobis innotuit, id ferme omne a Graecis accepimus. Ecquis igitur praestare poterit barbararum gentium monumenta in Graeciam, graece autem scripta in alias gentes sine fraude commigrasse, & in linguis adeo dissimillimis verba verbis, notiones notionibus ex aequo respondere?

3. *Ob frequentiore Πρωτοποίας Prosopopoeiae usum*. Nihil sane priscis sapientibus tam familiare, quam inanimatas mundi partes, resque naturae in scenam producere *personarum* habitu & forma indutas. Sic Chaos, Aether, Nox, & id genus alia in veterum Cosmogoniis tamquam personae quaedam animatae incedunt, aguntque.

4. *Ob arcani studium*. Nimirum ne sanctiora rerum dogmata in vulgus edita vilescerent, con-

fueverunt barbaricae sapientiæ Antistites ea allegoriis, aenigmatibus, fabulis, hieroglyphicis, aliisque praestigiis obscurare, quo profanorum captui subducerentur. Hinc duplex olim viguit doctrinae genus *Δημιῶδες* ἢ *Ἀπὸρρητον*, *Populare*, & *Arcanum*. Populares doctrinae omnibus sine ullo discrimine patebant. Arcanis initiari non poterant nisi Mystae. Vetus hoc, & commune barbararum gentium institutum ad Graecos postea translatum est. Exemplo sunt *Exoterica*, & *Acroamatica* Aristotelis scripta: quorum illa erant ad vulgi sensum accommodata; haec accurata limatius ad veritatis obrussam. Atque id mysticae, & popularis doctrinae discrimen in causa nonnumquam fuisse reor, quamobrem veteres quidam philosophi de principiis rerum non idem semper dicere viderentur.

5. *Ob praeposterum Cosmogonias cum Theogoniis confundendi morem*. Antiquissimi mortalium, quorum videlicet animos superstitio oppresserat, Mundum, & illustriora quaelibet Universitatis corpora Deorum numero, & loco colebant. Proinde veteres naturae Sacerdotes cum Deorum ortum, & genealogias pertexerent, non alio certe spectabant, nisi ut mundi initia, rerumque procreationis ordinem symbolice explicarent. Verum procedente tempore, sive ut urbium primordia augustiora facerent, sive ob superstitionis in dies praevalentis studium coeperunt patria etiam cujusque gentis *ιστορικὰ* (*historica monumenta*) divinis honoribus passim consecrari. Id quod barbaricam deinde cosmopoeiae doctrinam mirifice perturbavit, obscuravitque.

Haec

SYNOPSIS HISTORICA. 5

Haec cum ita sint, quidquid ad nostram usque aetatem ex vetustissimis gentium doctrinis perrennavit, qua maxima fieri poterit diligentia, & perspicuitate exponamus; & Hebraeos primum, quippe vetustiores, & quorum historiam puro e fonte haurire licet, tum ceteros deinceps Orientis populos adeamus.

§. I.

De Hebraeis.

Sapientiae studio supra ceteras emicuit Hebraea Gens, quippe potissimum in ea clarissimi viri floruerunt Noachus, Abrahamus; Moses, David, Salomon, alique; quorum tamen sapientia potius in vera Dei notitia & morum scientia, quam physicis observationibus versata esse videtur.

Quaenam fuerit Hebraeorum sententia de rerum origine, de Deo, atque animi nostri natura, facile est colligere ex iis, quae praesertim ipsorum legislator Moses nobis litteris consignata transmisit. Is quidem avitae traditioni innixus, ita philosophatus est, ut totius rerum universitatis ortum ad supremum Numen unice retulerit, atque hunc Mundum infinita Dei potentia, cum nihil horum antea existeret, conditum esse affirmaverit.

Totum autem Hebraeae Cosmogonias caput Moses hac narratione conclusit. *In principio, ait, creavit Deus Caelum & Terram. Terra erat inanis, & vacua, & tenebrae erant super faciem*

Abyssi. Spiritus Domini ferebatur super aquas. Dixit Deus: fiat lux, & facta est lux. Fiat firmamentum, & dividantur aquae. Terra appareat, & germinet. Fiant luminaria in firmamento caeli. Producant aquae, producat Terra animalia. Fiat homo ad nostram imaginem, habeat spiraculum vitae, crescat, & imperet. Dixit, & factum est ita (a).

Itaque Deus ex Mosis doctrina primo *Chaos*, rudem indigestamque molem, quod tenebricosi Abyssi, & aquarum nomine appellat, e nihilo educit. Stupidam hanc materiei molem sex dierum spatio ita divina virtute exagitavit, ut inde orania, quibus universi compago existit, atque ornatur, profilierint.

Quod primo apparuit, lux fuit, & primam diem in dirimenda a tenebris luce Deus insumfit. Cum vero illam ante Solis ortum genitam referat Moses, a Sole ipso diffitam, & distinctam clare indicat.

Altera die Deus רָקִיעַ *rakiah* h. e. *extensionem*, sive *expansum* in medio aquarum posuit, Atmosphaeram nempe, quae aquas in vapores extenuatas pendulas sustineret, ac aquas ab aquis crassioribus dirimeret, quae supra Telluris globum confluxerent.

Tertia, Tellure solidata, profundum alveum, ubi aquae reconderentur, excavavit, ut ficca Telluris facies omni plantarum genere exornaretur: quod proprium fuit hujus diei opus.

Quarta Sol, & Luna creantur, & in Caelis po-

SYNOPSIS HISTORICA. 7

ponuntur, ut forent in signa temporum, & Telluris usui accommodata. Tum vel sidera, & reliquus Planetarum ordo fuit institutus.

Quinta aquarum, aërisque incolae, Pisces, Avesque imperio Numinis prodire.

Sexta demum cetera terrestria animantia progignuntur, & summa manus Creationi imponitur Hominis efformatione, cujus corpori e terrae limo coagmentato animam viventem Deus sufflavit.

Haec sane sunt, quae de rerum primordiis Moses breviter scripsit, quae tamen omnia summam, & prorsus divinam redolent sapientiam. Ex illius enim narratione rite deducimus Deum esse rerum omnium Opificem, & longe aliud esse, quam ipsa materies, quae nondum erat, dum ille existeret: tum nec motus, nec partium modificatio, non vis attrahens, vel repellens, nec ulla lex alia in partem totius Opificii vocatur: supremum, & unicum Conditoris arbitrium fuit sola lex, cujus imperio omnia sunt & genita, & apte disposita.

Atque hanc de rerum exordio doctrinam tam constanter Hebraei retinuerunt, ut ad nostram usque aetatem transmissa in hujusce Gentis reliquiis perseveret. Ad ignem enim damnatum esse Sec. XV. R. quemdam Samuelem Sarfa, urgente omnium Rabbiorum coetu, quod Mundum ex materia antea existente formatum doceret, narrat R. Menasse Ben-Israël.

Quid autem de Deo senserint, passim eorum libri docent: illum nimirum nobis exhibent veluti Ens aeternum, infinitum, ejus naturae, quam

ne nomine quidem appellare fas sit; ita sapientissimum, ut omnia noverit & scrutetur, atque universa conservet ac moderetur.

Humanas mentes ἀσμάτως καὶ ἐνύχως, *omnis* nimirum *materiae expertes* esse existimarunt. Moses enim Deum narrat post conditum hominis corpus, *inspirasse in faciem ejus spiraculum vitae*, נִשְׁמַת חַיִּים *Nisemat Chajim*. Cum autem hae voces unis duntaxat hominibus apud Mosén propriae sint ac peculiares; profecto spiraculum illud, unde homo tum viveret, tum sentiret ac cogitaret, principium omnis corporeae concretionis expers Mosi fuisse credendum est. Ubi enim occurrit (a) נִשְׁמַת רוּחַ *Nisemat-Ruach Chajim*: & tum de hominum, tum ceterorum animantium genere usurpari videntur: sedulo ibi utraque vox *Nisemat* & *Ruach* distinguenda est, quarum primam ad homines, alteram vero ad bruta animantia referre oportet. Primum enim Moses universa animantia aquis Diluvii periisse narrat: *Consumtaque est omnis caro, quae movebatur super terram, volucrum, animantium, bestiarum, omniumque reptilium, quae reptant super terram: universi homines*. Tum animantium omnium, quae recensuit, veluti ἀνατιθαλίωσιν instituens κατ' ἐπιτάγην addit: *Et cuncta; in quibus spiraculum vitae est in terra, mortua sunt*. Hebr. *Omnia, in quorum facie erat Nisemat Ruach Chajim ex omnibus, quae sunt in arida, mortua sunt*. Adeo quidem ut *Nisemat Chajim* unos homines, qui proxime praecedunt, *Ruach* vero *Chajim*

(a) Gen. VII. 22.

SYNOPSIS HISTORICA. 9

Chajim cetera animantia respiciat ; quibus quidem *Ruach Chajim* , nunquam vero *Nischnat Chajim* Mosem adscripsisse legimus (a).

Quod autem de animorum immortalitate non dubitarent Hebraei , illud in primis argumento est , quod mortuos ad vitam revocari , eosque viventibus nonnunquam apparere crederent : atque illos de futuris eventibus consulere in more haberent. Deinde in Mosi historia cum Patriarcharum obitus describuntur , frequens est illa loquendi formula : *mortuus est* , & *appositus est patres suos* , vel *ad populum suum* ; quae verba nullo pacto intelligi possunt , nisi altera ex Hebraeorum mente vita admittatur (b). Sacrifime etiam Patres illi , quorum historiam Moses pertexuit , spem praemonstrant videndi ea , quae longe post eorum obitum erant futura . Legimus etiam *hominem hic in terra non posse Deum intueri* , & *maximam mercedem esse Deum ipsum*. Quod sane indicat non terrena prorsus fuisse praemia , quae Hebraea gens anhelaret (c) . Adhaec culpae mors comes , & virtutis vita passim pronuntiatur , nec tamen impii omnes mortem subibant , nec boni omnes vitam servabant ; non igitur nisi animi vita huiusmodi intelligenda est ; adeoque statim subnectitur *Deut. XXX. 20. Deus est vita tua*. Quid vero hac doctrina luculentius in libris Jobi ? illic sane animorum immortali-

(a) *Gen. VI. 17.*

(b) *Gen. XXV.*

(c) *Gen. XLIX.*

talitas non significatur modo, sed longa oratione verbis splendidissimis probatur.

Praetereundum non est fuisse inter Hebraeos a Babylonica captivitate reduces, qui ab antiqua patrum sapientia desciscientes graecissare coeperunt. Inde Sadducaeorum, Pharisaeorum, & Essenorum sectae exortae sunt.

Sadducaeorum, quibus id nominis a quodam Sadocho impostum fuisse perhibent, primam originem jam tum ab Esdrae aetate revocant nonnulli (a). Ipsorum dogmata haec ferme erant. 1. Neque Angelos, neque spiritus esse, teste Luca (b); & nullas a corpore secretas animas. 2. Humanas Mentis corporibus non esse superstites. 3. Vana esse commenta, quae de resurrectione futura vulgo dicebantur. 4. Recte factis praemia, aut peccatis poenas in altera, quae praesentem sequatur vitam, reservari negabant. Hinc in poenis a fontibus repetendis nimium severos fuisse refert Josephus Hebr. (c).

Pharisei a פָּרָשִׁי *pharas*, separavit nomen adepti, quippe religiosioris vitae quodam genere a cete-

(a) Joannes Lightfootus Hor. Hebr. in Evang. Matth. Cap. III. 7. ex Babyl. Beracoth fol. 54. advertit fuisse, qui diebus Ezrae mortuorum resurrectionem negarent. Atque huc pertinere forsitan ait illa apud Malachiam III. 14. Vanus est qui servit Deo: & quod emolumentum, quia custodivimus praecepta ejus? Haec enim Sadducaeorum haeresim satis sapiunt.

(b) Actor. XXIII. 8.

(c) Antiq. Judaic. Lib. XX. c. 8.

SYNOPSIS HISTORICA. II

ceteris Israëlitis distinguebantur, a Sadducaeorum dogmatis dissentiebant. Angelos enim & spiritus esse aiebant: immortalitatem animis vindicabant: resurrecturos homines, & praemiis ac suppliciis in altera vita locum esse tuebantur. Justorum animis μεταμύχων quamdam Pharisei adscripsisse nonnullis videntur: in quo ducuntur ipsi Iosephi testimonio ejus sectae intelligentissimi; nihil autem ejusmodi inde extundi posse emunctioris naris Eruditi tuentur (a). Eos
prae-

(a) *Iosephus* lib. II. de Bello Judaico cap. VIII. *Phariseos ait docuisse*, animam omnem esse incorruptam; μεταβαίνειν δὲ εἰς ἕτερον σῶμα τὴν τῶν ἀγαθῶν μόνον, migrare vero in alterum corpus bonorum duntaxat, malorum autem aeterno supplicio puniri. Atqui illud μεταβαίνειν εἰς ἕτερον σῶμα non exprimit metempsychosin sic dictam Pythagoricam. Idem enim Auctor Antiquitat. Lib. XVIII. cap. I. *Phariseorum sententiam sic exposuit*, ut resurrectionis potius, quam metempsychoseos meminisse videatur. Ait enim: Animis credunt (*Pharisei*) vim esse aeternam, & eorum sub terra judicia fieri, tum praemia poenaeve cuique contingere ex virtutis aut malitiae in hac vita merito, hisque quidem carcerem perennem constitui, ταῖς δὲ ψαύουσιν τὴν ἀνάβιον, illis vero facultatem rursus vivendi. Tum Lib. III. cap. VIII. *Rer. Judaic.* An nescitis, inquit, quod morientium juxta naturae legem, & qui Deo debitum exsolvunt repetenti quod dederat, laus sit aeterna, domus sobolesque fir-

praeterea Legi, & potissimum traditionibus, quas *oralem Legem* appellabant, nimium additos fuisse: tum etiam inani ostentatione abreptos in externo religionis cultu totos occupatos interiores cordis recessus cujuslibet foeditatis puros servare neglexisse, ex ipsius Christi objurgationibus norunt omnes.

Quos Essenos Josephus, Essaeos Philo, atque Of-

firma, purae autem & dicto audientes animae μένουσιν χῶρον ὑπερῷ λαχῦσαι πόν ἀγιάστων, ἔνθεν ἐκ περιτροπῆς αἰώνων ἀγίοις πάλιν ἀντινοικίζονται σώμασιν, manent sanctissimum caeli locum naetae, hinc per seculorum lapsus iterum introducuntur in corpora munda, ut ea inhabitent? Tandem contra Appion. lib. II. §. XXX. Iis qui leges servarunt, & pro iis, si ita res ferat, mortem oppetierunt, dat Deus γένεσθαι τε πάλιν, καὶ βίον ἀμύνω λαβῶν ἐκ περιτροπῆς, nasci iterum, & ex temporum intervallo vitam adipisci meliorem. Quod igitur reviviscendi facultatem Josephus dixerat, hoc idem expressit, cum inquit transire in aliud corpus: cujus corporis proprietatem describens, illud purum nuncupat. Et animarum conditionem, tempusque, quando illud novum purumque corpus induendum sit significaturus ait: postquam locum caeli sanctissimum naetae fuerint, & secula nonnulla lapsa sint: tum ut vitae qualitatem in iis puris corporibus agendam aperiret, eam hac mortali vita praestantiorē esse tradit. Haec autem omnia quam longissime absunt a metempsychosi. Videndus in hanc rem Guilielmus Irthovius De Palingenesia veterum lib. II. cap. XI.

Offenos Epiphanius appellant: hi quidem prorsus incertae originis sunt. Ipsorum mores ita describit Iosephus (a) ut eos veluti homines frugi & nimium severos nobis exhibeat. Summus erat Dei, & Mosis apud ipsos cultus. Animos immortales esse, eosque e summo aëre in corpora descendere; corporis vero vinculis solutos pristinas sedes veluti e captivitate reduces repetere statuebant.

§. II.

De Chaldaeis.

Chaldaeorum Philosophia ad observationibus potissimum astronomicis ortum habuit; quas adeo antiquas jactabant, ut jam tum, cum astra primum observare inceperant, usque ad Alexandri aetatem 470000. annos fluxisse adferrent. Verum multo recentiores erant astrorum cognitiones, quas teste Porphyrio apud Simpliciū (b) Callisthenes ad Aristotelem misit; annos enim 1903. prae se ferebant: quorum initium ad annum M. 1750. & Per. Jul. 2480. statuatur oportet. Licet haec ipsa Chaldaicae Astronomiae antiquitas, quae ferme diluvii aetatem attingit, viris doctis suspecta videatur. Legatur Thomas Stanlejus (c).

Apud Chaldaeos primas tenuit *Zoroastres*, ejus quo major est fama, eo incertior atque ob-

(a) *De Bello Jud. Lib. II. cap. 12.*

(b) *Comment. in Lib. II. Arist.*

(c) *Hist. Philos. Orient. P. I. cap. I.*

obscurior historia. Quae enim vis ipsius nominis, quod ita a Graecis expressum est, unus an plures fuerint, & qua aetate vixerit, vehementer inter se dissentiunt Eruditi. Nam & sex, & quatuor, & tres, & duo, & unus alii ab aliis recensentur. Vero tamen similis est duos fuisse, Chaldaicum alterum, alterum Persam. Illi quidem artium & scientiarum inter Chaldaeos inventio vulgo tribuitur. Non pauca scripta illum auctorem habuisse narrantur, praesertim *vicies centum millia versuum*, quos ab Hermippo Smyrnaeo, qui sub Ptolomaeis floruit, explanatos esse refert Plinius (a). Exstant adhuc λόγια, sive *Oracula*, quae Zoroastri tribui solent, quibus Chaldaicae Philosophiae compendium confecit laudatus Stanlejus. Eorum συζήτιν Francisco Patricio acceptam referimus, qui unde unde ipsorum fragmentis conquisitis, tres & viginti supra trecentos versus collegit, & pro argumenti affinitate conjunctos in undecim sectiones dispertivit: Hujusmodi collectionem *Tomo II. Operum Philosophicorum* adnexuit Joannes Clericus adjectis notis, atque *Indice Philologico*.

Praeter Zoroastrem apud Chaldaeos florere *Azonaces* Zoroastri Magister, *Marmaridius* Babylonius, *Zarmocénidas* Afsyrius, *Zoromasder* Teucer, *Naburianus*, alique obscurioris notae philosophi; sed supra ceteros commendantur *Belus*, & *Berosus*. Illi Astronomiae cultura adscribitur, & tradidere Aegyptii Neptuni, & Lybiae filium fuisse, ab eoque coloniam ab Aegypto

(a) *Lib. XXX. cap. I.*

pto fecus Euphratem ductam, institutosque Sacerdotes rerum Physicarum, & Astronomicarum Magistros, quos Babylonii *Chaldaeos* nuncuparunt (a). Berosus vero recentior (nam Alexandri Macedonis aevo floruisse fertur) primus Chaldaicas disciplinas Graeciae intulit: eique propterea ab Atheniensibus statuam inaurata lingua in Gymnasio positam esse auctor est Plinius (b).

Chaldaeorum doctrina ita naturas omnes contemplatur, ut primo aeternas, tum quae initium habuerunt, sed fine cariturae, ac tertio perituras consideret.

I. Prima classis supremum Numen continet, quem *אור Or*, seu *Ignis* nomine appellabant. Deum *ὑπερκόσμιον φῶς* (*supramundanum lumen*) habitare, neque adiri posse, nisi per spiritus medios inter illum & homines, ipsorum dogma fuit. Nulla igitur impietatis nota Chaldaeis inurenda videtur, quam nonnulli Philonis (c) testimonio adducti, ipsis adscribunt. Quamvis enim Deum spirituum omnium fontem per universas Mundi partes tanquam animam diffusum esse docerent: nunquam tamen Mundum & astra loco Dei habuerunt. Chaldaeos sane de Dei cultu & religione apud omnes Gentes bene audiisse praedicat vetus oraculum apud Justinum (d) aliosque;

Mi-

(a) *Diod. Bibl. lib. I.*

(b) *Lib. VI. cap. XXXVII.*

(c) *De Migrat. Abrahami p. 145.*

(d) *Paren. ad Graecos pag. 16. Edit. Col. 1686.*

Μῦθοι Χαλδαῖοι σοφίην λάχον, ἣδ' ἀπ' Εἰβραίων,
 Αὐτογίνητων ἀνακτα σιβαζόμενοι Θεὸν ἀγνώως.

*Soli Chaldaei sapientiam sortiti sunt, &
 Hebraei,*

Pure colentes Deum regem per se genitum.

II. Altera classis secundum genus Deorum & Daemonum complectebatur. Illos bona revera conferre, hos autem deceptores esse, atque *ἀνάθιος* dicebant. Multa de hujusmodi Diis in Oraculis habentur, quae si genuina essent, Chaldaeorum doctrinam nobis aperire possent. Consulatur Stanlejus.

Ad hanc alteram classem revocat hominum animos Auctor *Explanationis brevis* dogmatum Chaldaeorum. Quae de Animis Oracula docent, Platoniorum doctrinam redolent. Ibi enim ita Chaldaeorum sententia exhibetur: Animos ignis divini partem esse: e lucidis supra Lunam sedibus demitti, propter *πτερορίαν*, quod eis pennae defluerint, h. e. a primigenia perfectione desciverint; aethereo quodam corpore vestiri, quod veluti ipsorum *ὄχημα vehiculum* esset; eos tandem rursus in pristinas sedes redire, si bene operam suam corpori accommodaverint; sin male, deterioribus sedibus addici. Ceterum quod humanos animos ex Deo emanasse, atque immortales esse Chaldaei docuerint: alterum quidem ex fragmento Berosi, quod nobis exhibet Georgius Syncellus (a), colligit Jacobus Bruckerus (b), alterum

(a) In *Chronico* pag. 28.

(b) In *Hist. Crit. Philos. Parte I. Lib. II. cap. II. §. XXIII.*

tum vero ex Theopompo apud Laërtium ostendit Clericus (a).

III. Quod vero ad res corporeas attinet: materiam a Chaldaeis aeternam positam esse ait Diodorus Siculus: mundi tamen formam, ordinem, atque ornatum a divina providentia constituta esse non negabant. Etenim cit. Berosi fragmentum, ubi *ἀρχή πᾶσις* Cosmogonia exponitur, haec docet: 1. fuisse olim tempus, cum omnia erant *σκότος καὶ ὕδωρ*, tenebrae, & aqua, idest fluxa, informis, & caliginosa materies. 2. Deum, quem *Belum* vocat, *mediis dissectis tenebris*, idest caliginosa hac materia in ordinem digesta, Caelum, & Terram effecisse: deinde cum Caelum, & Terram determinasset, Solem, Lunam, & reliqua tum vaga tum inerrantia sidera condidisse. 3. Eundem hunc Deum per universam naturam intentum vim, & efficientiam rebus omnibus tribuere. Porro in Chaldaica Berosi Cosmogonia Deus ad Caeli terraeque conditum velut administra utitur muliere quadam, cui nomen *Omorocha* (b). Quod quidem nomen confictum videtur ex hebraicis vocibus *Em-Ruah* idest, Mater Spiritus. Nempe ut expressam eo nomine suspicari liceat vim quamdam genitalem, seu mavis Domini spiritum illum, qui initio rerum incompositam stupidamque materiam suo velut incubatu fovit, & ad erumpendum in ope-

Tom. I.

B

ra

(a) In Indice Philolog. V. Resurrectio.

(b) A Chaldaeis dicta fuit Thaluth; quae von adeo accedit Graeco vocabulo Θάλαττα h. e. Mare, ut hoc ab illa profectum videatur.

ra provocavit, columbae instar ova excludentis.

Haec quidem erat arcana Chaldaeorum disciplina. Sed quam populus doctrinam palam profitebatur, idololatricum cultum praeferebat. Solem enim & Lunam aliaque sidera veluti Deos venerabantur. Qui sane Solis & Lunae cultus apud Orientis populos vetustissimus erat. Ex Jobi enim testimonio, cujus patria Chaldaee, ut nonnullis videtur, finitima erat, orientem Solem, & novam Lunam jam tum coli consuevisse patet (a).

Auctarii loco hic addam Chaldaeos eruditionem suam non more Graecorum, sed traditionis *πατερπαραδότης* ope, quae nimirum a patre in filium transmitteretur, propagasse, teste Diodoro Siculo (b). Eos praeterea secundum varias, quas profitebantur disciplinas, sectis inter se divisos fuisse. Erant enim apud ipsos *חרטום* *Charthumim*, *אשפז* *Asaphim*, *מכשפז* *Mechascephim*, & *חשדן* *Chasedim*, quos quidem a Nabuchodonosoro, acceritos esse, ut somnium divinarent, narrat Daniel (c).

Qui ultimo loco recensentur *Chasedim* five Chaldaei sunt, qui *סוֹדֵי* a Graecis appellantur: quo sane nomine inter Babylonios eruditi cohonestabantur. Sed quod munus, quae disciplina iis propria & peculiaris fuerit, quos primo loco memorat Daniel, non constat.

Stan-

(a) Cap. XXXI. 26. 27.

(b) Lib. II. pag. 82.

(c) Cap. II. 2.

Stanlejus (a) ita singulis munia dispertit. *Charthumim* à Pers. חרר, *Churad*, cognoscere di-
cti, rerum naturae cognoscendae operam dabant,
sive Theologiae & Physicae.

Asaphim Persarum Magi erant, & eorum
rituum, quos Magicos appellant, magistri. Ma-
gia porro, si Judaeis fidem adjungere velimus,
duplex est, alia *Naturalis*, alia *Theurgica*. Pri-
ma rerum omnium caelestium & sublunarium
virtutes scrutatur: quo Magiae genere mira a se
patrari jactabant Chaldaei, teste Mose Maimo-
nide (b), Altera eo intendit, ut boni daemones
evocentur, mali vero averruntur.

Machascephim divinandi artes prosequabantur.
Hae autem in somniorum & portentorum inter-
pretatione, atque in extispicio litae erant. *Ma-
lesficos* Vulgata appellat, a חשף *Chissceph*, *prae-
stigiis usus est*. At *revelatores* interpretatur
Stanl. ab Arab. حاشف *Chasceph*, *revelavit*, ut
qui res absconditas revelarent.

Tandem *Chascedim* peculiari sensu eos nuncu-
pari censet laud. Stanl. qui Astrologiam profi-
terentur. In qua quidem scientia Chaldaeorum
eruditio inclaruit, quippe tam Babylonicae re-
gionis partem incolebant, quae Arabiae deser-
tae finitima juxta Persicum mare camporum pla-
nitie & magnitudine patebat. Hinc ut advertit
Cic. (c) *cum caelum ex omni parte patens atque
apertum intuerentur, trajectiones motusque stella-*

B 2

rum

(a) *Hist. Phil. Orient. lib. I. cap. X.*

(b) *Moreh Nebhochim Lib. III. cap. XXXVII.*

(c) *De Divinat. Lib. I. cap. I.*

rum observaverunt. Hujus porro Scientiae duae erant partes; una motus legesque siderum contemplabatur: altera eorundem effectus investigabat, ut nimirum inde praedici posset, quid cuique eventurum, & quo quisque fato natus esset.

§. III.

De Persis.

Chaldaeis acceptam referunt omnem eruditionem suam Persae & Sabaei, quorum illi ultra Chaldaeam ad meridiem inde Persidem, hi autem hinc Arabiam incolebant. Apud Persas Philosophiae institutorem fuisse *Zerdusht*, aut *Zardusht* communi consensu omnes perhibent; unde Graecorum Zoroastres effectus plerisque videtur. Hunc ajunt adhuc juvenem cum Judaeis in Perside captivis diu versatum fuisse, eosque captivitate soluta secutum in Palaestinam cum Ezra sese adjunxisse; inde in Persidem regressum Prophetam agere coepisse, librumque evulgasse inscriptum *Zend*, seu *Zend-va-esta*, quasi dicas *igniarius*, sumpta nimirum inde metaphora, quod sicut duorum lignorum attritu ignis excutitur, ita Religionis studium illius libri opera excitandum erat. Hujusmodi librum immensi voluminis Persarum lingua & litteris vetustissimis exaratum, selectiora quaedam inde depromens quidam Persa Sacerdos, in Medo-Persicam linguam convertit: cujus generis sunt liber *Sadder*, *Zeratusht-nama*. Sed legendus Thomas Hyde

de (a), qui omnium diligentissimus res veterum Persarum perscrutatus est.

Persarum Magorum eruditio ab *Hystaspe* & *Hofstane* plurimum exulta esse perhibetur. Illum aetate Cyri vixisse refert Herodotus. Hunc autem Xerxi in bello, quod Graeciae intulit, sese comitem adjunxisse, & *semina portentosae artis*, magiae scilicet sparsisse testatur Plinius (b).

Magorum nomen apud Persas perhonorificum fuit; sapientibus enim peculiare erat. Quae sit vocis sententia inter eruditos non constat. Laudatus Hyde linguarum orientalium peritissimus *Magum* sive *Mog* incertae originis vocem esse ait, qua ignis cultor & Sacerdos significatur. Potissimum Magorum munus erat sacris praesse, sacrumque ignis cultum, preces & sacrificia peragere. Eorum mores exponit Laërtius (c). *His vestis candida: lectus, humus: esca, olus, caseus, panisque cibarius est: arundine pro baculo utuntur.*

De Persarum Theologia tres ferme inter viros doctos opiniones versantur. Nonnulli duos coluisse Persas Deos volunt, per se existentes, atque initio carentes. Alii Deum unum summum & benignum, bina autem inferiora numina ab eo condita, bonum alterum, alterum malum, hanc gentem esse professam arbitrantur. Alii denique uni eos Deo supremo rerum omnium conditori supplicasse, atque huic malum quemdam genium adjunxisse contendunt. Mediae sententiae

(a) *De Relig. vet. Pers. cap. XXIV. & seq.*

(b) *Lib. XXX. cap. 1.*

(c) *In Prooemio.*

inhaerendum esse persuadent, quae ex Plutarcho, Theopompo, Diogene Laërtio, Theodoro Mopsuest. animadvertunt Cudworthus & Moshemius (a).

Plutarchus sane (b) duo a Zoroastre numina inducta fuisse refert sibi invicem contraria; quorum alterum omnis felicitatis bonorumque auctor; alterum malorum atque infelicitatis fons atque origo esset. Illud *Oromasdem*, hoc vero *Arimanium* appellari ait: Oromasdem, a purissima luce, Arimanium vero a tenebris ortum habuisse. Ille vero sex Deos ex Zoroastris opinione genuit, primum benevolentiae auctorem, alterum veritatis, tertium iustitiae, reliquos sapientiae, divitiarum, & voluptatis, quae bona opera sequitur. Contra Arimanius totidem alios ipse procreavit, oppositorum malorum fontes.

Cum vero Oromasdes, & sidera, & alios quatuor & viginti Deos effecisset, atque in Ovo concludisset; ab Arimanio, suisque satellitibus perforato Ovo, ac patefacto, mala cum bonis permista, atque ex temperatione istiusmodi variae exstiterere concrectiones, & ex variis concrectionibus formae corporum productae.

Medium autem inter utrumque *Mithram* esse subnectit Plutarchus, summum scilicet Numen, quod ita illorum Deorum secum pugnantium conatus temperat, ut ex ipsorum conflictu nihil summa rerum detrimenti capiat; donec futurum erit, ut malignus Daemon funditus interimatur ac pereat, ac omnia pace ac tranquillitate fruantur.

Ve-

(a) *Syst. Intell. Cap. IV. §. XIII.*

(b) *De Iside & Osiride pag. 369.*

Verum *Arimani* nomine videntur Persae defra-
gnatam voluisse Materiam, rem scil. tenebrico-
sam, inertem, ac renitentem: nomine autem
Orosmadis lucem, sive Aethera, naturam scil.
mobilissimam, lucis, & caloris causam, moven-
di, gignendique vi praeditam.

Diffident inter se Eruditi, quidnam Mithrae
nomine venerati fuerint Persae. Plurimi antiquis-
simos Persas Solem pro Deo coluisse, atque il-
lum Mithrae nomine appellasse existimant, ducti
ex veteri inscriptione, *Deo Soli invicto Mithrae*:
atque Herodoti & Strabonis testimonio, qui Soli
Persas equos immolasse narrant. Cujusmodi mo-
rem respiciens Ovidius ait (a):

*Placat equo Persis radiis Hyperiona cin-
ctum,*

Ne detur ceteri victima tarda Deo.

At Cudworthus quamvis concedat Persas So-
lem loco Dei habuisse; Eubuli tamen auctorita-
te ductus, qui Mithrae historiam copiose con-
scripsit, Deum quemdam Sole majorem & prae-
stantiorem Mithrae vocabulo designasse credit,
cujus vivam ac spirantem veluti imaginem So-
lem esse putabant.

Et sane Persas saltem recentiores Numen So-
le augustius veneratos esse testes sunt Xenophon
& Plutarchus: quorum ille (b) ita Cyrum pre-
cantem inducit: Ζεῦ πατρί, καὶ Ἡλί καὶ πάντες
Θεοὶ κ. τ. λ. *Jupiter patrie, & Sol atque universi*

deu

B 4

fit

(a) *Fastor. Lib. I. v. 383.*

(b) *De Exped. Cyri Lib. VIII.*

se Dii &c. Hic vero (a) Darium Ζεῦ πατρίδι Περσῶν, o patrie Persarum Jupiter exclamasse refert.

Praetereunda non videtur saepe laudati Mo-
shemii de Persico Mithra sententia, quam fuse
prosequitur in notis ad *Syst. Intell.* (b). Arbi-
tratur quidem Vir doctissimus Mithram validum
Virum aut Regem fuisse, ferarum venationi im-
primis deditum, qui Persarum provinciam be-
stiis, latronibus, aliisque malis eripuit: atque
ejus animam in Solem translatam Persas putas-
se; quem idcirco beneficiorum memores ita co-
luerunt, ut ipsum colere Solem viderentur.

Id autem 1. probat ex imaginibus, queis ve-
teres Persae Mithram pingebant. Hae autem
virum robustum exhibent, gladio cinctum, thia-
ra Persica tectum, canibus stipatum, qui tergo
tauri insidens eum coercet, ac gladio conficit.

2. Ex equorum victimis, quas illi immola-
bant, ut inde pateret Mithram, dum in vivis
esset, equis delectatum esse, quibus & bestias
domuit, & praelia commisit. Hinc falsus Ovi-
dus, qui equos Mithrae propter celeritatem
consecratos fuisse censet. Cur non enim aquila-
m, leporem, aliudve animal equo velocius di-
caverint?

3. Tandem potissimum ex ritibus & caeremo-
niis, quas ea de causa ubique institui notum est,
ut veterum beneficiorum rerumque gestarum me-
moria vigeat, quibus ipsi heroes nomen & fa-
mam

(a) *Lib. II. de fortuna Alexand.*

(b) *Cap. IV. §. XVI.*

nam sibi pepererunt. Porro ritus adhibiti, cum aliquis Mithriacis sacris initiaretur, ejusmodi erant, ut venationis & praelii speciem quamdam praeferebant. Huc etiam facit, quod, ut idem Auctor advertit, antrum, in quo mysteria peragebantur, bestiarum figuris exornatum erat: bestiarum nomina initiatis imponebantur: ac bestiarum pellibus iidem inducebantur.

Quod ad Mundi incunabula spectat, recentiores Persae jactitant, vel inde a Zoroastris aevo esse sibi transmissam quamdam Cosmogonias historiam, quam lubet breviter recensere. Rerum igitur Universitatem non sex dierum spatio creatam putant, sed per sex varia temporum intervalla, quae ipsi *Gabanbarba* vocitant, quae simul sumta dies 365. sive annum integrum conficiunt.

Primum temporis spatium vocatur *Mid-yuzeram*. & diebus 55. constat, quibus Caeli perfecti sunt.

Alterum *Mid-yusham* sive *Mid-yushabam* diebus 60. quibus creatae fuerunt aquae.

Tertium *Pitishaim*, sive *Pitishoim* diebus 65. quibus ortum habuit Tellus.

Quartum *Jyaseram*, sive *Jyasbehrum* diebus 30. qui plantarum, ac arborum creationi addicti sunt.

Quintum *Midiyarim* diebus 80. quibus animalium procreatio exstitit.

Sextum denique *Hamespitamidim* diebus 75. complectitur, hominis creatione decorum. Atque haec omnia ab ipso Deo Zoroastri fuisse significata unanimi tenent consensu (a).

De

(a) *Hyde pag. 164.*

De animorum immortalitate, atque hominum ad vitam reditu apud Persas constans est sententia. Testis est Theopompus apud Laertium (a) ἀβιώσιος κατὰ τὴν μὲν τῆς ἀνθρώπων, καὶ ἰσότης ἀθανάτων, *Majorum sententia resurrecturos homines, immortalesque futuros.*

His, quae hactenus delibavimus, praestat generationis ergo adjicere, quae fusiori calamo tradit Thomas Hyde, cujus ἀκριβοῦς diligentiam in veterum Persarum rebus colligendis atque illustrandis nemo unquam pro dignitate laudabit. Is nimirum totus in eo est, ut ostendat primitivam Persarum gentem unum Deum verum & aeternum coluisse: deinde cum veri Dei cultu Solis & Planetarum cultum ita immiscuisse, ut superstitionis potius, sive immoderatae in eos Planetas observantiae, quam idololatriae redargui possint. Addit praeterea Persas, ut Hierosolymitani ignis ritum imitarentur, perennem in aram ignem asservasse, eumque perquam sacrum in suis Pyreis Sacerdotum ministerio adhibito habuisse: quam tamen pyroduliam civilem duntaxat cultum praefetulisse docet. Tradit etiam primitiva Persarum principia duo fuisse, bonum unum aeternum, cujus nomen *Yezad*, seu *Izad*, & *Ormuzd*, unde apud Graecos, Ὀρμιάδης, malum alterum creatum, *Abreman*, seu *Abriman* dictum, quod Graecis rerum Persicarum Scriptoribus Ἀπυμάνιος.

§. IV.

(a) In Prooemio.

§. IV.

De Sabaeis.

Vetustissima Sabaeorum aetas, qui Arabiam desertam & felicem incolebant, tantis tenebris oblita est, ut eorum eruditionem, si qua ipsi informati fuerint, nisi per conjecturas assequi non liceat. Quamobrem quibus veterum Arabum doctrina curae est, 1. Pythagorae studium exhibent, qui suscepto ad Orientis oras itinere Arabas quoque, teste Porphyrio (a), invisit. 2. Reginam Austri producant, quae ex Sabaea Arabiae regione profecta est, ut Salomonis sapientiam audiret. 3. Magos proferunt novi sideris lumine ab Orientis sedibus excitos, ut natum Regem adorarent, quos Arabas fuisse non levibus argumentis plurimi ostendunt. 4. Zabiorum Sectam proponunt, quae cum remotam suae originis antiquitatem praesferat, Arabicae eruditioni non leve pondus addit.

Verum haec omnia non tanti esse videntur aliis, ut veterum Sabaeorum natio in Philosophicis studiis optime versata esse dicatur. Eorum enim doctrinā hisce limitibus concluditur; in divinandi & somnia interpretandi arte, in sideribus observandis, & potissimum in aenigmatis callide struendis ac solvendis sese exercebant. Ceterum eos despicatui ductos, atque a Graecis indoctae Gentis loco habitos esse nemo diffitetur.

Hinc

(a) *In vita Pythag.*

Hinc 1. Pythagoram apud Arabas divinationes ex avium volatu & garritu didicisse testatur Philostratus (a). 2. Reginae Sabae (si quidem illius Regnum est in Arabia; nam aliis in Aethiopia vel Aegypto collocatur) cum Salomone congressus aperte ostendit veteres Arabes in obscurarum quaestionum problematis confingendis totos occupatos fuisse. Salomonis enim sapientiam per aenigmata multa explorasse dicitur (b). Quod quidem ipsis cum ceteris Orientis Gentibus commune erat. Nullus enim toto Oriente mos fuit pervagator, quam ut proponendis solvendisque quaestionibus vacarent, quae non ex Philosophiae penetralibus petitae, sed ejusmodi erant, ut in ipsarum solutione aut acuminis aut eruditionis specimen appareret. Hinc sua convivia hujusmodi aenigmatum condire solebant. Samsonis problema in epulis nuptialibus refert Scriptura (c). Ab Orientalibus ad Graecos aenigmatum studium propagatum fuit, quae ipsi *γνῶσις* vocitabant. Eorundem multa in medium affert Athenaeus (d).

3. Magi qui Hierosolymam nato Domino petiisse dicuntur, astrorum cognitione praedicantur. Eos praeterea non ex Arabia, sed ex Persia venisse post Petavium ostendit supra laudatus Hyde (e). 4. Zabiorum secta veteribus omnibus ignota, cujus primus Muhammedes, Arabesque post

(a) *In vita Apoll. lib. I. cap. 14.*

(b) *III. Reg. X. 1.*

(c) *Judic. XIV. 12.*

(d) *Dipnosoph. Lib. X. cap. XIV.*

(e) *De Religion. vet Persar. Cap. XXXI.*

post ipsum mentionem injiciunt, II. aut III. Ecclesiae seculo exordium habuit: uti pluribus ostendit Bruckerus (a).

Ceterum quod ad Sabaeorum religionem attinet, eos Solem & sidera coluisse dubitari non licet. Hujusmodi enim cultus apud Orientis populos antiquissimus est.

Alterum quoque vitae statum, ac animi immortalitatem professi sunt. Quae sane dogmata, aliaque ad morum institutionem spectantia axiomata carminibus consignasse fertur quidam Lokmannus inter omnes Arabes celeberrimus, quem Davidi *دومخمان* volunt (a). Hic fabulas Aesopaeis simillimas conscripsit; idcirco a nonnullis Aesopus ipse creditus est (b).

§. V.

De Phoenicibus.

Phoenices, qui longe lateque vagati plurimas per Europam deduxere Colonias, tanta nominis celebritate per totum fere orbem noti fuere, ut ab ipsis litteras inventas, Nauticam, atque Astronomiam Veteres profiteantur. Inter Phoenices antiquitate & doctrina praestantes laudantur *Moschus*, *Cadmus*, & *Sanchuniathon*.

De Moscho Phoenice primus meminit Posido-

(a) *Tom. I. pag. 216. Tom. III. pag. 124.*

(b) *Erbelot Bibl. Orient.*

(c) *Hist. des Romans.*

donius Stoicae familiae Philosophus, & systematis atomistici auctorem fuisse narrat. Posidonii testimonium exhibent Strabo (a), qui ante bellum Trojanum Moschum vixisse tradit; & Sextus Empiricus (b). Verum Athenaeus (c), alii-que Moschum quemdam *τὰ φθίνια*, seu de rebus Phoenicum scripsisse testantur.

Hinc Eruditorum controversiae, num primus idem, atque alter fuerit; num eorum *ταυτότητα* identitate statuta, rectius Moschus an Mochus dicatur; num tandem Physicae corpusculari praeluserit. 1. Fere omnes duos illos Mochum & Moschum pro uno homine habent. Quamvis nihil impedire videtur Moshemio (d), quominus duo inter Phoenices Mochi esse potuerint, quorum alter res patrias illustraverit, alter naturam speculatus sit. 2. *Mochum* Bochartus (e), alii-que; *Moschum* cum ceteris Calaubonus (f) rectius dici tuentur. Forte nominum discrimen a diversa pronuntiatione profectum est, addito a Graecis sibilo. 3. Atomorum doctrinae fundamenta jecisse Moschum hunc Phoenicem Posidonii potissimum auctoritate ductus arbitratur Cudworthus (g). At Posidonii fidem in dubium

re-

(a) *Geograph. Lib. XVI.*

(b) *Lib. IX. adversus Mathem.*

(c) *Dipnosoph. lib. III.*

(d) *Ad Syst. Int. Cap. I. §. X. n. 1.*

(e) *Geogr. S. P. II. Lib. II. cap. 7.*

(f) *Ad cit. loc. Athenaci.*

(g) *Loc. cit. n. d.*

revocant alii, quam suspectam habuerunt Veteres ipsi, inter quos Cicero *quaedam* illum *con-*
minisci conqueritur (a). Dignae sunt, quae le-
gantur Bruckeri in hanc rem animadversiones (b).

Cadmus, quem Marhamus Aegyptium, Bo-
charthus vero cum plerisque Sidonum fuisse con-
tendit, Graecarum litterarum inventionem nomen
sibi comparavit, quas Thebis conditis ex Phoe-
niciis litteris effinxit.

Sanchuniathonem ante Trojana tempora flo-
ruisse; resque Phoenicias memoriae prodidisse au-
ctor est Philo Byblius, qui Adriani aevo vixit,
atque illius libros ex Phoenicia lingua in Grae-
cam transtulit. Graecae hujus versionis ἀποσπασ-
ματῶν *quaedam* superiunt apud Eusebium (c),
aliosque. Dissident inter se Eruditi, num ge-
nuina sint isthaec Sanchuniathonis fragmenta.
Bocharto, atque Huetio eorum γνώσις *proba-*
tur. At duo Henrici alter Urbinus, Dodwellus
alter *ῥιθμῶν* in ipsis odorati, Philonis figmentum
esse existimant.

Juvat nonnulla ex argumentis, quae Sanchu-
niathonis fragmentum *ῥιθμῶν* arguunt, leviter
perstringere: ut in hoc venerando remotae, ut
arbitrantur, antiquitatis cinelio mirifice sibi
plaudere desinant nuperi quidam nostrae Religio-
nis impudentes ineptique irrisores. 1. Primus
sane, qui elaboratae a Philone hujus versionis
me-

(a) *Lib. I. de Fato.*

(b) *Tom. I. p. 231.*

(c) *De Praep. Evang. L. I. cap. 9.*

meminerit, est Porphyrius, [si unum excipias [a] Athenaeum] qui Christiani nominis juratus hostis, Sanchuniathonis fragmentum aptum esse duxit, quod sacris libris objiceret. At vel ipsum Sanchuniathonis nomen inauditum fuit omnibus Scriptoribus, qui Porphyrium praevivere, & qui in Phoeniciae viciniis floruerunt, atque hujus regionis antiquitates rimari satagebant. Justinus Martyr, qui Samaritanus erat, Tatianus Afsyrius, qui pluries Phoenicum historicos laudat, Theophilus Alexandrinus, Tertullianus, Origenes de Sanchuniathone prorsus silent. Quin & post Porphyrii aetatem, si unus excipiat Eusebius, neminem reperies praeterea, qui Sanchuniathonis fragmenti meminerit. Theodoretus quidem & Cyrillus Alexandrinus ab uno Eusebio hujus fragmenti notitiam edocti sunt: atque hic memoria vacillans Clementem Alexandriae, non autem Eusebium laudat, & loco Philonis Byblii Josephum Graece Sanchuniathonis opus reddidisse adserit. Horum propterea testimonium caussae, de qua agitur, nihil favet.

2. Altum praeterea illorum silentium, a quibus nec Sanchuniathonis opus ignorari, nec praetermitti verosimilius potuit, facilem dubitandi aditum praebet, quin illud verum sit ac genuinum. Mirari enim subit, nullam hujus operis mentionem injecisse veteres illos Scriptores, quos Josephus memorat, Hieronymum Aegyptium, Menandrum Ephesium, Dium, Hestiaeum, Phi-

[a] *Dipnosoph. lib. III. cap. XXXVI. Ubi tamen Σανκυνιάθων pro Σαρχυνιάθων legitur.*

Philostratum &c. qui in veteribus Phoenicum monumentis colligendis occupati, ea Graece red-
dita publico usui destinaverunt. Qui factum est,
ut tam illustre opus eorum diligentiam effuge-
rit? Sed, quod magis mirere, vel ipse Josephus
nihil de Sanchuniathone audiit: ille, inquam,
Josephus, qui non paucos Phoenices Historicos
laudat; qui Phoenicum tabularia, unde plura
deprompsit, se excussisse testatur; qui tandem
litterarum αὐτόρραφα laudat, quae ultro citroque
Salomonem inter & Hiram commearunt, cujus
patri opus suum Sanchuniathonem inscripsisse
volunt.

3. Platoni itidem & Pythagorae inditus San-
chuniathon. Atqui plura ipsi inter Phoenices
rimati sunt, praesertim Pythagoras, qui cum
Moschi nepotibus saepe congressus est. Quin-
cum Macedones Phoeniciam subegerunt, Mo-
chus, Theodotus, atque Hypsicratus Historici
Phoenices Graece Laeti opera redditi sunt, re-
ferente Tatiano [a]. At ignotus inter Phoeni-
ces Sanchuniathon, cujus opus per summam in-
juriam neglexissent Graeci.

Phoenicum doctrina, quod ad Cosmogoniam
attinet, qualem nobis exhibent Sanchuniathonis
fragmenta, ad haec capita revocari potest.

1. Ex omni aeternitate caliginosum quem-
dam fuisse aërem, spiritum quodam secundum, &
simul turbidum: rudē atque indigestum Chaos.

2. Spiritum hunc amore Chaëos exarsisse, at-
que idcirco sese cum illo copulasse; quam spi-

Tom. I.

C

ritus

[a] *Orat. ad Graec. p. 128. Edit. Oxon. 1700.*

ritus & rudis materiae societatem *πονηρ cupiditatem* nuncupabant.

3. Ex hoc veluti conjugio natum esse *Mot*, h. e. mollem quamdam materiam paullo corpulentiores.

4. Hanc nescio quam naturam fuisse rerum omnium seminarium; inde enim non solum orta animantia sensu destituta, ex quibus facta sunt animalia intelligentia praedita, in figuram ovi conformata, quae צופי שמים *Zophe Shamaim*, sive *Zophasemin* vocabant, h. e. *Caelorum exploratores*; verum etiam Sol, Luna, aliaque Sidera.

5. Denique vi ventorum & nubium immensas effusas esse pluvias; atque hinc factum esse, ut aquae hae calore Solis suo loco depulsae in aëra iterum confluentes, conflictu suo tonitrua & fulgura effecerint: quo sonitu animalia excita e limo veluti e somno ubique profiluerunt.

His tandem additur, e vento *Colpja*, & muliere *Baau*, i. e. nocte prodiisse *Aerum*, & *Primogenitum*.

Atque hae Sanchuniathonis reliquiae (si quidem certa est ipsarum *αῖθερτα*) Phoenixes de mundi origine tam nefarie philosophatos esse produnt, ut omnem plane divinitatem exterminaverint. Ut enim animadvertit Moshemius (a), Sanchuniathonis dogma est, rerum omnium initium *ἀέρα ζοφώδη καὶ πνευματώδη* fuisse, aërem scilicet *tenebrososum*, & *spiritu foetum*. Non alium
igi-

(a) *Ad Syst. Intell. Cap. I. §. XXII. & Dissert. de Creat. ex nihilo §. XXVI.*

igitur Deum illi agnovisse videntur, quam spiritum sive vim quamdam electricam per universam materiae molem commeantem. Nam spiritus ille, qui in materiam se insinuasse dicitur, rationis & consiliis expers a Sanchuniathone admittitur, αὐτὸ δὲ πνεῦμα ἐκ ἑστέρου τὴν αὐτὴν κτίσιν, *Spiritus autem suum opus non cognoscebat*, ea nimirum quae ipsius cum materia copulatione con-
sequebantur.

At non desunt qui Sanchuniathonis Cosmogoniam cum Mosaica consentire existimant, inter quos Hugo Grotius [a], Cudworthus, alii-
que. Hinc *Mot*, *Baau*, *Colpia*, aliasque voces, quae apud Sanchuniathonem occurrunt, ex Hebraeo fonte petere conantur. Nam *Mot* ex Cumberlandi [b] opinione ab Arabica voce *Matba*, h. e. *aquis dissolvere* deductum huiusmodi dissolutionem praefert. *Baau* (ut Grotius, Mazochius [c], aliique interpretantur) idem est quod *Bobu* Mosaicum; denotatque ipsiusmet tenebri-
coli Chaeos materiam, sed in partes jam discre-
tam, & ad singula mox formanda corpora vel-
uti paratam. *Colpia* est ipsissimum Hebraicum *Kol-pi-iah*, h. e. *vox oris Dei*, vox illa scilicet Dei imperatrix, per quam omnia principio existi-
terunt, *Primogenitus* est lux, rerum factarum
natu prima. Denique *Aevum* est *Tempus*, quod

C 2

jam

[a] In not. ad lib. de Ver. Rel. Chr. L. I.
§. XVI.

[b] Of the Cosmogonia of Sanchoniaton.

[c] Grot. loc. cit. Maz. Spicil. Bibl. Tom. I.

jam tum procedere coepit, cum ex nocte, & luce primogenita dies primus exstitit.

§. VI.

De Aegyptiis.

Vetustissima Aegyptiorum sapientia magnum sibi apud posteros nomen comparavit, tum quia praestantissimi Graecorum Philosophi eos adire consueverint, ut abstrusiores inde doctrinas haurirent; tum vero potissimum quia ipse Hebraeorum dux Moyses eruditus in omni sapientia Aegyptiorum fuisse in sacris Litteris praedicetur (a). Eruditionis omnis apud Aegyptios origo cuidam *Theuth*, sive *Tboyth*, sive *Tboth*, qui Graecis *Ἐρμῆς*, Latinis *Mercurius* dicitur, vulgo adscribi solet. Veram hujus historiam e fabulis, quibus eam veteres Graeci implicuerunt, difficile admodum est expiscari. Quae porro eruditi viri in medium proferunt, qui vel Adamum, vel Henochum, vel Josephum Aegypti proregem, vel Chanaanum, vel tandem Moysen sub Hermete latere arbitrantur, incerta prorsus sunt.

(a) Nolo autem quis opinetur *Marshami* & *Spenceri* sententiam secutus, Aegyptios antiquitate ceteras quascunque nationes praecessisse, easque ne Israelitis quidem exceptis omnia docuisse, quae Religionem & civilem politiam spectant. Legatur, si lubet, *Hermannus Witzius*, qui commentum istud refutavit, in *Aegyptiaca*, sive de Aegyptiacorum sacrorum cum Hebraicis collatione.

sunt, & non ianixa, levibus conjecturis. Ceterum huius Viri apud Aegyptios celebratissima fama est. Ipsum enim una cum litteris scientias omnes Arithmeticam, Geometriam, Astronomiam, & praesertim hieroglyphicam scribendi rationem invenisse ferunt. Hermetis e Veteribus meminerunt Sanchuniathon apud Eusebium (a), Manethon Sebennaita, qui sub Ptolemaeo Philadelpho floruit, apud Georgium Syncellum (b), & Plato (c).

Alter ab isto apud Aegyptios celebratur Hermes, cui cognomen *Τερμύσιος*, h. e. *Termaximus* impositum est. *Siphoam* ab Aegyptiis appellatum fuisse perhibet laudatus Manethon. Huic scientiarum instauratio atque incrementum adscribitur. Verum ea potissimum de causa suam Aegyptiis ingenii praestantiam probavit, quod Hermeticas columnas, quas nimirum arcanis figuris insignitas primus Hermes reliquerat, interpretatus, mysteria in iis delitescencia veluti e tenebris ad lucem evocaverit. Atque hinc Hermetici libri originem suam arcessunt; quorum tantam fuisse copiam narrat Jamblichus, ut fidem omnino superet. Eorum nonnulli hodie dum exstant, quos recenset Fabricius (d); in iis tamen Platoniorum, ac pseudo-christianorum fraudemprehenderunt non pauci Eruditi.

Ab hisce auctoribus sapientia omnis in Ae-

(a) *Praep. Evangel. Lib. I. cap. IX.*

(b) *Chronogr. p. 30.*

(c) *In Philebo & Phaedro.*

(d) *Biblioth. Graec. Lib. I. cap. II.*

gyptios derivata est, quam sibi concreditam Sacerdotes servabant. Hi enim in antiquis illis figuris aperiendis toti erant, atque Hermetis vestigiis insistentes, praecepta sua figuris atque imaginibus vestire in more habebant. Hujusmodi imaginum reliquias nobis exhibet Mensa Isiacae, quae hodie exstat Taurini penes cellissimum Sabaudiae Ducem; ejusque exemplum expressum in lucem edidit Laurentius Pignorius, atque eruditum Commentarium subjecit.

Ex hac porro disciplina, quam *symbolicam* dixeris, illud profectum est, ut duplex apud Aegyptios Theologia distinguenda sit, popularis una, altera ἀρόρητος, *arcana*, quae Sacerdotibus duntaxat, Regibus, aliisque paucis cognita erat. Testantur id Origenes (a), Clemens Alexandrinus (b), aliique.

Quid vero arcana ipsorum Theologia completeretur, non constat inter Eruditos. Nonnulli Atheismini nota Aegyptios inurendos esse existimant, eosque non alios agnovisse Deos statuunt, quam aspectabilem mundum, sidera, hominesque, quos rerum gestarum magnitudo ad Deos evexerat. Id sane Aegyptiis adscribunt Chaeremon quidam apud Porphyrium (c), & Manethon, atque Hecatheus apud Diogenem Laërtium,

(a) *Lib. I. contra Celsum.*

(b) *Strom. Lib. V.*

(c) In Epist. ad Anebanem Aegyptum, quam Jamblichi libro de Mysteriis Aegyptiorum praemisit Theophilus Galeus. Eusebius autem hujus Chaer-

tium, qui (a) hos testes appellans refert, Aegyptiis ἀρχὴν μὲν εἶναι τὴν ὕλην. Θεὸς δ' εἶναι ἥλιον καὶ σελήνην. τὸν μὲν, Ὄσριν, τὴν δ' Ἰσιν καλεσμένην, rerum scilicet initium materiam esse: Deos vero Solem & Lunam: illum Osirim, hanc vero Isin appellatam. Quibus quidem testimoniis adductus, Aegyptios impietatis adversus Deum arguit Eusebius (b).

Verum ab hac impietatis nota Aegyptios liberat Cudworthus (c), atque arcanam ipsorum Theologiam Deum unum prae se tulisse ait, qui rerum omnium parens, mundique aedificator fuerit. Haec autem tum ex Hermeticis libris colligit, quos licet omnes genuinos esse negat, at eorum quosdam in Aegypto fuisse exaratos, atque Hermetis dogmata comprehendere tuetur: tum vero ex non paucis Veterum testimoniis; quos inter Plutarchum audire praestat, qui (d) Aegyptios τῷ πρώτῳ Θεῷ, principi Deo supplicasse; & ritus omnes, quibus Isidem ipsi colebant, eo intendisse narrat, ut τῷ πρώτῳ, καὶ κυρίῳ, καὶ νοητῷ γινώσκῃ, primi scilicet, domini, & quem sola mente intueri licet, cognitionem sibi compararent.

Hic autem de Aegyptiorum Theologia statuere aliquid veri similius, valde operosum esse.

C 4

cen-

Chaeremonis verba laudat cit. loc. Praep. Evang. Lib. III. cap. IV.

(a) System. Intell. Cap. IX. §. XVIII.

(b) Praep. Evang. Lib. III. Cap. IV.

(c) System. Intell. Cap. IV. §. XVII.

(d) In lib. de Iside & Osiride.

cenſeo . Neque enim nova eſt iſthaec diſſenſio de veterum Aegyptiorum religione , ſed quae jam tum a Plutarchi aevo exarſit , cujus ſpeciem quamdam nobis exhibet ipſius liber de Iſide & Oſiride . Quae docti quique Viri de Aegyptiis attulere , hic proſequi non patiuntur Synopſi Hiſtoricae , quam conſcribimus , conſtituti limites . Conſulantur , ſi lubet , Bruckerus [a] , & praefertim Moſhemius , qui rem propius attigſſe videtur [b] .

Illud tamen non eſt praetereundum , quod pugnantes huiusmodi ſententiae a nonnullis hoc pacto conciliari poſſe videantur , ſi nempe diſcriminis locorum ratio habeatur . Nam aliud religionis ſpecimen inferioris Aegypti regiones , aliud Thebaidis ſuperioris incolae prae ſe tulere . Illic varia idololatriae genera obtinebant . Hic vero Deus ſummus , & immortalis ſub nomine *Chepb* colebatur ; atque ob eam rationem minime ipſi pro ſacrorum animalium victu perſolvebant , quidquid aliis idololatriſ imperabatur , uti teſtatur Plutarchus [c] .

Arcanae Aegyptiorum Theologiae doctrinam de hominum animis , & mundi origine ſubnectemus . Atque Animos quidem perennes & immortales habitos fuiſſe , docentibus Herodoto [d] , aliisque ,

[a] *Hiſtor. Philoſ. T. I. p. 284.*

[b] *Not. 158. ad Cap. IV. §. 18. System. Intell.*

[c] *In lib. de Iſide , & Oſiride .*

[d] *Lib. II. cap. 123.* Aegyptii primi exiſterunt , qui dicerent animam hominis eſſe immortalem .

que, explorata res est. At quid de ipsorum conditione, ubi corpore soluti sint, senserint Aegyptii, definire facile non est.

Herodotus [a] enim, Hecatheus, & Aristagoras apud Laërtium [b] in ea ipsos fuisse sententia narrant, ut animos in brutorum animalium corpora transire, & per tria annorum milia vagari per singula animantium genera, ac tandem rursus hominis corpus repetere existimarent. At his adversantur, quae Porphyrius & Plutarchus referunt. Hic [c] enim ait Aegyptios subterraneum locum, in quem putant animos a morte ferri, *Amenthem* vocare, h. e. dantem & accipientem, ab Hebr. נתן *natan*, *dedit*, ut ἔτιμολ γὰρ Bocharthus [d]. Ille [e] vero defunctorum hominum animos primum in Solem & sidera transferri, tum Deorum contubernales fieri Aegyptios sensisse refert.

Quod vero ad Cosmogoniam attinet: Aegyptios materiam aeternam censuisse patet ex Laërtio, cujus superius verba recitavimus. At quod mundum originem habuisse existimaverint, testatur idem Laërtius; addit enim τὸν κόσμον γενεὴν, ἢ φθαρτὸν, mundum ut ortum, ita interiturum. Hujus autem fabricationem non casu & fortuito, sed Deo moderante factam, eos docuisse inde colligit Cudworthus, quod Simplicius, quae

Mo-

[a] Loc. cit.

[b] Id Prooemio.

[c] De Isid. & Osir.

[d] Defens. adversus object. Salmasii Resp. 3.

[e] De Abstinent. Lib. IV. §. 10.

Moses de rerum natura a Deo constituta refert, *μῦθος Αἰγυπτίους commenta esse Aegyptia affirmaverit.*

Totam autem Aegyptiacae Cosmogonias rationem Diodorus ad haec capita revocat:

1. Ante Caelum, Terramque conditam unum fuisse totius naturae aspectum, permixtam scil. & indigestam materiam, aëris nebulosi instar.

2. Κράτος ἐν-εργῶν καὶ ἀγαθοῦς, i. e. numen quoddam efficiens, & beneficum aërio chaos confusum, omnem huic motum, & vitalem calorem impertivisse. Porro Aegyptii Materiam nomine *Isidis*, numen vero materiam agitans nomine *Osiridis* consecrarunt.

3. Aërium id Chaos vehementi motu agitatam in diversas naturas abiisse. Quidquid enim maxime igneum, ac leve fuit in sublime se extulit, effecitque Aethera, unde genita sunt sidera. Reliqua vero uvida, & coenosa materia propter gravitatem in imum locum confluit: ejusque partes tenuiores, continuato motu, in unum coactae *Aquam*; corpulentiores vero ab aestu solis & perflantibus auris sensim duratae *Terram* constituerunt.

4. Mundo huic multiplex ab eluvionibus, & exustionibus impendere exitium, ejusdemque varia per intervalla futura ἀποκαταστάσεις renovationes (a).

Vulgaris Aegyptiorum Theologia, qualem nimirum publica populi religio praeferebat, foedif.

(a) Diod. quod Euseb. de Praep. Evang. lib. I. c. 7.

diffima superstitione erat inquinata . Tam enim insana Deorum multitudo abundabat Aegyptus, ut non solum bestiis , iisque horridioribus , verum & rebus inanimis cultum impenderit . Hinc Juvenalis [a]:

*Quis nescit, Volusi Bithinice, qualia demens
Aegyptus portenta colat? Crocodilon adorat
Pars haec: illa pavet saturam serpentibus
Ibim:*

*Effigies sacri nivet aurea Cercopithecii . . .
Illic coeruleos, hic pisces fluminis, illic
Oppida tota canem venerantur, nemo Dianam.*

*Porrum & caepe nefas violare, ac frangere
morsu.*

*O sanctas gentes, quibus haec nascuntur in
hortis*

Numina!

Mirum est quantum & Veteres & Recentiores diligentiae adhibuerint, ut tam portentosae religionis causas eruerent . Praecipuas aliorum sententias fuse & *κρίτως* persequitur, suamque profert saepe laudatus Moshemius [b].

Porro ipse primo advertit ejusmodi fuisse animalium cultum in Aegypto, ut quaedam universae nationi, quaedam vero certis oppidorum incolis sacra fuerint . Praeterea illa ejus fuisse naturae, ut multum Aegyptiis utilitatis afferrent; haec autem neque utilia, neque noxia, aut nonnunquam exitiosa . Ac tandem quae ab omni-

[a] Sat. XV. v. 1.

[b] Loc. superius cit.

omnibus colebantur animalia, nulli hominum poena capitis violare licuisse.

Cum ea igitur fuerit Aegypti consuetudo, inde ortum esse bestiarum cultum autumat, quod cum Reges civium emolumento prospicere velent, non modo legibus cavere, ne vim bestiis utilibus inferrent, verum & religione leges communire saterint: Sacerdotum opera adhibita, qui Diis certas sacras esse bestias in vulgus disseminarent. Ex qua quidem populi opinione factum esse ait, ut singulae deinde provinciae suis peculiaribus Diis certa quaedam animalia dedicaverint, quibus illos oblectari arbitrarentur.

Bestiarum vero noxiarum cultum in Aegyptum inductum existimat, postquam Persarum, qui Aegyptum occuparunt, de Deo bono & malo opinionem adoptavere. Metus enim maligni Numinis eos impulit, ut immanes & feras beluas, quarum amore illud duci sibi persuadebant, venerarentur. Atque haec sunt Cl. Moshemii conjecturae.

§. VII.

De Indis & Sinis.

I. **I**NDOS ultimo loco inter Orientis populos reconsemus, licet post Persas, quibus sunt finitimi, invisendi fuissent; ipsorum enim philosophica dogmata e variis, quas nonnulli in hisce regionibus peregrinati retulerunt narrationes, vix aut ne vix quidem licet expiscari. Alii enim alia nobis venditant, quibus nostra fere

fere memoria Indos adire licuit. Quidam eos perhibent aeternam mundorum sibi succedentium seriem admittere. Sunt qui tradunt illos statuere Deum, cum mundum condere vellet, materiam ex ipsa sua essentia, instar araneae fila e sinu suo educentis; extraxisse.

Quae autem refert Abrahamus Rogerius, ut alios omittamus, omnino ab his discrepant. Ita enim ait *Brachmanes*, seu *Bramines* (quo nomine Indorum Philosophi nuncupantur) de Deo rerumque origine sentire. Unum summumque Numen esse, quod appellant *Vishnou*. Hoc alium produxisse Deum nomine *Bramam*, genitum nimirum ex flore, qui immensa in abyssu ante res conditas nataverat. *Bramam* deinde, hanc illi supremo Numine potestatem impertiente, rerum naturam procreasse.

Atque haec de Brachmanum opinionibus tradunt Recentiores. Longe diversa nobis transmiserunt Veteres, qui, postquam Alexander M. everso Persarum imperio victricia arma Indiae intulit, de hisce populis aliqua audire potuerunt. Nonnulla de veterum Brachmanum placitis apud Strabonem (a), Plutarchum (b), & Pseudo-Origenem (c) consignata habemus. Exstant praeterea duo libri, ubi dedita opera res Indiae pertractantur, quorum alter titulum praefert *De Gentibus Indiae & Brachmanibus*, qui Palladio Lausacae Historiae Scriptori a Caveo adscribitur,

(a) *Geogr. Lib. XV.*

(b) *In Vita Alexandri.*

(c) *Philosophum. cap. 24.*

tur, sed renuente Casimiro Oudino: alter inscriptus *De Moribus Brachmanum*, quem D. Ambrosio olim tributum, ipsi abjudicandum esse censuerunt Maurini Patres.

Porro Strabo, sive potius Megasthenes apud ipsum, ita Brachmanum scita de Mundi Deique natura exponit. Mundum, ait illis & ortum & corruptionis obnoxium, & conglobata figura praeditum videri: Deum autem conditorem & administratorem ejus totam molem pervadere. Quibus similia fere sunt, quae apud Pseudo-Origenem leguntur. Inquit enim Deum corporeum esse & vestitum corpore suo eodem modo, quo quis gestit indumentum ex pellibus ovinis. Atque addit Deum esse lumen, non qualis Sol aut ignis, sed esse Deum λόγος, non articulatum sermonem, sed illud cognitionis, cujus ope occulta mysteria cernantur a sapientibus.

Unde colligere est eam fuisse, hisce referentibus auctoribus, veterum Brachmanum sententiam, ut Deum opinarentur lumen quoddam esse intellectuale instar animae per omnes mundi partes sic fufum, quasi mundo veluti corpore induatur.

Ab hac etiam sententia minime discrepant, quae afferuntur ex recondita illa, studioque incredibili asservata antiquissimorum librorum sylloge, quam *Vedam* nominant, & quam veluti totius sapientiae, ac religionis regulam venerantur hodie Bramines. In hujus quadripartiti Operis libro primo, in quo doctrinam de Deo, & Mundo contineri ajunt haec legi testatur Cl. Bouchetus in Epist. ad Dan. Huetium: In exordio

dio rerum nihil exstitisse praeter Deum, & A-
quam; Deum autem summis aquis innataſſe.

Sed & altera rerum origo ab alio ſacro libro
Shajler deducta memoratur. Deum nempe prin-
cipio quatuor Elementa creaffe, quae cum inter
ſe commiſta eſſent, a Dei potentia fuere diſjun-
cta. Cumque per ampliſſimum tubum ſupra
aquaſ flaret, tenuiores expanſae, ac diſtentaе in
Ovi formam ſe conglobarunt. Inde orta Caelo-
rum immenſa ſpatia. Ex craſſioribus vero glo-
bus rotundus emerſit Terra, & Oceano conſtans.
Tum ſidera, & animantia creata ſunt, donec
ex Terrae viſceribus primos parentes Deus edu-
xit, quorum nomina *Pourous*, & *Porcoutze* [a].

Jam vero de hominum animis, ſi *Palladio*
fidem adjungere velimus, haec erat *Brachmanum*
ſententia. Originem humanae Mentis eſſe caele-
ſtem, e Deo genitam eſſe, atque e corpore di-
ſcedentem ad eum redire. Quod quidem fuit
ex illa *Brachmanum* de mundi anima opinione.

II. Ultra Indiam nobis occurrit ampliſſimum
Sinarum imperium, quorum in *Philosophicis*
ſtudiis eruditio tam eloquentes oratores naſta
eſt, ut horum judicio veluti abſolutiſſimum *Phi-*
loſophiae ſpecimen proponi poſſit; & *Confucii*
nomen aeternae famae commiſſum eſſe videatur.
At qui nec praepudiciis, nec privatis ſtudiis ab-
repti *Sinarum* res inveſtigarunt; vix aliquod ve-
rae *Philosophiae* veſtigium apud ipſos deprehen-
derunt.

Qui *universalem Historiam* inter Anglos con-
di-

[a] *Lord de Relig. Bandiana.*

diderunt, hanc Sinenſis Theologiae ſummam tradunt. Eſſe nimirum ſupremum Deum, caeli terraeque dominum, rerum omnium providum adminiſtratorem: hunc ex Chao omnia procreaſſe, quae concreta ſunt & materia conſtant: Chaos autem duplicis eſſe generis: alterum occultum ſeu minus perfectum, quod *Yn* appellant: alterum patefactum ſive perfectum, dictum *Yang*, ſeu *Yam*: haec duo principia in duo rursus alia abire, atque ex his porro quatuor exſiſtere, haec vero in octo alia dividi, atque ita porro in alia multa.

Verum qui ſe Jeſuitas appellabant, & Conſucium ediderunt, hodiernos Sinarum Philoſophos tradunt (a) primum rerum omnium principium appellare *Tai Kie*, quo nomine *meram materiam primam* indicari ajunt: atque inde concludunt, *clare ſatis intelligi poſſe aeternitatem eos quandam rerum orientium occidentiumque antecedentem agnoſcere numeroſo illo annorum curſu, quem huic mundo tribuunt, infinitis vicibus repetito*. Hinc iisdem docentibus profanis potius Dei negatoribus, quam ſapientiae conſultis Sinaſ accenſere oportet.

At negant viri praetantiſſimi, inter quos Bayerus (b), Sinarum majoribus idem, quod his, viſum eſſe, eamque de rerum origine ſententiam ab exteris Philoſophis ac potiſſimum Indis inventam volunt. *Prifci illi mortales*, ait laudatus Auctor,

(a) *Declarat. Prooemial. ad Confuc. P. II. §. I.*

(b) *Comment. Origin. Sinicar. §. III. pag. 272.*
 & ſeq. *Muſei Sinici T. II.*

Autor, nihil de mundorum verumque aeterna vicissitudine audiverant: ferebant enim hoc Tay Ku (a), quod caeli terraeque ortus antecesserat, tranquilum atque quietum rerum omnium chaos continuasse, donec impulsu quodam motum formam indueret. Et Sinarum vetustissimos eam tenuisse sententiam demonstrare nititur, ut ex aqua, tanquam materia, rerum formam productam esse arbitrarentur.

Quinque apud Sinas veluti Canonici libri celebrantur, quos vetustissimae antiquitatis esse jactant, *Kingths* appellati. Illorum primus, *I Kingth* dictus, quatuor & sexaginta figurarum, quae *Fohio* tribuuntur, tabulam complectitur: tum adjectae sunt harum figurarum interpretationes, auctoribus *Vouwang*, & *Tcheou Kong*, qui tertiae Dynastiae primi Imperatores fuerunt: ac tandem in haec duo capita Confucii commentarii accedunt. Alter *Yu Hingth* res gestas, quae posterorum memoriae dignae visae sunt, comprehendit, jam tum cum *Yao* & *Chune* Sinicae gentis legislatores regnarunt. Carminum collectio, quae in tertia Sinarum Impp. Dynastia scripta fuere, prostat in tertio volumine *Chi King*. Quartus vero *Tsunchiou* Confucii aetate exaratus, historiam exorditur ab anno nono & quadragesimo

Tom. I.

D

Im-

(a) *Observat laud. Auctor ex libello Siao ul lun, h. e. parvorum liberorum institutio, antiquissimos gentis hujus sapientes vastam illam aeternitatem ante rerum principia existentem dixisse Tay Ku, summam vetustatem, sive Puen Ku, primam antiquitatem.*

Imperatoris *Pinwang*. Tandem quintus *Lixi* legum & vitae civilis rituum compendium complectitur : Hujusmodi *Kingts*, ut & Persarum supra memorati libri, tum & Indorum *Vedam*, summa sapientiae laude a nuperis Philosophis, quibus profana omnia placent, sacra autem sordent, adeo celebrantur, ut vel Mosis Pentateuco eorum judicio sint anteferendi : sed nuper editi vix digni visi sunt, qui legantur ab homine, qui tempus perdere in deliciis habet ; sunt enim absurditatum & ineptiarum pleni.

Paucis heic praeterea eos recensere juvat, quos veluti fulgida patriae lumina Sinica gens veneratur. Et primus quidem *Hobius* sese nobis offert, quem diluvium antevernisse, & primum leges ipsis tradidisse gloriantur Sinae. At ex tabula chronologica, quam a quodam *Nien* magni apud Sinas nominis viro exaratam attulit Franciscus Fouquetus, certam Sinarum originem quadringentis circiter annis Christum natum praecessisse observavit Kortholtus (a). Hunc litteras invenisse, & secretiorem Philosophiam aenigmatibus involutam proposuisse perhibent.

Alter, cujus apud Sinas longe major est fama, nobis occurrit *Confucius*. Hujus & ingenii praestantiam, & in Philosophicis scientiam, & in Deum pietatem *χρηστός* persequi non vacat. Haec de illo apud Sinas perhibentur. Natalem ipsius diem, quem ad quingentos & amplius annos ante Christum revocant, naturae portentis celebra-
tum

(a) *Praefat. ad vol. II. Epist. Leibnitii.*

SYNOPSIS HISTORICA. 51

tum fuisse narrant Sinae . Illum vero addunt , postquam per summam morum innocentiam pueritiam transegisset , totum se in priscorum sapientium libris evolvendis posuisse : uxore deinde ducta publica munera sanste administrasse : tum se magistratu abdicasse , & variis peragratis urbibus , moralis tandem Philosophiae Academia instituta , ter mille discipulos ipsum audiisse . Tres & septuaginta annos natus diem obiit . Tantis illum honoris significationibus Sinae prosequuntur , ut & statuam ipsi statuerint , & singulis noviluniis a magistratibus , & universo litteratorum ordine in Gymnasiis Confucianis sacrificium ipsi hodiedum immoletur .

Post Confucium florere *Li Lao Kiun* , & *Mencius* . Ab illo originem habet Secta , quam *Tao* Sinae appellant , Confucianae disciplinae vehementer adversa . Hunc vero morum quidem integritate inferiorem , at ingenii acumine & eloquentia Confucio superiorem fuisse praedicant Sinae .

Celebriores Sinarum Philosophos recensuimus . Qui plura nosse amat , adeat Bruckerum (a) .

§. VII.

De Celtis , Scythis , atque Etruscis .

Temporis angustiae incepto itineri praescriptae in Orientis oris amplius nos immorari non sinunt . Per florentissimas Europae regiones iter aggrediamur . Hic autem Celtarum ,

D 2

Scy-

(a) *Hist. Philos. T. IV. parte II. p. 846. & seq.*

Scytharum, atque Etrulcorum populis cursim perlustratis, Graecos invisere in animo sedet.

I. Porro Celtarum nomine Britannos, Gallos, Germanos, Hispanos denique more veterum intelligimus. Qui vero primum inter has gentes sese nobis exhibent, sunt *Druides*, quo nomine eruditos Celtarum appellatos fuisse novimus (a). Quae sit autem hujus nominis sententia plane non liquet. Vir Cl. Vossius (b) ab Hebr. דָּרַס *daras*, quod est *consulere*, *exquirere* derivat; unde דָּרַשׁ *darus*, *qui consulitur*; quae vox congruit nomini *Druis*. Sed quoniam ex Veterum testimoniis constat Druides in quercetis suos celebrasse conventus, atque eximio cultu quercus prosecutos esse; hinc a voce *Deru*, quae apud Celtas *quercum* denotat, Druidum vocabulum proficisci quamplures existimant.

Dru-

(a) *Verum Strabo lib. IV. p. 136. tria inter Gallos Philosophorum genera distinguit. At enim: Apud universos fere tria sunt hominum genera, quae in singulari habentur honore: Bardi, Vates, & Druidae. Horum Bardi hymnos canunt, Poëtaeque sunt. Vates sacrificant, & naturam rerum contemplantur. Druides praeter hanc philosophiam, etiam de moribus disputant. De horum justitia summa omnium est opinio. Itaque & publica iis & privata judicia committuntur: & aliquando causis bellorum disceptandis, jam acie congressuros composuerunt. Maxime judicia de caede iis commissa sunt.*

(b) *Animadv. ad Caesaris Comment. Lib. VI. cap. XIII.*

SYNOPSIS HISTORIAE. 53

Druidum munja, auctoritatem, & disciplinam nobis transmisit Julius Caesar, quem audire praestat, ut Celtarum philosophiam perspectam habeamus. Is quidem ait (a) Druides *rebus divinis interesse, sacrificia publica & privata procurare, religiones interpretari*. Deinde subdit tanto apud populum eos esse honore, ut *de omnibus controversiis, publicis privatisque, constituent*. Quod si quis aut privatus aut publicus eorum decreto non stetit, *sacrificiis interdicitur*. Ad haec poenam gravissimam statutam esse in eos, quibus ita est interdictum. Nam *ii numero impiorum ac sceleratorum habentur; iis omnes decedunt, aditum eorum sermonemque defugiunt, ne quid ex contagione incommodi accipiant; neque iis peccatis jus redditur, neque bonos ullus communicatur*.

Docendi methodum, qua usi sunt Druides, idem Caesar exponit. Ad eos ait *magnum adolescentium numerum disciplinae causa concurrere, qui a propinquis parentibusque mittuntur*. Praeterea illos, qui in disciplinam conveniunt, *magnum numerum versuum ediscere: neque fas esse ea, quae discunt, litteris mandare: ne forte in vulgus disciplina efferretur, ut ipse Caesar conjicit*. Nomine autem *versuum*, de quibus hic Caesar, nonnulli intelligi ajunt involutos verborum sensus: quod quidem Druidibus peculiare fuisse observat Laërtius (b); eos enim *ἀνυμνητοὺς*

D 3

(a) De B.G. Lib. VI. cap. XIII.

(b) In Prooemio.

ἀποφαινομένης φιλοσοφίας, obscure & per sententias philosophatos fuisse narrat.

Quae vero Druides docerent, tradit idem Caesar. In primis hoc volunt persuadere, non interire animas, sed ab aliis post mortem transire ad alios. Atque hoc μεταμύχωσης dogma in causa est, quamobrem Celtae in praeliis metu mortis neglecto animae prodigi esse viderentur; de qua quidem fortitudine non pauci Veteres meminerunt.

Addit Caesar: Multa praeterea de sideribus atque eorum motu, de mundi ac terrarum magnitudine, de rerum natura, de Deorum immortalium vi ac potestate disputant, & juventuti tradunt. At quatenus fuerit de Dei rerumque universitatis natura Druidum sententia Caesari latuit.

Verum in opere quodam, cui titulus *Edda* (a), & quod veluti codex est Celticae Mythologiae perhibetur fuisse in *Aurora seculorum* Deus quidam

(a) Seculo XII. incunte Semundus quidam Sigfussonius vetusta septentrionalium regionum monumenta summo studio invisit; indeque librum *Edda* conscripsit, quae vox Matrem significat. Opus in tres partes divisum est. In prima vetustissima Borealis Philosophia exponitur: in altera, & tertia Ethice, & Magia Odini recensetur.

Seculo vero XIII. Gnorro Sturlesonius aliud *Edda* primo simillimum composuit.

Petrus Besenius anno 1665. primum utrumque *Edda* vulgavit additis suis, aliorumque versionibus, ac adnotationibus.

dam Ymerum nomine, qui in sinu immenso spatii vivebat. Tunc nec Arenam, nec Mare, nec auras, nec Terram, nec Caelos exstitisse. Ginnunga b. e. Profundum sequutum esse Ymerum. Tum astra, Tellurem, plantasque genitas. Filios Boreae duobus lignis repertis Mannum finxisse, qui postea Aschus dictus, & Emlam illius uxorem. Odinum eis animum dedisse, Oënerum intelligendi vim, Loëdurum sanguinem, & venustatem. Hinc tandem Celtas universos ortum habuisse (a). Tacitus Mannum illum etiam nominat, & ex Tuistione Terrae filio natum tradit (b).

Nationem porro Gallorum admodum deditam religionibus esse Caesar tradit: atque obeam causam, subdit idem Scriptor, qui sunt affecti gravioribus morbis, quique in praeliis periculisque versantur, aut pro victimis homines immolant, aut se immolatuuros vovent, administrisque ad ea sacrificia Druidibus utuntur; quod pro vita hominis nisi vita hominis reddatur, non posse aliter Deorum immortalium numen placari arbitrantur. Eos praeterea, quae sane popularis Celtarum religio, Mercurium maxime, Apollinem, Martem, Jovem, & Minervam coluisse refert. Mercurius quidem ab ipsis appellabatur *Teutates*,

D 4

for.

(a) Edda in *Volupsa* stroph. 3. 4. 5. 17. 18.

(b) Tacit. *de morib. Germ.* c. 2. Celebrant carminibus antiquis (quod unum apud illos memoriae & annalium genus est) Tuistionem deum terra editum, & filium Mannum, originem gentis conditoresque. Manno tres filios assignant.

fortasse ab Aegyptio *Tboth* sive *Theuth*, Mars *Hesus*, Jupiter *Thor*, a *taran* i. e. tonitru, unde Lucano *Taranis*, Apollo tandem *Belenus* vel *Belinus*, atque etiam *Abellio*. Hinc Lucanus (a):

*Et quibus immitis placatur sanguine divo
Teutates, horrensque feris altaribus Hesus,
Et Taranis Scythiae non mitior ara Dianae.*

II. Antiquiores Scythas licet ingenio rudes, sanctissimis tamen moribus fuisse Veteres ad unum omnes testantur. Quamvis autem praeter vitae innocentiam nulla apud Scythas Philosophica eruditio obtineret: nonnulli tamen subinde inter eos florere, qui Graecorum admirationem in se converterint. Ii sane sunt *Abaris*, de quo mira praedicant mythologi: *Anacharsis*, quem carmine heroico de legibus Scytharum, de victus frugalitate, & de re bellica scripsisse narrat Laërtius, qui paucis ipsius vitam exponit (b). Praeterea *Toxaris*, quicum familiariter usum fuisse Solonem, postquam Athenas sapientiae causa venisset, narrat Lucianus (c). Ac tandem *Zamolxis*, quem Pythagorici praeceptoris sui servum fuisse dictitant: at longe illum Pythagora antiquiorem Herodotus, aliique esse contendunt.

Quod vero attinet ad Scytharum Theologiam, eos Dei cognitionis expertes non fuisse vel ex eo arguitur, quod Abarim *Oracula Scythica*, & *Theogoniam* scripsisse Veteres tradunt. Mentis etiam humanae immortalitatem credidisse exploratum

(a) *Lib. I. Pharsal. v. 444.*

(b) *De Vit. Philosoph. Lib. I.*

(c) *In Scythia seu hospite.*

raturum est. Herodotus quidem perhibet Scythas, cum morti proximi sunt, sperare se ad Zamolxim esse perventuros.

Sed praeter Deum Zamolxim alia porro Numina coluisse ex Plutarcho deducimus, qui Anacharsim inducit cum Diis Scythice colloquentem, passimque dictitantem Scythas habere Deos, qui precibus hominum benignas praebeant aures (a).

III. Etruscos divinandi futura artem professos esse Veterum testimonia docent, quam ad Romanos se transmisisse gloriabantur. Quid vero de Deo, mundique origine senserint, non liquet. Cudwortho (b) quidem supremum totius naturae moderatorem, quem nomine *Jovis* colebant, Etrusci admisisse videntur. Cujus quidem rei testem appellat Senecam, qui (c) postquam Etruscorum opinionem de fulminibus exposuerat, addit: *Ne hoc quidem crediderunt, (Etrusci) Jovem, qualem in Capitolio, & in ceteris aedibus colimus, mittere manu sua fulmina, sed eundem, quem nos, Jovem intelligunt, custodem rectoremque universi, animum, ac spiritum, mundani hujus operis dominum & artificem.* At quis Philosopho fidem habebit, qui populorum religionem ex disciplinae suae legibus explicat? ut advertit Moshemius (d).

Sui-

(a) *Plut. in conviv. Septem Sapient. XII. L.*

(b) *Syst. Int. cap. IV. §. XXVII.*

(c) *Nat. Quaest. Lib. II. cap. XLI.*

(d) *Not. 17. ad loc. cit.*

Suidas (a) historici cujusdam Etrusci fragmentum nobis servavit, ubi Scytharum dogma de Cosmogonia exhibetur, quam si cum Mosaica contuleris, plurimum consentire deprehendes, si tempus in rebus condendis a Deo insumtum excipias. Tyrrhenicum enim fragmentum sex annorum millia ante formatum hominem praeteriisse docet. Ex qua Etruscorum doctrina colligit Moshemius (b) aeternam illos statuisse materiam, e cujus quidem inertia tantae tarditatis in Dei operibus causa repetenda esse videtur. Tyrrhenicam hanc *Κοσμογονίαν* eruditis notis illustratam vide sis apud Cl. Mazochium (c).

§. IX.

De Graecorum Philosophia Mythologica.

GEntes, quarum haec Philosophiam scrutati sumus, barbaras Graeci appellabant. At barbaris hisce populis eruditionem suam acceptam referunt Graeci. Divinarum enim, atque humanarum rerum cognitionis semina Phoenices, Aegyptii, aliique Graeciae intulerunt; quae paullatim utpote benigniori terrae commissa in tam uberem segetem succrevit, ut innumeri praestantissimi Philosophi inde prodierint.

Prima autem Graecae Philosophiae initia ejusmodi fuerunt, ut sacrae praesertim doctrinae arcanis

(a) In *Lexico V. Τυρρηνία*.

(b) *Dissert. de Creat. ex nihilo* §. XXVII.

(c) *Spic. Bibl. T. I. de Tit. Gen. Sect. II.*

canis fabulis involvèrentur, quae externo, quem praeferebant sensum, plebis ingenio erant accommodatae. Hanc propterea Philosophiam *Mythologicam* appellamus, quam potissimum prosecuti sunt vetustissimi Poëtae, quos usque ad septuaginta recenset Fabricius (a). Celebriores vero, qui majorem Graecae Philosophiae infantiae splendorem conciliarunt, praedicantur Orpheus, Hesiodus, atque Homerus; ut Linum Orphei praeceptorem, Musaeum Orphei discipulum, Amphionem, aliosque silentio praetereamus.

I. Orpheus Mythologicae Philosophiae princeps unanimi consensione a Veteribus salutatus, genere Thrax fuisse fertur; qui postquam ex Aegyptiis arcanam sapientiam hausisset, teste Diodoro Siculo (b), in Graeciam venit, atque in eam *γράμματα καὶ στίχων*, ut habet epigramma vetus apud Fabricium (c), eruditionem scilicet omnem importavit. Sunt qui nusquam terrarum Orpheum exstitisse credunt, unius Aristotelis auctoritate ducti, qui referente Cicerone (d) Orpheum fuisse negavit. At multa Veterum monumenta congefferunt Cudworthus (e) & Fabricius (f), quibus Orpheus vere exstitisse demonstratur.

Or-

(a) *Bibl. Gr. Lib. I.*

(b) *Lib. IV. cap. 25.*

(c) *Loc. cit.*

(d) *Lib. I. de Nat. Deorum cap. XXXVIII.*

(e) *Syst. Intell. Cap. IV. §. XVII.*

(f) *Loc. cit.*

Orphei disciplinam non alio e fonte haurire licet, quam e quibusdam *Carminum* laciniis, quae vulgo *Orphica* appellantur. Horum autem γῆρας non omnibus aequè arridet. Daniel quidem Huetius (a) a veteribus Christianis conficta, & ex sacrorum Codicum segminibus consuta esse suspicatur. Grotius vero ad unos Pythagorae discipulos *Orphica Poëmata* referenda esse constituit. At contra quamplures Eruditi licet multa, quae tamquam *Orphica* a Veteribus laudantur, fraudis argui posse concedant; nonnulla tamen eodem loco, atque illa, habenda esse negant. Sunt enim aliqua, quae a Platone, Diodoro, aliisque ut *Orphica* laudantur, & quorum stilus se satis antiquum probat; ea quidem si Orpheum auctorem non habent, *Orphica* tamen dogmata complectuntur, quae ab ipso excepta alii versibus expressa litteris consignarunt.

Si igitur quae in hisce laceris carminum reliquiis continentur, in unum colligas, eam Orphei sententiam fuisse deprehendes, quod aeternum fuerit Chaos; Deus scilicet & materia simul copulata: seu omnia, quae nunc sunt, in ipso Deo fuere recondita. Certo vero tempore Deus ex se sinuque suo materiam illam produxit: atque ita effecit, ut universa, quae mundus complectitur, existerent. Porro ex eodem Deo una cum materia spiritus quidam fluxit, qui per totam materiam fusus eam agitet, atque hominum mentibus originem praebeat. Ita quidem Orphicum

(a) *Dem. Evang. Proposit. IV. num. XIX.*

SYNOPSIS HISTORICA. 61

cum systema exponit Mosh. (a). Quibus affinita sunt, quae de Orphico Ovo narrant Pythagorici, quod Mundi *κεντὸν καὶ αἰθέρα* sive sub intellectum, sive sub sensum cadentis commune receptaculum erat.

Plura de Orpheo proferre instituti ratio vetat. Innuere satis erit, Orpheum lunam ceterosque Planetas perinde atque hanc Terram incoli credidisse; quin unumquodque sidus mundum esse sinu suo terram aërem & caelum comprehendentem. Hanc sane sententiam in Orphicis lectam tradit Plutarchus (b), & ex eo Eusebius (c). Illustre fragmentum praeterimus, quod a quodam Timotheo chronographo Cedrenus attulit; id quidem talem Orphicam *Κοσμογονίαν* exhibet, quae Mosaicae non longo intervallo proxima sit. Profert hoc fragmentum, & more suo illustrat Cl. Mazochius (d).

II. Certarunt olim Grammatici, teste Gellio (e), Hesiodus ne an Homerus aetate praecesserit. At dubium non esse videtur, quin per eandem aetatem ambo floruerint; cum carminibus eos certasse ex antiquis usque temporibus ducta traditione constet: licet certamen illud Eruditis confictum esse videatur. Paulo ante I. Olympiadem Hesiodum vixisse nonnulli ajunt: alii ad IV. Olymp. illius aetatem revocant. Cum
mam

(a) Not. 58. ad Cap. IV. §. XVII. Syst. Intell.

(b) De Placit. Philosoph. Cap. XIII.

(c) Praeparat. Evang. lib. XV. Cap. XXX.

(d) Loc. superius cit. sect. I.

(e) Noct. Attic. Lib. III. cap. XI.

nam Aeolicam hujusce poëtae patriam fuisse auctores sunt Herodotus, Strabo, aliique. Ascræi cognomen apud Graecos adeptus, quod Ascræ Boeotiae vico eductus fuit. Plura scripsit: celebratissima vero est ipsius *Theogonia*, qua Deorum origines prosequitur.

Hac autem Theogonia Eruditorum judicio nihil aliud Hesiodus animo intendisse videtur, nisi ut naturae causas & principia aperiret, quae poëtico more personae veluti habitum induit; unde factum esse iicem viri docti ajunt, ut Deorum turba apud imperitos mirifice augeretur. Et sane summa hujus poëmatis illuc revocatur: nimirum poëta Chæos, Tartarum, Amorem, ceu rerum omnium initia statuit: deinde persequitur, quemadmodum terra & nox a Chæo, æther & dies ex nocte, caelum, montes, lacus ceteraeque hujus universitatis partes exstiterint.

Summa est inter Eruditos disceptatio, num Hesiodus rerum universitati ex Chæo fingendae Deum praefecerit, necne. Negant Petrus Bayle, aliique. At Cudworthus (a) rerum omnium fabricationem Deo Hesiodum tribuisse tuetur. Quod quidem ostendit, tum quod per *Amorem*, a quo Mundi originem repetit Hesiodus, natura intelligatur efficiendi virtute praedita: tum vero potissimum quod Jupiter ab Hesiodo πάντων βασιλεύς καὶ κοίρανος ἀθανάτων, rex omnium, ac dominus immortalium praedicetur. Quinam vero Hesiodum aliosque veterum Theogoniarum scriptores

ab

(a) *Syst. Intell. Cap. IV. §. XIV. & XIX.*

ab impietatis nota liberarint, videri possunt apud Moshemium (a).

III. Homerum ultimo veluti nobiliori loco recensemus, cujus hîc si laudes prosequi aggrederer, in silvam ligna ferrem. Cui enim non dictus Homerus? Non idem porro iudicium de HomERICA praesertim Theologia ferunt Eruditi. Sunt qui nimium severi Homerum impietatis in Deum arguunt. Sunt rursus qui pro illius pietate velis equisque, ut ajunt, decertant. Quos inter nemo vehementior Cudwortho, qui (b) eam praestantissimi Poetae animo sedisse sententiam ostendit, ut unum supremum aeternumque Deum esse statuerit, qui rerum universitatem effecerit, eamque moderetur.

Observat idem diligentissimus veterum Philosophorum scrutator, Deorum turbam, quibus Homeri carmina scatent, genitam ac procreatam illum putasse. Quemadmodum enim Homerus ex Oceano, h. e. ex Chao aquatico, sive fluitante materia rerum omnium initium arcessit, ut cum (c) de Oceano ait,

. . . ὅσπερ γένεαι πάντας τέτυκται.

Ita Deorum omnium originem ex eodem Oceano repetit, cum illum appellat Θεῶν γένεον (d).

At his omnibus Diis Jovem suum praefecit Homerus, quam κατ' ἐξοχὴν Θεῶν appellat; omni-

um-

(a) Not. 3. ad Cap. III. §. XVII. Syst. Intell.

(b) Syst. Intell. Cap. IV. §. XIX.

(c) Ilia. E. v. 246.

(d) Ibid. v. 201. 302.

unque principem ac potentissimum Diis hominibusque imperare, &c. passim praedicat.

§. X.

De Graecorum Philosophia Politica.

Altera Graecae Philosophiae aetas VII viris forentibus obtinuit, quos *Sapientes* Graeci nuncupavere. Hujusmodi appellationis originem satis tritam, quae commentum redolet, non indicamus. Hi autem, ut eos recensent Plauto & Pausanias, fuerunt *Thales*, *Pittacus*, *Bias*, *Solon*, *Cleobulus*, *Myson*, & *Chilon*. Eorum historiam ex Veteribus multi tradiderunt, quorum narrationes collegit Diogenes Laërtius in *De Vitis Philosophorum*.

Singulorum vitam, mores, & studia profsequi non vacat. Legantur Bruckerus (a), Deslandius (b), aliique.

§. XI.

*De Graecae Philosophiae Sectis:**Et primo de Jonica.*

Tertiam Graecae Philosophiae aetatem agredimur, per quam ad maturitatem quamdam suam pervenisse visa est. Et quoniam qui per id temporis apud Graecos fuere Philosophi, cer-

(a) *Hist. Phil. T. I. p. 442.*

(b) *Hist. Crit. de la Philos. Liv. II. chap. IX.*

certas singuli disciplinae formas profecuti sunt ; propterea varias , quas illi composuerant sectas , ex ordine recensebimus.

Primus , qui inter Graecos Philosophicae disciplinae sectam condiderit , *Thales* ille Milesius communi Veterum consensu fuisse fertur , quem inter septem Graeciae sapientes primas habuisse diximus. Hic ex Thelidarum familia inter Phoenices clarissima Mileti in Jonia anno I. Olymp. XXXVI. natus est : defunctus vero Olymp. LVIII. anno ante Christum 546. vel 547. Propterea ab ipso profecta disciplina *Ionicae* nomen invenit.

Thaletem exceperunt *Anaximander* , quem ille populari & sodali vocat Cicero (a) , natus Olymp. XLI. 3. *Anaximenes* Thaletis auditor , item Milesius , quem alii Olym. LV. alii LVI. alii denique LXIII. natum esse statuunt . *Anaxagoras* Clazomenius , natus Olym. LXXI. quem agros & patrimonium suum reliquisse , ut discendi quaerendique divinae delectationi toto se animo dederet , narrat Tullius (b) . Tandem *Archelaus* , quem alii Milesium , alii Atheniensem esse ajunt .

Istorum porro de rerum origine non una erat sententia . Thales enim ex liquida & fluitante materia omnes omnino res comparatas esse dixit. Quod legere est apud Tullium (c) .

Anaximander vero finxit materiam quamdam primam , eamque *ἄπειρον* , h. e. infinitum nun-

Tom. I.

E

cu-

(a) *Lib. IV. Acad. cap. XXXVII.*

(b) *Lib. V. Tuscul. cap. XXXIX.*

(c) *De Nat. Deor. Lib. I. cap. X.*

cupavit, non ignem, non aquam, non terram, non aërem, sed ad haec & reliqua omnia aptam; aut ex omnibus temperatam & mixtam: atque ex ea facta esse docuit & nata omnia. Innumera- biles praeterea inde mundos oriri, eosque modo dissolvi, modo iterum gigni existimavit: ut refert Augustinus (a).

Post Anaximenes primam materiam aërem esse dixit, cujus concretiones, atque extenuationes omnia parerent.

Verum Anaxagoras, quo nemo ornatus totam de naturae exordiis rationem ex Thale- tis discipulis explicuit, infinitam posuit ma- teriae Homoeomeriam, sive partium minutarum & inter se similium infinitam congeriem. Nem- pe magnus hic philosophus Atomos statuit re- vera praeditas variis, illis qualitatibus & formis, quae vulgo corporibus inesse creduntur: itaque esse atomos quasdam osseas, quasdam sanguineas, nonnullas igneas, aliquas humidas, partim al- bas. partim nigras, alias dulces, amaras alias: unumquodque autem corpus ex atomis homoge- neis suisque similibus coalēscere; ossa videlicet ex paucillis atque minutis ossibus; sanguinem ex multis sanguinis guttis inter se coeuntibus, itemque ex humidis atomis humorem, ex igneis ignem gigni. Hanc autem Atomorum seu par- tium minutarum similitudinem Homoeomeriam appellavit.

At enim quodlibet mixtum corpus conflatum
po-

(a) *Lib. VIII. de Civ. Dei Cap. II.*

SYNOPSIS HISTORICA. 67

posuit Anaxagoras non ex atomis tantum uniusmodi, & quae eandem cum toto naturam habent; sed ex atomis etiam heterogeneis suiue dissimilibus: concreta autem corpora definitam speciem certumque sibi nomen adsciscere ex maiore illiusmodi atomorum copia, quae in iis continerentur. Sanguinem ex. gr. condescere tum ex atomis sanguineis, tum etiam ex nerveis, osseis, carneis, aliisque uniuersae naturae corpusculis: videri tamen & dici sanguinem, eo quod reliquis delitescentibus atomis solae sanguineae sub aspectum veniant, quippe & numero plures, & prima velut in fronte locatae. Atque hanc similitum omne genus atomorum in singulis corporibus concretionem Πανσπερμία vocavit.

Posita hac materiae Homoeomeria sive Panspermia sequitur omnes mutationes, quae corporibus accidunt, sola atomorum antea existentium variisque formis & qualitatibus instructarum concretionem aut secretionem fieri. Proinde cum generantur aut corrumpuntur corpora, non modo substantiale aliquid, sed nullam omnino formam aut qualitatem de integro produci aut in nihilum occidere.

Heic vero abs re non erit animadvertere, quaestionem illam, quae in interpretandis explicandisque Aquae, Aëris, & Infiniti nominibus, quibus antiquiores Ionicae scholae magistri principium rerum designarunt, exagitur, ita definire posse: Nimirum variis ejusmodi nominibus unam & eandem rem notatam illos voluisse, idest immensam quandam ac perturbatam innumerabilium corpusculorum farraginem, Chaos vi-

delicet primigenium. Nam 1. constat barbaros physiologos verbis ὁδογάμοι, (*idem valentibus*) archæon Chaos antea descripsisse. Jamvero decantatam hanc de Chao rerum principio doctrinam a barbaris Grajos philosophos hausisse cum multa suadent, tum illud in primis quod Thales & genere Phoenicius & omni barbarica eruditione a Memphiticis Sacerdotibus institutus fuit. 2. Anaxagoras certe principium, ex quo res quæque efficerentur, non aliud statuit nisi Chaos, tametsi dilucidius & ὁρασιμώτερος explicatum. Atqui non novam sententiam in Thaletis scholam attulisse visus est, sed majorum suorum mentem interpretatus & secutus est.

Quanquam Physicos istos in paucis quibusdam inter se dissensisse non abnuo. Minutas enim particulas, ex quibus concreta sunt corpora, alii similes & qualitatum expertes, alii contra dissimiles & qualitatibus ornatas posuerunt. Nimirum prisci illi naturæ speculatores partim rationatione, partim acriori rerum contemplatione ducti, cum de suo jam sapere inciperent, simul coepere de majorum sententiis aliquid sensim immutare: donec liberiori deinde ingenio usi eo devenerint, ut universa re totisque sententiis dissentiendo in varias quasi familias distracti sint.

Jam vero quod ad Universi hujus efficientem causam spectat, eadem inter ipsos est dissensio. Thaletem enim Mentem aquae adjunxisse, quæ ex ea omnia fingeret, testis est Tullius (a). Et
Laër-

(a) *Loc. cit.*

Laërtius ac Plutarchus Deum ab illo dictum esse *πρῶτον τῶν ὄντων*, antiquissimum sive praestantissimum omnium rerum, Mundum autem τὸ ποιῆμα τοῦ Θεοῦ, Dei opus memoriae tradiderunt. Quae quidem aliaque Veterum testimonia plures adduxerunt, ut de illius pietate benigne sentirent: licet ipsum crimentur Aristoteles, & Petrus Bayle (a).

At hac impietatis nota non caret Anaximander, qui, ut Plutar. ait, in eo peccavit, quod τὸ ποιῆν αἰτίον, causam effectricem deleverit. In quo ipsi adfensum esse Anaximenem testatur idem Plutarchus (b).

Quam ob rem licet Anaximander τὸ θεῶν divinitatem admiserit, h. e. Dei vocabulum retinuerit; rem tamen ipsam inficiatus est. Numen enim illud, quod neque natum esset, neque cor-

E 3

rumpi

(a) Dict. Hist. Crit. v. Anaxagoras, & v. Thales. Augustinus quoque loc. superius cit. impietatis Thaletem accusat. Nihil huic operi, quod mundo considerato tam mirabile aspicimus ex divina mente praeposuit.

(b) De placitis Philosoph. Et sane Diogenes Apolloniates, Anaximenis auditor, teste Tullio loc. cit. aërem ipsum esse Deum aiebat. Quid? Aër, quo Diogenes Apolloniates utitur Deo, quem sensum habere potest, aut quam formam Dei? Consentit Augustinus, qui loc. cit. aërem veluti rerum materiam ab illo statutum esse ait: sed cum esse compotem divinae rationis, siue qua nihil ex eo fieri posset.

rumpi posset, quemadmodum ab illo praedicari ait, Aristoteles (a), infinita erat materia nec vitae nec rationis particeps, e cujus partibus fortuito secretis & dissolutis primum elementa, deinde Solis, Lunae, stellarumque corpora, simul & Mentis hominum, necnon innumerabiles mundi longis intervallis exorti atque everfi existerunt.

Verum Anaxagoras haud passus hanc impietatem inter Jonicae Scholae Philosophos amplius grassari, *primus omnium*, Tullii verba sunt (b) *rerum descriptionem & modum mentis infinitae vi ac ratione designari ac conspici voluit*. Etenim praeter infinitam homoeomeriam, sive minutarum particularum inter se similiarum congeriem, infinitam Mentem admisit, quam κινήσεως ἀρχὴν, *motus initium*, & οὐτὶ ἐν τῇ καλῶς αἰτίαν, *pulchri reliquae causae* esse contendebat.

Archelaum omisimus; neque enim secus consentiunt, qui ipsius scita memoriae prodiderunt. Anaxagorae, quem praeceptorem habuit, disciplinae adhaesisse tradit Simplicius (c). At Plutarchus bina rerum principia admisisse narrat aërem & infinitum, h. e. infinitam Mentem, ut interpretatur Simplicius.

§. XII.

(a) *Physic. Lib. III.*

(b) *Lib. I. De Nat. Deor. cap. II.*

(c) *Comm. in Lib. I. Phys. Aristot.*

§. XII.

De Socrate, & ductis ab eo Sectis.

Jonica Secta in Socrate desiit, qui Athenis natus Olymp. LXXVII. 4. h. e. anno ante Christum fere 474. Anaxagoram, & Archelaum audivit. Multiplici ratione disputandi, rerumque varietate, & ingenii magnitudine laudatur a Cicerone (a). Ex hoc communi sapientium jugo, veluti ex alto vertice aquarum divortia, plures Philosophorum familiae derivatae sunt. Eas omnes recensere & tempus, & taedium absterrent. De ipso pauca, tum de Sectis Platonica, Peripatetica, ac tandem Stoica nonnulla dicemus. De aliis meminisse tantum satis erit. Hae autem sunt *Cyrenaica* a Cyrenis, ubi natus ejus auctor *Aristippus*, ita nuncupata. Diem obiit Olymp. CV. Filiam habuit *Aretem*, feminam eruditissimam. Cyrenaicam disciplinam secuti sunt *Hegeſias*, quem sic copiose de vitae malis disputasse refert Tullius, (b), ut is a rege *Prolemaeo* prohibitus esse dicatur. illa in scholis

E 4 dice-

(a) *Lib. V. Tuscul. cap. IV. Addit Cicero Socratem primum fuisse, qui Philosophiam devocavit e caelo, & in urbibus collocavit, & in domos etiam introduxit, & coegit de vita & moribus rebusque bonis & malis quaerere. Eundem etiam impense laudat Augustinus De Civ. Dei Lib. XIII. cap. III.*

(b) *Lib. I. Tuscul. cap. XXXIV.*

dicere, quod multi, his auditis, mortem sibi consciscerent. Propterea *πασθάρατος*, mortis suasor denominatus fuit. *Amiceris*, unde Secta *Amiceria*. *Theodorus* dictus *Atheus*, quia Graecorum Theologiam despiciatui habuit: & ea de causa ipsum mortis damnatum hausto veneno periisse auctor est *Amphycrates* apud *Laërtium*. *Evemerus*, qui libros *ἱερῆς ἀναγωγῆς* sacrae historiae scripsit priscis Ecclesiae Patribus notos, nunc autem perditos; quorum argumentum exponit *Tullius* [a]. *Bion* denique *Boristhenites*, *Theodori* auditor.

Megarica ab *Euclide* *Megarensi* inventa, qui acri ingenio praeditus tanta contentionis vehementia disceptabat, ut ipsius schola non *σχολή*, sed *χολή*, bilis diceretur: & Secta ab ipso instituta *ἱριστικὴς*, h. e. contentiosae nomen sibi quaesierit. *Euclidi* successerunt *Eubulides* *Milesius*, sophismatum inventione celeberrimus: *Alexinus* *Elieus*, rixarum studiosissimus, propterea *Ἐλεγκτικός*, contradictorius denominatus; *Euphantus* *Olynthius*, *Antigoni* Regis praeceptor. *Apollonius* *Cronus* *Cyrenaeus*: *Diodorus* & ipse *Cronus* dictus, quippe illius discipulus, ex *Iaso* *Cariae* urbe, quem valentem dialecticum appellat *Tullius* [b]: & *Stilpo* *Megarensis*, acutus sane homo & probatus temporibus illis *Tullii* iudicio [c].

Eliaca *Phaedonem* *Elieus* auctorem habuit, qui *Socratem* ipsum audivit, ejusque vestigiis insti-

[a] *Lib. I. de Nat. Deor. cap. XLII.*

[b] *De Fato cap. VI.*

[c] *Ibid. cap. V.*

stitit. Huic ex Laërtio *Plistanus* successit; quem excepit *Menedemus*: cumque Eretriae, quae ipsi patria erat, docere coepisset, ipsius auditores *Eretriaci* appellati fuere. Successorem habuit *Asclepiadem Phliasium*.

Cynica ab *Antisthene* Atheniensi profecta, cui *Cynofarge* gymnasium, ubi is docebat, vel canina mordendi licentia, qua ipse, ejusque affectae utebantur, hujusmodi nomen comparavit. Hanc sectam severioris potius vitae rationi, quam Scholae destinata esse observat Brucher, [a]. *Cynicorum* mores paucis complectitur Laërtius (b). *Sobriis cibariis utuntur, & solis palliis. Divitias, gloriam, nobilitatemque contemunt. Plerique etiam herbis, & aqua tantum frigida utuntur, operimentisque forte oblatis, & doliis.*

Cynicae familiae addicti fuerunt *Diogenes* Sinopenfis, quem ab Alexandro M. monitum, ut aliquid peteret, hoc unum rogasse, ut a sole abesset, narrant Plutarchus, aliique. *Monimus* Syracusanus, *Crates* Thebanus, ejusque uxor *Hipparchia*, atque hujus frater *Metrocles*, aliique.

Age nunc ad Socratem accedamus. Is quidem eam de Mundi origine habebat sententiam, ut summum maximumque Deum illum condidisse, atque administrare persuasum habuerit. Satis id testatur ipsius cum Aristodemum colloquium, cui id persuadere studet apud Xenophontem (c).

Qui-

(a) Tom. I. pag. 865.

(b) Lib. VI. sub finem.

(c) Lib. I. Memorab. dister. Sperat.

Quibus consona sunt, quae memorat Plato, cum tria rerum principia adfirmet a Socrate esse excogitata, Deum scilicet, Materiam, atque Ideam (a). Ceterorum vero Deorum turbam, quos Graecia venerabatur, licet colere haud renebat, poetarum tamen de iis narratiunculas & fabulas ita palam contemnebat, ut hanc ob causam ab Anyto, Melito, & Licone, quod Deos novos introduceret, postulatus, veneno ab Atheniensibus sublatus fuerit. *Sed cum postea*, verba sunt Augustini (b), *illa ipsa, quae publice damnaverat, Atheniensium civitas publice luxit, in duos accusatores ejus usque adeo populi indignatione conversa, ut unus eorum oppressus vi multitudinis interiret, exilio autem voluntario atque perpetuo poenam similem alter evaderet. Ac ream Socrati statuam artifice Lysippo, urbis loco celeberrimo erectam tradit Laërtius.*

Ex mundi totius anima nostros animos decerptos esse opinatum fuisse Socratem passim tradit Plato. Nihil vero minus certum est, quam hoc. Illud tamen constat, quod animae praestantiam impense collaudaverit, eamque a Diis nobis datam esse docuerit. Quin etiam soluto corpore animam haud interire ita certum habebat, ut *cum pene in manu mortiferum, illud teneret poculum locutus ita sit, ut non ad mortem trahi, verum in caelum videretur ascendere.* Ita Tullius (c): ubi etiam adnectit, quae de duplici ani-

(a) *Plat. in Phaed. & Timaeo.*

(b) *Lib. VIII. de Civ. Dei cap. III.*

(c) *Lib. I. Tuscul. cap. XXIX.*

animorum cursu e corpore excedentium Socrates differuit.

De Genio Socratis aliquid addere supervacuum duximus, quippe cum tam atra nocte premantur quaecumque in medium de hac re produci possent, ut vel inde a Socratis ipsius, & Platonis temporibus disceptaretur, quis fuerit ille sive Genius sive Deus. Legantur, si lubet, Proclus in Alcibiadem, Apulejus de Deo Socratis, Plotinus, Jamblichus, Porphyrius, & in primis Olearius de Genio Socratis.

§. XIII.

De Secta Platonica.

OMnes Socratis auditores ingenii gloria Platonem superasse unanimi consensione Veteres tradunt. Is natus est Athenis Olymp. LXXXVII. 3. ante Christum 430. & postquam per adolescentiam picturae, & poëticae arti operam dedisset, Philosophiae studio inflammatus Socrati se instituendum tradidit: quo morte sublato Dialecticam Euclide praeceptore didicit. Tum discendi semper cupidus litterarium iter aggressus est, quod ab Apulejo (a) descriptum habemus. Hic enim ait Platonem primum ad Pythagorae disciplinam se contulisse, tum ad Theodorum Cyrenas, ut Geometriam disceret, esse profectum: deinde astrologiam adusque Aegyptum ivisse petiturum; & ad Italiam iterum venisse, & Pytha-

80.

(a) De Dogm. Plat.

goreos fuisse sectatum . Confecto itinere in patriam rediit , atque in Academia , quam proprio aere emptam publico gymnasio destinarat Hecademus , Philosophiam docere coepit . Ipsi Schola foribus suspensum habebat πρόγραμμα illud : Οὐδὲς ἀγνοῦν τρωτὶς ὕδατος , Nemini Geometriae experti ingredi fas esto .

Platonem igitur docentem audiamus . Is quidem in Timaeo , ubi maxime dogmata sua de rebus naturalibus exposuit , Mundum certo tempore a Deo conditum fuisse statuit . Num vero Mundum ex iis , quae non erant , Deum fabricatum esse docuerit , an vero materiam aeternam , Deoque coevam opinatus sit , acri disputatione agitur [a] . Seneca Platoniam de initiis rerum doctrinam ita paucis complexus est : *Quinque caussae sunt , ut Plato ait , ex quibus omnia fiant : id ex quo , id a quo , id quo , id ad quod , id propter quod Tanquam in statua id ex quo , aes est : id a quo , artifex est ; id quo , forma est , quae aptatur illi : id ad quod , exemplar est , quod imitatur is , qui facit : id propter quod , facientis propositum est . Haec omnia Mundus quoque habet . Faciens hic Deus est : ex quo fit , haec materia est ; forma , hic est habitus , & ordo Mundi quem videmus : Exemplar , scilicet ad quod Deus hanc magnitudi-*

[a] Nec mirum ; omnium enim hujus Philosophi dialogorum Hieronymi sententia Timaeus est obscurissimus . Lib. II. Comm. in Amos : obscurissimus Platonis liber , qui ne Ciceronis quidem aureo ore sit clarior .

dinem operis pulcherrimi fecit. Propositum, propter quod fecit, Bonitas est. Haec Seneca [a].

Quod si Plutarcho fidem adhibere velimus, hic Platonis sequi sententiam se malle ait, qui Mundum a Deo factum, sed *εἰς αὐτὴν καὶ ὕλην ἔξ ὧν γέγονεν ἡ γρομένη*, ἀλλὰ ὑποκειμένη αὐτῷ δημιουργῷ *κ. τ. λ.* substantiam & materiam, ex qua factus est mundus, non factam, sed semper opifici subjectam esse existimavit. Iisdem ferme verbis veterum Platoniorum, seu Academicorum, qui *primi* vocantur, opinionem exponit Tullius [b].

Hic idem Plutarchus [c] duas naturas, alteram bonorum omnium causam, alteram mali omnibus fontem se professum esse, neque aliter antiquioribus Philosophis, Platoni praesertim, visum fuisse asseverare videtur. Num ita senserit Plutarchus, ambigitur. De Platone tamen constat, ipsum in Timaeo statuisset, Mundi animam ex *Eodem & Diverso* conflatam esse, h. e. ex divinae naturae portione, & ex re quadam alia distincta a Deo, & cum materia sociata: hanc scilicet nonnulli suspicantur esse naturam illam malorum causam.

Verum alia omnino fuit mens Platonis, uti ex ejus scriptis Cudworthus, Moshemius, alii-que investigant. Censuit enim materiae conditionem, quae Dei optima quaevis cupientis voluntati restiterit, multa produxisse, quae hunc orbem circumstant incommoda. Nam deformem

&

[a] *Epist. 65.*

[b] *Lib. I. Acad: cap. VI.*

[c] *Lib. de Iside & Osir.*

& inordinatam eam fuisse, antequam praesenti ornatu decoraretur, ait in *Politico*.

Mala vero illa, quae moralia appellantur, itemque physica, quae ad hominis corpus pertinent, ad animam retulit Plato. Cum enim ipse binas, sive tres potius in homine finxerit animas, rationis unam participem, alteram sive reliquas ratione vacuas, & concitationibus inordinatis obnoxias: illam, quam Deus ex se produxit, nihil in se mali & vitiosi habere; hanc vero sive unam, sive plures, ubi irae, desiderii, & cupidinum caussae latent, omnium malorum originem esse voluit. Haec copiose in *Timaeo* exponuntur.

Haec autem anima, cujus ex Cicerone (a) *duas partes in homine locis disclust, atque unam in pectore, cupiditatem subter praecordia locavit, ex inordinata quadam mundi anima, quam ἀτακτον ἢ κακopoιον, inordinatam, & maleficam appellat, hausta esse sancitur a Platone.*

Sed jam πολυβοῶν hoc gravissimi ejusdem philosophi dogma de anima Mundi breviter exponamus. Missis junioribus Platonis, quos absurdis novarum opinionum commentis doctrinam Magistri adulterasse constat, ipsummet Platonem audiamus, hac de re tum alibi tum maxime in *Timaeo* sic loquentem.

1. Esse naturam quandam, quae per omnes terrasque tractusque maris, caelumque profundum commeans omnia motibus suis cieat, formet, alat, animetque. Naturam hanc $\Psiυχη$

Psy-

(a) *Lib. I. Tuscul. cap. X.*

SYNOPSIS HISTORICA. 79

Psyche i. e. Animam vocat, ob eamque rem mundum esse ait ζῶν ἐν ψυχῇ, ἐννοῦντε, idest ut Cicero interpretatur, *Animal idque intelligens*.

2. Hanc animam a summo rerum omnium demiurgo procreatam esse, antequam ejus corpus idest Mundus fingeretur.

3. Eandemque ex tribus naturis coaluisse, una individua, altera dividua, tertia inter has media, ex iisque duabus conflata. Jam quales sint naturae istae, ex quarum artificiosa temperatione Mundi Psyche coaluit, incertum. Platonici quidam hoc Magistri scitum de anima ex individua & ex dividua natura ita interpretantur, ut velint individuâ naturâ Divinam essentiam significari; naturâ vero dividuâ comprehendere initia & elementa omnium rerum.

4. Haeret autem Plato, idque in medio relinquit, utrum una sit anima isthaec διοίкуσα καὶ ἐνοίкуσα ἐν πᾶσι τοῖς κινουμένοις, quae gubernat omnia & in omnibus quae moventur inhabitat; an vero sint plures.

5. Verum cum ista mundi anima, seu rerum genitrice natura minime confundendus est ille princeps Deus, hujus universitatis effector & moderator. Nimirum enim Plato animam, cujus motibus omnem naturam vigere autumat, & ab supremo Numine procreatam, & ejus voluntati obsequentem, & denique ἐγκόσμιον, idest in mundum immersam statuit. Contra Deum Mundi demiurgum idem Plato pronunciat ex omni aeternitate existitisse; nec esse ulli naturae subiectum aut obedientem; eundemque non caelo, nec terra, nec ullo denique loco comprehen-

hendi ; tametsi illius numen caelum & terram pervadat.

Et quoniam de hominum animis Platonis sententiam inuimus , advertere juvat ita ipsum philosophatum esse, ut 1. ab omni extensione & concretionem disjunctos existimaverit, uti contendit Cudworthus ; licet renuente Moshemio . Hujus enim sententia ab hac crassa, qua corpora componuntur, materia humanas Mentis sejungit Plato ; at eas subtilissimae cujusdam materiae participes fecit. Ceterum Platonis, aliorumque Veterum hac in re sententiam facile erit definire , si probe noscatur , quo pacto voces *corpus*, *materia*, *corporeus*, *simpliciter*, *incorporeus*, quibus non unus subjici sensus potest , Veteres usurpaverint. Quod quidem in Metaphysicis Institutionibus, cum humanae Menti simplicitatem vindicabimus, persequi cogitamus.

2. Animos censebat Plato praeter terrenum corpus, cui copulantur, alio aethereo indutos esse, quod in Schola Platonica *ὄχημα*, sive animae *vehiculum* appellari consuevit. Quin & addunt quidam hujus Scholae alumni, hoc vehiculo veluti quodam vinculo animum cum mortali corpore connecti : atque hujusmodi corpus ab animo nullo modo sejungi posse , sed ad infinitum tempus illam perpetuo comitari.

3. Animos in varia migrare corpora Platonem docuisse , eosque pro varia morum ratione meliori , aut deteriori domicilio addixisse fere omnes in compertis habent. Verum Gulielmus Irhovius, quem supra laudavimus, aliam omnino fuisse Philosophorum Principis mentem plu-

SYNOPSIS HISTORICA. 81

ribus ostendit, ex iis potissimum, quae de animorum factio cum corpore divortio varia conditione ille tradidit, ut mox inuenimus (a).

4. Quod animos pereanes esse Plato existimaverit vel illud argumento est, quod de ipsorum conditione statuit, postquam a corporum amplexibus divulsi fuerint. Eos enim, qui pie vixerint, pureque decesserint, ex his terrenis locis tamquam e carcere solutos ad altiora transcendere, puramque supra terram incolere regionem; quique Philosophiae studio flagraverint, absque corporibus (aetheriis scilicet, quae modo memoravimus) pulchriores nancisci habitationes differit (b). Quam sedem piorum animis additam in Caeli dorso sitam docet, locumque supercaelestem appellat: eamque, ait, *neque quisquam nostrorum laudavit adhuc Poëtarum, neque unquam pro dignitate laudabit* (c). Tum perennem ibi vitam acturos animos, nunquam interitum subituros tradit [d]. Qui vero scelera & flagitia admiserint, vario poenarum genere, aut aliquandiu, si *iniqua sanabilia* peccata fuerint, aut si ob scelerum gravitatem *insanabiles* fuerint, aeternum eos excruciarī affirmat (e).

Platonem nondum dimittere possumus: de ipsius Ideis nonnihil dicendum superest. Postquam in Timaeo Dei consilium de Mundo condendo.

Tom. I.

F

Pla.

(a) De Palingen. vet. Lib. II. Cap. IX.

(b) In Phaedone p. 386. 400.

(c) In Phaedro.

(d) In Apologia sub fin.

(e) De Leg. Dial. X. & in Phaedone.

Plato exposuit, fieri nullo modo posse decernit, quin Deus exemplum quoddam quasi ob oculos habuerit, cuius ad normam universam hanc rerum compagem compararet. Hoc autem, quod tanti operis fabricator imitatus est exemplar, *νοῦν* intelligibilem mundum appellat, quod *ratione sapientiaque comprehenditur, atque immutabili aeternitate continetur*, ut loquitur Cicero [a].

Illa igitur rerum exempla, quas Ideas dixit, quae divinae obversabantur menti, modo *οὐ γινώμενα, ἀλλ' αἰὲν ὄντα*, non esse genita, sed perpetuo manere, modo *μὴτε γινώμενα, μὴτε ἀπολλύμενα*, quae nec generari, nec corrumpi possunt, passim a Platone appellantur.

Hic porro cum Veteres tum Recentiores vehementer inter se dissident, utrum hujusmodi Platonicae ideae naturae sint ex divina intelligentia creatae, & extra eam existentes, an vero *νοήματα* *notiones* tantum animi divini. Posteriorem amplectuntur Cudworthus & Moshemius, quos vide [b].

Platonicae familiae alumni in tres classes distinguuntur. Quidam enim fidi praeceptoris aeternae Academiae, quam vocant *veterem*, constituerunt. Hi porro sunt *Speusippus* Atheniensis, Platonis sororis filius, qui cum per octo annos Academiae praefectus fuisset, eam Olymp. CX. 2. denatus *Xenocrati* Chalcedonio regendam tradidit, quem Cicero *gravissimum, & severissimum*

[a] *In Fragmento de Univ.*

[b] *Syst. Int. Cap. IV. §. XXXI.*

mum Philosophorum appellat [a]. Obiit autem Olymp. CXVI. 2. vel 3. Post Xenocratem Academiae praefuit *Polemo* Atheniensis, quem audierunt *Crates*, & *Crantor*, quorum alter Athenis, alter Solis ortum habuit.

Verum alii licet a Platone non desciverint, diversam tamen philosophandi rationem iniere, quibus facem praetulit *Arcefilas* sive *Arcefilaus* Pithanaeus ex Aeolide natus Olymp. CXVI. 1. Is quidem, ut ait Tullius [b], *omnia latere censebat in occulto: neque esse quidquam, quod cerni aut intelligi possit: quibus de causis nihil oportere, neque profiteri, neque affirmare quemquam, neque assertionem approbare.* Igitur *Mediae*, ut Veteres nominarunt, Academiae auctor fuit, quae, ut idem Tullius [c], *usque ad Carneadem perducta, qui quartus ab Arcefila fuit, in eadem Arcefilae ratione permansit.* Arcefilam inter & Carneadem fuere *Lacydes* Cyrenaeus, *Evan-der* Phocensis, & *Egesinus* Pergamenus, qui apud Clementem Alexandrinum [d] *Hegefilaus* audit.

Carneades igitur, cujus natalis dies ad Olymp. CXLI. 3. revocatur a plerisque Eruditis, ab Arcefilae doctrina aliquantulum discessit; quamvis enim in rebus ipsis veritatem agnovit: at eam ab homine cognosci posse negavit. Duo igitur sunt, quae Arcefilae disciplinam a Carneadis

F 2

pla-

[a] *Lib. V. Tusc. cap. XVIII. & Lib. I. Offic. cap. XXX.*

[b] *Lib. I. Acad. cap. XII.*

[c] *Loc. cit.*

[d] *Strom. Lib. I.*

placitis discriminant. Ille quidem nullam in rebus ipsis inesse veritatem perhibebat: is contra quamvis verum aliquid aut falsum esse fateretur, at verum a falso discerni posse negabat. Deinde cum Carneades assensum duntaxat sustinendum duceret, probabile autem aliquid esse, aut contra non negaret: nihil horum Arcefilas admittebat. Ita sane Gerardus Joannes Vossius mediae ac tertiae Academiae disciplinam definit (a). Carneadem excepit *Clitomachus* Carthaginiensis, quem *hominem acutum*, & *valde studiosum ac diligentem* vocat Tullius (b). Hujus discipulus fuit *Philo* Larissaeus, quem anno ab U. C. 665. bello Mithridatico profugum Romae audivit Tullius. Proxime secutus est *Antiochus* Ascalonita, quem etiam Athenis se audiisse testatur Tullius (c).

§. XIV.

De Secta Peripatetica.

EX veteri Platonis Academia prodiit Aristoteles Stagirae Macedoniae oppido natus Olymp. XCIX. ante Christum 384. qui postquam 20. annos Platonem audiisset, & Alexandrum Macedonem per quinquennium instituisset, Athenis in Lyceo deambulando docere coepit; unde *Peripateticus*, a verbo Graeco *περιπατῶν* *deambulare* dictus est. Porro Aristoteles cum e vita

ex-

(a) *De Philosoph. Sect. Cap. XII. §. XXIII.*

(b) *Loc. cit.*

(c) *In Bruto cap. XCK.*

excessisset Olymp. CXIV. 3. suae disciplinae veluti heredes instituit *Theophrastum* Eresium, cui Scholae cura demandata est, & qui bis mille auditores habuisse fertur: *Stratonem* Lampfacenum, vulgo *Physicum* appellatum, cujus impia de rerum origine dogmata in Metaphysicis exponenda refutabimus: *Lyconem* Troadensem, qui Olymp. CXXVII. Strabonem excepit: *Aristonem* Cejum; *Critolaum* Phaselidem, & *Diodorum* incertae patriae, qui ultimus est in successione Peripatetica.

Jam vero, ut Aristotelis doctrinam prosequamur, is quidem primo pertinacissime pro Mundi aeternitate pugnavit. Neque enim, ut ait Tullius [a] ortum esse unquam mundum adferebat, quod nulla fuerit novo consilio inito tam praeclari operis inceptio, & ita eum esse undique aptum, ut nulla vis tantos queat motus mutationemque moliri, nulla senectus diuturnitate temporum existere, ut hic ornatus unquam lapsus occidat.

Ceterum rerum naturalium principia contendeat oportere esse prima, & quodammodo inter se contraria; adeoque neque ex se invicem, neque ex alio fieri; at ex iis fieri omnia. Hinc tria omnino statuebat rerum principia ὕλην, εἶδος, καὶ σίμωσιν, materiam, formam, & privationem. Quorum duo inter se opposita, & contraria sunt, scil. Forma, ejusque privatio: Materia vero privationis, ac Formae est commune subjectum, easque per vices excipit.

[a] Lib. IV. Acad. cap. XXXVIII.

Praeterea Platonicae Mundi animae amicus fuisse videtur Cudwortho, quod & ante ipsum recentiores Platonici adseruerunt, ut omnem inter illum ac Platonem discordiam conciliarent. Peripatetici ab ea abhorruisse Magistrum acriter pugnant. Est tamen in ipsius operibus, quod Platonis mundanae animae affine videtur. Passim enim memorat θερμόντα ζυχίων, vitalem quemdam calorem per totam rerum naturam diffusum, qui neque ignis sit, neque aliud huiusmodi.

De ipsius pietate in Deum, graves sunt doctissimorum Virorum controversiae. Veritati propius accedere videntur, qui Aristotelem verbo haud Deum inficiatum esse, sed reapse e medio sustulisse, aut quamdam potius Dei umbram & simulacrum exhibuisse arbitrantur.

Primo enim ipsius Deus nihil libertatis habet, cum ex necessitate quadam naturae rerum universitatem produxerit. Praeterea divinae Providentiae metam in Orbe Lunari constituit; quippe negat quae infra Lunam sunt & fiunt, ad eam pertinere. Tandem, ut cetera taceam, otiosus prorsus est Aristotelis Deus, neque quidquam agit, sed cessat; atque in hac quiete ejus beatitudo praecipue posita est. Huiusmodi argumenta collegit Jo. Georgius Walchius (a).

Nec leviora sunt certamina de Aristotelis opinione, quod ad animorum perennitatem spectat. Ipse quidem animum in duas partes dispescit, quarum una sit sentiens, quaeque sine corpore esse non possit; altera intelligens, quam *νῦν* appell-

(a) *Exercit. de Atheism. Aristot.*

pellat, atque extrinsecus homini advenire, & divinam esse ait: eamque ex natura illa per totum orbem fusa delibatam esse statuit (a).

§. XV.

De Secta Stoica.

SToici naturam, inquit Lactantius (b), dividunt in duas partes, unam quae efficiat, alteram quae se ad faciendum tractabilem praestet. In illa prima esse vim faciendi, in hac materiam, nec alterum sine altero esse posse. Ita isti uno Naturae nomine res diversissimas comprehenderunt, Deum & Mundum, artificem & opus, tanquam Natura sit Deus Mundo permixtus. Concinat Seneca (c): Quid est Natura, quam Deus & divina ratio toti munda & partibus ejus inserta?

Deum autem hunc πνεῦμα ἰσχυρὸν, igneum Spiritum esse, seu in ignea hujus orbis materia residere ipsi autumabant. Plutarchus enim & Tullius Zenonis Deum ignem artificiosum esse testantur, qui nimirum omnia creaverit, & progenuerit.

Porro Mundi ortus, Zenonis & Stoicorum judicio, sic habuit. Ab initio cum Deus apud semetipsum esset, τὴν πᾶσαν οὐσίαν omnem substantiam vertit primo in aërem, deinde in aquam,

(a) *Lib. II. de generat. animal.*

(b) *Divinar. Institut. Lib. VII. cap. 3.*

(c) *Lib. IV. de Benefic. cap. II.*

h. e. in materiam quandam, quae aquosae nubis speciem haberet. Tum per humidam hanc atque inertem materiam discurrens is, qui mundi Λόγος σπερματικός *Ratio seminalis* est, semen in ea deposuit h. e. vitalem illi & salutarem calorem impertiit. Quo quidem animata materia, & vim genitalem adepta ad deinceps procreanda opera aptam facilemque se praebeuit.

Ex istiusmodi porro artificiose discreta materia quatuor orta sunt Elementa, videlicet Ignis, Aër, & Terra. Ex Elementis minora ac multiformia corpora coaluerunt. Hinc Elementum definitur, Id ex quo primo fiunt, quae fiunt, & in quod extremum resolvuntur.

Elementorum quaedam levia sunt, quaedam gravia. Levia sunt Ignis & Aër. Gravia Aqua & Terra. Leve est quod a medio recedit. Grave quod ad medium accedit. Hinc Ignis sive Aether supremam mundi regionem occupat, ubi Stellae inerrantes; quas inter eminet Sol mundanae animae Mens, sive τὸ ὑπερνοεῖν. Aetheri succedit Aër. Huic Aqua subjicitur. Mundi medium tenet Terra omnium basis ac fundamentum.

Omnium Elementorum alterni recursus sunt. Et quidquid perit alteri perit, in alterum transit, mirabili naturae providentia, quae partes suas velut in ponderibus examinat, ne portionum aequitate turbata Mundus praeponderet.

Mundum, ex lege Fatorum, duplex manet interitus primus ab Aqua, alter ab Igne.

Nam 1. turbata Elementorum ἰσορρομία *aequilibrata*, plus humoris fiet, quam semper fuit. Itaque Aqua in succumbentem terram undique
irrum-

irumpens, quidquid habitatur obducet, necabitque omne animal, orbe submerso. Deletisque omnibus ne quis supersit ad deteriora magister, antiquus ordo revocabitur.

2. Post Cataclysmum sequetur *ἐκπύρωσις*, *Conflagratio*. Nimirum cum fatale tempus advenerit, quo se renovaturus Mundus extinguat, humore consumpto omnique exardesciente materia effeta tellus & caeli regia uno igne conflagrabunt. Post conflagrationem nihil relinquetur praeter unum summum Jovem, qui scilicet purior ille ignis est, ex quo rursus mundi renovatio fiet, idemque ornatus exorietur. Hujusmodi autem eluvionum atque exustionum & per vices insequentium renovationum, quas Mundo accidere post certas annorum periodos necesse est, series sempiterna a Stoicis statuitur.

Animos ex illo sempiterno igne descendere, ejusque partes esse Stoicos sensisse & Tullius & Seneca testantur: qui addit: *Totum hoc, quo continemur, & unum est, & Deus est, & socii ejus sumus & membra.*

De animorum immortalitate nihil certi apud ipsos erat. Seneca quidem modo ait, modo negat, modo dubitat. Nonnulli diu mansuros ajunt animos, at aeternos esse negant. Vide Tullium (a). Neque id controversum non erat. Cleanthem enim omnes, Chrysippum verum solos Sapientum animos permanere usque ad mundi conflagrationem, docuisse refert Laërtius.

Stoicorum, ut ita dicam, familiam duxit Ze-

no

(a) *Lib. I. Tuscul.*

no Cittieus ; e Cittio enim Cypri oppidulo ortus est : quod cum olim Phoenices incoluerint , hinc illum (a) *Poenulum* vocat Tullius . Sub Olymp. CV. in lucem ipsum editum esse inde colligere possumus , quod octo & nonaginta annos natum obiisse illum plerique tradunt , & ad Olymp. CXXIX. illius mortem statuit Eusebius .

Zenonis affeculae , ut celebriores duntaxat nominemus , fuerunt *Cleanthes* , joco Φραντλης dictus , quod *puteos noctu exhauriret* ; *Chrysippus* Solensis adeo Dialecticae studiosus , ut , teste Diogene , de re Logica undecim & trecenta volumina reliquerit ; *Diogenes* Babylonius , qui Romam Atheniensium legatus venit , *Panaetius* Rhodius , ac tandem *Posidonius* Apameae in Syria natus , quem Rhodi docentem Pompejus in-visit , & Tullius audivit , ut ipse ait (b) .

§. XVI.

De Secta Italica .

Pythagoras , quem alii Samium , alii Thuscum , alii alibi ortum habuisse narrant , postquam Aegyptum lustravit , & Persarum Magos adiit , & , si fides adjungenda Hermippo apud Josephum (c) , cum Hebraeis congressus est , in
Ita-

(a) *Lib. IV. de Fin.*

(b) *I. De Nat. Deor. cap. III.*

(c) *Lib. contr. Appion. Adde Origenem , qui lib. I. contr. Cels. eundem Hermippum laudans ex Judaeis Philosophiam Pythagoram didicisse ait.*

SYNOPSIS HISTORICA. 91

Italiam venit , ut ait Tullius (a) , & quidem in magnam Graeciam , quam privatim & publice praestantissimis institutis & artibus exornavit . Eundem Crotonae , celeberrima olim Brutiorum urbe in ora maris Jonii , ludum aperuisse refert Laërtius (b) .

Atque hinc est , quod Secta , quam hic Pythagoras instituit , *Italicae* nomen sibi vindicavit . Croton enim , unde illa exsiluit , inter urbes illius peninsulae , quae tunc *Italiae* nomen sibi peculiare fecerat , eminebat . Ita immortalis memoriae Mazochius noster , quem semel atque iterum laudavimus , sed nunquam pro ingentibus viri meritis (c) .

De ipsius aetate non satis inter Eruditos convenit . Henricus Dodwellus (d) ad annum IV. Olymp. LII. Guilielmus vero LLoydus (e) ad annum III. Olymp. XLVIII. natalem Pythagorae diem revocant .

Hic primus *Philosophi* , h. e. Sapientiae studiosi nomen adscivit ; quippe *Sophi* sive Sapientis nomen , quo ad illud temporis alii usi fuerant , uni Deo convenire adferebat .

Qui vero Pythagoram ad Philosophiam instituerit , *Pherecydes* fuisse fertur , qui e Syro , una ex Cycladibus insula , circa Olymp. XLV. ortus est . Porro Philosophus hic , quem summam in
scri-

(a) *Tuscul. Lib. V. cap. IV.*

(b) *Lib. VIII.*

(c) *Comm. in Tabul. Heracl. p. 59.*

(d) *Dissert. de aetate Phalar. & Pythag.*

(e) *De Chronol. Pythag.*

scriptis suis obscuritatem affectasse testatur Clemens Alexandrinus (a) & Deo aeternam adjunxisse materiam videtur Moshemio (b). Nam teste Laërtio ita ille unum ex libris suis exorditur : Ζεύς μὲν καὶ χρόνος εἷς αὖ καὶ χθὼν ἓν , *Jupiter quidem & Tempus idem semper ac Tellus erat* . Sive , ut legendum putat Casaubonus (c) : Ζεύς μὲν καὶ Κρόνος εἷς αὖ καὶ χθὼν ἓν . *Jupiter quidem & Saturnus semper & Tellus erat* . Tum addit , *Terrae nomen fuisse Telluri , postquam ipsi Jupiter praemium dedit* . Quibus sane significat Deum indigestam illam , quae ab aeterno fuit , molem temperasse , eamque Tellurem vocatam , postquam novam , moderante Deo , formam induit . Praeterea Pherecydem *primum dixisse animos hominum esse sempiternos* auctor est Tullius (d) .

Hoc quidem praëceptore usus est Pythagoras : cujus de rerum origine dogmata per summam veterum Scriptorum inconstantiam vix hodie licet decernere . Ad duo principia rerum naturam ipse revocasse dicitur *Monada* , & *Dyada* , & utrumque originis expers , atque aeternum credidisse . Porro si Philoni Judaeo , Diogeni Laërtio , Plutarcho , aliisque fidem adjungamus , *Monas* Pythagorae Deus est ; *Dyas* vero materia , ex qua Deus mundum construxit .

Verum si alios audiamus , *Hermiam* scilicet ,
Ni-

(a) *Strom. Lib. V.*

(b) *Not. g. ad Cap. IV. §. XX. Syst. Intell.*

(c) *In Notis ad Laërt. p. 28. Edit. Steph. 1594.*

(d) *Lib. I. Tuscul. cap. XVI.*

Nicomachum apud Photium, aliosque; id, quod Monada Pythagoras nuncupavit, non esse nisi informem materiam censeamus oportet, ex qua varie temperata quatuor rerum elementa, & reliqua corpora nata sint. Praeterea quod Tullius (a) Pythagoram censuisse ait, Deum esse animum per rerum naturam omnem intentum & comitantem, haud obscure innuere videtur, illius Deum a materia minime sejunctum fuisse.

Ceterum hunc Philosophum unum summumque Numen agnovisse, ex quo veluti fonte ceteri Dii orti sunt, quodve universitatis hujus conditor est & parens, ostendunt *Aurea Carmina*; quae quemcumque auctorem habeant, antiquissima certe sunt. His consentiunt Hierocles, Jamblichus, & Cyrillus Alexandrinus.

Illud *πασιπῶς* animadvertatur, locutiones Pythagorae e numeris desumptas, (quibus ipse utpote Geometriae & artium mathematicarum studiosissimus utebatur) ita Veteres nonnullos accepisse, quasi e numeris, & mathematicorum initiis omnia proficisci voluerit; in qua sententia fuisse videtur Tullius (b). Multorum Viro-
rum diuturni de hac re labores, nil, nisi incertas conjecturas, nobis reliquerunt. Quidni? Ipsi Pythagorae Auditores, qui usque ad ravin *ἄντρος* *ἰπᾶ* nobis occinunt, mirum quantum inter se dissentiunt; cum alii ad res metaphysicas, alii ad morales, alii ad nescio quae alia numeros traxerint; adeo quidem, ut hisce dissensionibus

(a) *Lib. I. De Nat. Deor. cap. II.*

(b) *Lib. IV. Acad. cap. XXXVII.*

nibus ignorantiam suam vel inviti prodiderint .

Hominum animos ex Dei animo carptos & delibatos Pythagorae opinionem fuisse tradit Tullius . At Diogenes Laërtius animam esse *ἀνθρώπου αἴθερος ex aethere avulsam* docuisse illum ait . Eos praeterea immortales esse , & per nova semper vagari corpora sensit . Ipse quidem professus est animam suam fuisse olim in Aethalide Mercurii filio , in Euphorbo , Hermotimo , aliisque . Verum de *μετεμύχῳ* , seu *Transanimatione* , quae vulgo *Pythagoricae* denominationem sortita est , legendus omnino saepe laudatus Irhovius , qui & fusc & docte tum omnes veteres Philosophos , tum potissimum Pythagoram ab hujusmodi inepta sententia vindicat .

Is enim probat 1. Pythagoram pro Veterum more dogmata sua symbolicis , & aenigmaticis locutionibus obtexisse : ut nisi symbolice ea exponantur , risu potius sint excipienda , quaecunque sapientissimus ille Philosophus dictitarit . 2. *μετεμύχῳ* hujusmodi , quam ipse *crassam* appellat , quamplurimos ex antiquis Pythagorae minime affinxisse . 3. Dogma illud profectum esse a pervetusta , & vulgo in prisca Philosophia recepta sententia , quae triplicem humanae Mentis statum spectabat ; primum cum nondum corpori addiceretur ; alterum cum jam vinculis corporeis obstringeretur ; tertium , cum e corpore erumperet . Initio Mentis simplices omnino a Deo creatas in stellas fixas fuisse transmissas hujusmodi ferebat opinio . Cum vero a recta veritatis norma illae aberrassent , in Tellurem , mortalium sedem , fuisse detrusas . Sed priusquam huc per-

veniant, septem Planetarum orbes permeare. In his cum aliquando immorentur quodam aërio corpore, quod *ὄχημα*, *vehiculum* vulgo appellatum fuit, circumfundi, cui sane *vehiculo* quisque suas affectiones imprimit Planetæ, nimirum torporem Saturnus, Mars iracundiam, libidinem Venus, Mercurius lucri cupiditatem, Jupiter regni desiderium, aliaque alii. Atque hac ratione jam varias, antequam humano corpori alligarentur, vitas, seu vitæ species vixisse mentes dicebantur. Praeterea primigeniæ, & *rationali* animæ in hujusmodi per planetas transitu alia *irrationalis* copulabatur, & corporibus signa quædam sive notæ, & characteres inurebantur, qui hujus vel illius *Planetæ prædominantis* essent indicia. Tandem quam potissimum egerint in sphaeris vitam vel *Joviam*, vel *Veneream*, vel alterius cujuscumque generis, eandem in terris propriis designatam characteribus sequi opinabantur.

Ut vero septem diversas vitæ species septem Planetis respondentes in priore Statu Mens subire dicebatur; ita in Statu altero, nempe corpori conjuncta, septem alias vitas credebatur in terris permutare, quæ nihil aliud nisi varia ætatis intervalia, vel periodos, variasque animi cupiditates præ se ferebant. Hoc sensu animam ab alia in aliam vitam, & ab alio in aliud corpus transire affirmabant.

Postquam rite purgata mens humana fuerit, corporeis vinculis soluta ad immortalium Deorum consortium evolat. Sed oportet, ut per eodem prorsus gradus ascendat, per quos antea
de.

descenderat: Nimirum rursus per septem planetarum orbis errare cogitur, donec in *chorum Deorum non errantium* recipiatur.

Jam vero hujusmodi vitae ratio post mortem dicebatur transitus *eis αὐτὴ ζῶα in animalia*. Nam quemadmodum eruditè probat Ithovius, Planetae, & Stellae fixae αὐτὴ ζῶα vocabantur. Ex qua dicendi formula concludit, ortum habuisse commenta de *crassa illa* Veterum, & Pythagorae in primis *Μετεμψύχωση*.

Pythagorae doctrinam longe fluxisse ait Tullius (a): & *πρῶτον ἀνδρῶν* ex ipsius schola prodisse tradit Laërtius. Crotoniensis scholae Successio ita se habuit, teste Jamblichō. Pythagorae successit *Aristaeus* Crotoniensis; quem ille, elocata ipsi Theanone filia, generum sibi fecit. Hunc excepit *Mnesarchus* Pythagorae filius. Ei *Tydas* Crotoniates successit. Post hujus obitum cathedra intermissa fuit; revixit autem duce *Aresa*, qui Scholae praefuit: eique successit *Diodorus Aspendius*.

Perhibentur praeterea Pythagoram audiisse *Empedocles* Agrigentinus, *Archytas* Tarentinus, *Epicharmus* Cous, *Ocellus* Lucanus, *Timaeus* Locrensis, *Alcmaeon* Crotoniata, *Hippasus* Metapontinus, *Philolaus* Crotoniata, & *Eudoxus* Gnidius.

At *Empedocles* cum a Laërtio circa Olymp. LXXXIV. floruisse dicatur, Pythagoram audire non potuit. Fortasse Pythagoricum quemdam audit; quippe ipsius doctrina, ut ex fragmentis
apud

(a) *Lib. IV. Tuscul. cap. I.*

SYNOPSIS HISTORICA. 97

apud Veteres colligitur, Pythagoricae sectae scitis consentit.

Archytas quoque Pythagorae auditor esse non potuit. Ipsum enim audiit Plato, atque ab eo Pythagoricam disciplinam didicit Olymp. XCVI. Hujus hodieum exstat liber *de Universi natura* (a), ubi decem praedicamenta explicantur, unde sua hausit Aristoteles;

§. XVII.

De Secta Eleatica.

ELeatenfium Philosophia hoc praecipue sollemnne habebat, Deum scilicet *ὃ ἐν ἑνὶ πᾶσι* unum & omnia esse. Id de Xenophane praeter alios adfirmat Tullius (b): *Xenophanes unum esse omnia dixit, neque id esse mutabile, & id esse Deum, neque natum unquam & sempiternum, conglobata figura.*

In diversa omnia abeunt, qui hujus Sectae placita interpretantur. Nonnulli, inter quos ceteris acrius Petrus Baylius, inter Dei hostes illos esse recensendos, & jam tum Spinozismo prolusisse contendunt. Alii vero nullum non movent lapidem, ut eos atheismi absolvant, & tantae impietatis in Deum immunes fuisse ostendant.

Cudworthus sane, cui & Moshemius adstipulatur, ea formula *ὃ ἐν ἑνὶ πᾶσι* summum Deum designasse, h. e. unam illam maximeque perfectam

Tom. I.

G

na.

(a) *Venetis prodit 1571.*

(b) *Lib. IV. Acad. cap. XXXIII.*

naturam, quae ceteris rebus ortum dederit, pluribus Veterum testimoniis probat: inter quae illud potissimum est, quod Parmenidis ipsius carmina exhibent, quorum fragmenta apud Aristotelem, Simplicium, aliosque exstant. In his quidem Deus describitur, ut natura unica, simplicissima, sempiterna, immutabilis, neque ulli unquam vicissitudini obnoxia.

Deum autem, quem *ἑν ὃν* unum appellabant, simul τὸ πᾶν *universum* ea de causa nuncuparunt, quod res omnes comprehenderet. Atque hinc esse subdit Plotinus, quod Deum *σπουδὴν* adū dixerint: ut nimirum significarent, aut cuncta in semet involuta illum continere; aut ab omni eum parte similem esse & uniformem, *παντάχθω* ὁμοίον, ut ait Simplicius.

Eleaticam Sectam condidit *Xenophanes* Colophonius, quem plerique Eruditi Eusebium secuti Olymp. LVI. ante Christum 538. natum esse arbitrantur. Institutae tamen ab ipso Sectae nomen dedit *Ἐῶς*, Latinis *Velia*, Lucaniae civitas, quae ce ebrioribus ipsius discipulis patria erat.

Xenophanis vestigia secuti sunt *Parmenides* Eleates, cujus aetatem ad Olymp. LXIX. revocandam esse non pauci Eruditi arbitrantur: *Melissus* Samius, Parmenidis discipulus, qui circa Olymp. LXXXIV. floruit: *Zeno* Eleates, quem Philosophiam Logica auxisse Aristoteles, alique Veteres testantur.

Verum Eleatico systemate repudiato *atomistae* Philosophiae fundamenta jecerunt *Leucippus*, & *Democritus*; quorum alter Eleam, alter vero

Ab.

SYNOPSIS HISTORICA. 99

Abderam Thraciae oppidum patriam habuit. Leucippus enim, teste Tullio (a), docuit esse corpuscula quaedam levia, alia aspera, rotunda alia, partim autem angulata, curvata quaedam & quasi adunca: ex his effectum esse caelum, atque terram, nulla cogente natura, sed concursu quodam fortuito. Leucippo adhaesit Democritus, qui, ut idem Tullius (b), atomos censuit in infinito inani, in quo nihil nec summum, nec infimum, nec medium, nec ultimum, nec extremum sit, ita ferri, ut concursibus inter se cohaerescant: ex quo efficiantur ea, quae sint, quaeque cernantur, omnia: eumque motum atomorum nullo a principio, sed ex aeterno tempore intelligi convenire. Hunc Philosophum oculis se privasse, & nunquam sine ritu in publico versatum fuisse nonnulli e Veteribus tradunt; quod tamen commentitium esse plerisque videtur.

Multos Democritus habuit discipulos, quos inter recensentur Protagoras Abderites, quem refert Tullius (c) Atheniensium jussu urbe atque agro exterminatum esse, librosque ejus in concione combustos, propterea quod in principio libri sic posuerat, *De Divis neque ut sint, neque ut non sint, habeo dicere*. Diagoras ex Melo Cycladum insula, qui atheos dictus est, atque aperte Deorum naturam fustulit, teste eodem Tullio (d). Anaxarchus Abderita, alii que.

G 2

Xeno-

(a) Lib. I. de N. D. cap. XXIV.

(b) Lib. I. de Fin. cap. VI.

(c) Lib. I. de N. D. cap. XXIII.

(d) Loc. cit.

Xenophanem audivit etiam *Heraclitus* Ephesus, quem, quoties domo egrediebatur, flevisse Veteres narrant. Heracliticam sectam ab ipso profectam nonnulli statuunt: at idem corpusculari philosophiae operam dedisse aliis videtur. Praeterea non defuisse, qui Heracliti disciplinam probaverint, postquam ipsius scripta in Templi Dianae adytis reposita Graecorum manibus verfari coeperunt, quamplures e Veteribus memoriae prodiderunt.

§. XVIII.

De Secta Epicurea.

A Tomisticum systema, cuius formam ac speciem Leucippus & Democritus adumbraverant, exegit tandem *Epicurus*. Is enim omnium rerum primordia atomos esse statuebat, quae figura ac mole misce discréparent, & vita sensuque carerent. Has vero atomos, quibus duplicem motum *gravitationis* & *declinationis* imperavit, nullo a principio, sed ex aeterno tempore in infinito inani volitasse perhibebat; atque inde factum esse, ut post varias complexiones, copulationes, atque adhaesitationes, cum mille formas & figuras modo induissent, modo exuissent atomi, turbulenta tandem concursione effecerint mundum, quaeque in eo essent omnia.

Hoc quidem physices genus, quod ab individis corpusculis rerum initia arcessit, illuc intendere, ut Deum de medio tollat, nemo est quin intelligat. Et sane Democritus quidquid est

est in orbe religionis & pietatis adversus Deum, nisi e metu ortum non duxisse garriebat. Atque ipsius liguritor Epicurus licet Deos *αἰσχρονομῶντες* invexerit, qui in nescio quibus *intermundiis* habitantes securum aevum agunt, tamen eos jocandi causa induxisse jure videtur Tullio (a).

Porro cum apud Epicurum nihil sit, quod non atomorum turba conficiat; hinc & ipsum animum non modo concursu quodam fortuito ex levibus & rotundis corpusculis effectum fuisse; verum etiam dissoluto corpore, non secus ac cujusdam domus forma, ipsa domo excisa, nulla est, interire atque evanescere decernit. Sententiam porro de animae immortalitate vitae tranquillitati valde repugnare praedicabat. Hinc Lucretius, qui eleganti ac sublimi simplicitate Epicuri dogmata primus Latino carmine exposuit, ita in hanc rem canit (b):

*Et metus ille foras praeceps Acherontis agendus,
Funditus humanam qui vitam turbat ab imo,
Omni suffundens mortis nigrore, neque ullam
Esse voluptatem liquidam, puramque relinquit.*

A quo non longe discedit illud Virgilii (c):

*Felix qui potuit rerum cognoscere causas,
Atque metus omnes & inexorabile fatum
Subjecit pedibus, strepitumque Acherontis avari.*

Epicurus Athenis natus est Olym. CIX. 3. ante Christum 342. ibique sex & triginta annos natus in horto peramoeno Scholam instituit;

(a) Lib. II. de Divinat. XVII.

(b) De Rer. Nat. lib. III.

(c) Georg. II. 491.

quippe Platonici Academiam, Peripatetici Lyceum, Cynici Cynosargen, Stoici denique Porticum occupaverant. Dum inter vivos versaretur, plures habuit & amicos, & discipulos, quos inter supra ceteros eminent *Polyaenus Lampsaecenus*, *manus mathematicus* teste Tullio (a), & *Metrodorus Atheniensis*, quem alterum *Epicurum* appellat idem Tullius (b). Ultra trecenta volumina scripsisse tradit Laërtius (c): nihil autem ex ipsius scriptis aetatem tulit, si pauca quaedam excipias, quae servavit Laërtius, & Petrus Gassendus potissimum illustravit. Porro Epicuri Scholae, postquam supremum ipse diem obiit, decem deinceps Philosophos praefuisse refert Suidas: eorum autem nomina quatuor duntaxat nobis transmisit antiquitas; qui nimirum sunt *Hermachus*, *Polystратus*, *Dionysius*, ac *Basilides*.

§. XIX.

De Pyrrhone & Scepticis.

PYRRHO Eleus, qui paullo ante Epicurum floruit, Anaxarchi discipulus, pictor primum, tum in Democriti libros cum incidisset, Philosophiae operam dedit: variis deinde sapientiae causa itineribus susceptis, illud inde pessime philosophando extudit, nihil nimirum certo sciri posse. Ipsius sectatores non modo Pyrrhonici, sed

(a) *Lib. IV. Acad. cap. XXXIII.*(b) *Lib. II. de Fin. cap. XXXVIII.*(c) *Lib. X. cap. XXVI.*

sed a philosophandi disciplina *Aporetici*, *Sceptici*, *Ephectici*, ac *Zetetici* appellati. *Dogmaticos* porro ipsi nuncupabant, quicunque certa & explorata dogmata tradebant.

Veterem fuisse quaestionem ab ipsis Graecis Scriptoribus agitatam refert Aulus Gellius (a), num *Pyrrhonicos* inter atque *Academicos* aliquid intersit, an sententiae affinitate ipsi amice conspirent. Nihil utrosque discriminare nonnulli doceant. At laudatus Gellius aliquid discriminis inter eos constituit: *Cum haec consimiliter*, ait, *tam Pyrrhonii dicant quam Academici, differre tamen inter sese & propter alia quaedam, & vel maximo propterea existimati sunt, quod Academici quidem ipsam illud nihil posse comprehendere quasi comprehendunt, & nihil posse decerni quasi decernunt, Pyrrhonii ne id quidem ullo pacto videri verum dicunt, quod nihil esse verum videtur.*

Illius discipuli potissimum fuere *Timon Phlaeae*, qui prius in theatris saltatorem egerat, *Hecataeus Abderites*, *Eurylochus*, aliique.

§. XX.

De Eclecticis, ac de Philosophiae ruina, ejusdemque restoratione.

Recensendi ultimo loco veniunt *Eclectici*, qui sub Ecclesiae nascentis exordia novam, neque antea tritam philosophandi viam inierunt. Hi nimirum

(a) Noct. Attic. lib. XI. cap. V.

Nullius additi jurare in verba magistri, veritatem ex omnibus Philosophorum sectis colligere, neque aliquid, quod non antea ad trutinam revocarent, accurateque perpenderent, profiteri studebant.

Primus, qui sectarum excusso jugo, horum hominum dux exstitit, fuisse fertur *Potamon* quidam Alexandrinus, qui Augusto regnante floruit; licet quidam usque ad Alexandrum Severum illius aetatem protrahant. Cum autem Viri hujus scripta perierint; quibus ipse institutis vius fuerit, aut quorum Philosophorum placita ceteris praetulerit, scire nobis hodie negatum est. Platoni tamen magis fuisse conjici inde potest, quod in illius libros de Republ. commentarium, teste Suida, conscripserit.

Hujus autem vestigia plures secuti sunt: potissimum vero *Ammonius* Alexandrinus, vulgo *Saccas* denominatus, qui Christianis parentibus natus, Gentilem postea superstitionem amplexus est; vixit autem sub finem Sec. II. & III. incunte.

Dionysius Longinus incertae patriae, quem *βιβλιοθήκην τινὰ ἡμετέραν*, vivam quamdam ac spirantem bibliothecam appellat Eunapius (a). Ab Aureliano Imp. interfectum fuisse narrat Vopiscus A. C. CCLXXIII.

Plotinus auditor Ammonii natus A. C. CCV. Romae per annos sex & viginti Philosophiam docuit; ac quatuor & quinquaginta libris res Philosophicas profecutus est, qui nimia obscuritate laborant, licet in iis perpoliendis Porphyrius,

(a) *In vitis sophist.*

SYNOPSIS HISTORICA. 105

rius, rogante Plotino, non mediocrem curam impenderit. E vivis excessit Plotinus A. C. CCLXX.

Amelius, sive ut ipse nominari maluit, *Amerius*, natione Tusceus, qui A. C. CCXLVI. ad Plotinum accessit, quem quatuor & viginti annos audivit.

Porphyrius Tyro oriundus, quod sane nomen Longinus ipsi imposuit, cum antea patria lingua *Malchus* appellaretur. Natus est A. C. CCXXXIII. atque ab Origene Adamantio primum institutus, tum Longinum Athenis, ac tandem Romae Plotinum audivit. Tam aspere & ferociter maledictis & contumeliis Christianos incessit, ut ipsius libros e medio auferri Theodosius Imp. jussit. Hinc apud veteres Ecclesiae Patres tamquam *diaboli familiaris*, *omnis pietatis everfor*, *rabidus adversum Christum canis* &c. traditi consuevit.

Jamblichus Chalcidensis, qui Porphyrii vestigia legit, ac tantam famae celebritatem sibi comparavit, ut plurimi eruditionis causa ad ipsum undique concurrerint. Floruit autem Constantino M. regnante; atque ipsum A. C. CCCXXXIII. supremum diem obiisse Viri docti conjectant.

Aedesius Cappadox Jamblichi auditor. Is Perse in Asia Philosophiam docuit; ibique Julianus Caesar ipsum audivit.

Syrianus Alexandrinus, cujus hodie dum exstat in Metaphysicos Aristotelis libros Commentarius. Floruit ab Arcadii & Honorii aetate usque ad Valentiniani II. imperium.

Chrysanthius, quem inter praeceptores suos recenset Julianus.

Eu.

Eunapius Sardibus Lydiae urbe oriundus a Chrysanthio ad Eloquentiam & Philosophiam informatus. Vixisse illum sub Valentiniano & Valente arbitratur Vossius.

Hierocles Alexandrinus, qui sub Theodosio juniore floruit.

Proclus Byzantinus natus A. C. CCCCXII. Athenis Syrianum audivit. Multa scripsit, quorum nonnulla ad nostram usque aetatem transmissa recenset Fabricius.

Procli discipuli fuerunt; eique in Scholâ Atheniensi succedere *Maxinus*, qui Flaviâ Neapolim Samariae Urbem patriam habuit: atque *Isidorus* Gazaëus.

Tandem *Damascius* Damasœnus, quo Athenis docente Justinianus lege cavit, ne Philosophia a gentilibus Philosophis traderetur.

Quos hæcenus recensuimus, *Eclecticis* appellari supra diximus. At iidem *Platoniorum* vel *Pythagoræorum* appellationem affectabant, quorum potissimum vestigia premere gloriabantur. Hinc *juniiores Platonici* nuncupari solent.

Inter Eclecticis locum etiam obtinent veteres Ecclesiae Patres; ac præsertim Clemens Alexandrinus, qui Eclecticam philosophiam, quæ nimirum quaecunque ab aliis sectis recte dicta essent complecteretur, sibi placuisse profitetur (a). Neque enim Christiani, qui Philosophiæ operam navare amabant, aliud poterant, quam hoc philosophandi genus consecrari; quippe cum in omnibus sectis multa sint, quæ a Servatoris nostri

reli-

(a). *Strom. Lib. I. cap. VIII.*

religione prorsus abhorreant , neque cum illa componi queant. Licet prae aliis Platoni magis adhaeserint , quippe Platonicos Christianis esse propinquiores , eosque pacis mutatis verbis atque sententiis Christianos fieri posse ait Augustinus (a).

IS quidem Philosophiae status erat , cum repente simul cum liberalibus artibus , optimisque studiis tali ictu prostrata jacuit ; ut semel atque iterum caput efferre conata , rursus accisa miserrime contabuerit . Postquam enim Romani Imperatores imperii sedem in Thraciam transtulerunt , innumerae pene , eaeque barbarae nationes ex imo Oceano per universas Europae regiones in primisque Italiam effusae omnia diripuerunt , ac devastarunt. Hinc ubique locorum barbaries grassari coepit , adeo ut non longo post temporis intervallo honestarum Scientiarum & Philosophiae potissimum studia perpetuis densissimisque tenebris obscurata , atque adeo sepulta esse viderentur . Resonabat enim undique unius Aristotelis nomen : publicae privataeque Scholae Aristotelica tantummodo verborum monstra , atque ea , quae subtilius Avicenna , Averroës , Alfaragius , aliique Arabes commenti erant , pleno ore praedicabant .

Prima omnium ad bene sperandum de litteris vexillum extulit Italia nostra , quae cum extorres e Graecia Musas in sinum suum recepisset , humaniores artes de Gothicis & Longobardi-

(a) *Lib. VIII. de Civ. Dei, & de Vera Rel. cap. XII.*

dicis tumultis, ubi diu jacuerant, excitavit. Tum quidem Philosophia squallore deterſo priſtinum vultum, longe tamen nitentiorẽ protulit, ope præſertim Mathẽſeos, quæ impenſiore, quam antehac, ſtudio excoli coepit: acceſſerunt etiam experimenta & obſervationes, quas novas quotidie in rerum naturam præclariffimi quique Viri inſtituerunt.

Inſtituti ratio non patitur, ut eos omnes re- cenſeamus, quorum in Philoſophicis diſciplinis exornandis ſtudio adeo effulſit, ut non illae quidem olim fuiſſe minores, ſed omnino vix exiſtiſſe videantur. Quis enim præcipua Philoſophiae lumina pro dignitate prædicaverit, *Baconem Verulamium* in Anglia, *Galilaëum Galilaei* in Italia, *Renatum Carteſium*, & *Petrum Gaſſendium* in Gallia, *Thomam Burnetium*, *Guilielmum Wiſthonium*, atque *Iſaacum Newtonum* in Britannia, *Gothofredum Guilielmum Leibnitium*, & *Chriſtianum Wolffium* in Germania, alioſque, quos longum eſſet commemorare?

Philoſophica Carteſii præſertim, Newtoni, & Leibnitii Systemata ad Logicam feſtinantibus ne delibare quidem licet. Ea tamen licet diſcerpta, & hic atque illic interſperſa, tum in hiſce Metaphyſicis, tum Phyſicis Inſtitutionibus, ſatis exponantur.

Illud duntaxat *παραπύρις* hic animadvertatis volo, philoſophandi rationem, quam pro ſuo quiſque ſtudio laudati modo Viri conſectantur, ſibi proprios præſeferre characteres, quæ una ab altera internoscatur. Peripateticos quidem ſi inſpicias, eos propriis ideis indulgere, ac de me-
ta-

taphysicis physice, de physicis autem metaphysice differere deprehendes. Sin ad Cartesianos spectas, licet ipsi observationibus vacent, tamen naturali de omnibus differendi libidine abrepti hypotheses persaepe fingunt, ut effectuum naturalium rationes reddant.


Contra vero Newtonus totus in hoc est, ut naturae *φαινόμενα* observationibus & experimentis accuratissime institutis penitus inspiciat, rerumque effectus perscrutando eos simul connectat, nihil sollicitus de internis causis, unde illi oriantur. Leibnitiuſ tandem ingenio & phantasiae nimis indulget, licet ex his, quae comminiscitur, recte deducat; adeo quidem ut Scholasticorum philosophandi rationem laudasse, eorumque labefactatam auctoritatem veluti postliminio restituere aggressus esse videatur Fr. Buddeo (a). Atque haec de Philosophiae ortu & incrementis, deque variis Philosophorum opinionibus dixisse sit satis.

LO.

(a) In *Epit. Hist. Philos.* ad §. 92. cap. 6.

LOGICAE

ELEMENTA.



ANTELOQUIUM.

PROVIDENTISSIMUS naturae Auctor
[P] quemadmodum infatigabilem veri in-
 veniendi cupiditatem nobis ingenuit:
 ita ejusmodi viribus rationem nostram
 instruxit, ut veritatem ipsam inve-
 stigare possimus. Naturali enim quadam sagaci-
 tate nullo ducta duce humana Mens *consequentia*
cernit, principia & causas rerum videt, earum-
que progressus, & quasi antecessiones non ignorat,
similitudines comparat, rebusque praesentibus ad-
jungit, atque adnectit futuras: ut loquitur Tul-
lius (a).

Porro *Naturalis Logica* appellari consuevit vis
 isthaec, quam a natura insitam habemus. Eaque
 faciem praefert, ac veluti viam aperit Logicae,
 quam *adquisitam & artificialem* vulgo nominant.
 Usus enim nostrarum virium in veri indagatio-
 ne nos eam Artem docuit, quae vires ipsas au-
 geret

— G I —

(a) *De Offic. Lib. I. cap. IV.*

A N T E L O Q U I U M . III.

geret ac perficeret , & certis quibusdam praeceptis hominis rationem regeret ac juvaret .

Ars igitur Logica quamvis e natura ipsa suam arceſſat originem , maximo tamen opere necessaria est . Nam 1. quae tanquam semina natura nobis indidit , ea doctrinae studio accedente explicantur , ac fecundiora fiunt . 2. Quo per longas ambages , ac veluti tentando sola ratione pervenire possumus , eo Artis praeceptis innixi citius ac facilius ducimur . 3. Perversae opiniones & praejudicia , quibus non raro ab infantia imbuimur , investigandae veritatis iter intercipiunt . Atqui hujusmodi errores nobis Ars detrahit .

Quamobrem Logica humanae rationis culturae destinatur . Illuc enim hujusce Artis praecepta respiciunt , ut eam perspicientiam ratio sibi comparet , qua recte cogitare , suisque cogitationibus verum assequi possit . Eam igitur , doctis Viris praeſeuntibus , *Artem cogitandi* definire possumus .

Jam porro humanae Mentis Intellectus cum insitam sibi cogitandi vim exserit , aut *percipit* , aut *judicat* , aut *ratiocinatur* , aut tandem suas cogitationes *disponit* . Quae quidem variae Intellectus *iripyaai* sive *operationes* , diversi sunt modi , quibus Mens utitur in cognoscendo .

I. *Perceptio* , sive *simplex Apprehensio* dicitur Intellectus cogitatio , qua rem intuetur dantaxat , ac percipit , nihilque de illa aut ait , aut negat . Veluti cum *Solem* , *Arborem* , *Triangulum* nobis ipsi repraesentamus .

Hujusmodi autem rei objectae perceptionem
non

non uno pacto fieri in nobis ipsi experimur. Nam 1. rem percipimus nulla corporea imagine expressam, sed omni utcumque sensibili specie nudatam. Atque isthaec Mentis cogitatio *Intellectio pura* vocatur.

2. Huic adversatur illa, quam *Phantasia*, si-ve *Imaginationem* appellant; qua nimirum res aliqua ita Mente concipitur, ut sensibilis, & corporea illius imago intra nos efformetur, ac veluti depingatur.

3. Eodem *Imaginationis* nomine donatur ea Mentis actio, per quam absentium rerum imagines ita repraesentantur animo, ut eas cernere oculis, ac veluti praesentes habere videamur.

4. His adde *Memoriam*, h. e. vim illam, qua Mens iterum percipit, quae jam percepit, conscia quidem se olim ea percepisse. Quae sane conscientia iteratae perceptionis ita requiritur, ut ea sublata nulla sit memoria.

5. Ad Intellectum etiam attinet *Aisthesis*, *Sensatio* tum *interna*, tum *externa*. Illa quidem est, qua Mens sibi ipsa conscia est eorum, quae intrinsecus contingunt: nimirum & sese, & quidquid intus agit, aut patitur, intimo quodam sensu persentiscit. Haec autem est perceptio rerum externarum, quae corporis sensus afficiunt.

Hic tamen animadvertendum in qualibet sensatione externa duo esse distinguenda, & motionem, quae in sensibus oritur, & Mentis attentionem, qua huiusmodi motionem ipsa sentit. Alterum pendet ab objectis, quae extrinsecus sensibus occurrunt; ita quidem, ut, quo lentior

tior aut fortior in sensuum organis cietur concussio, eo languidior aut vividior in Mente sensus excitetur. Alterum vero adeo ad Mentem attinet, ut nisi id attendat, & adsit, nullos ictus nullosque rerum externarum appulsus sentire queat.

II. Altera Intellectus operatio est *Judicium*. Nimirum Mens inter ea, quae percepit, comparatione instituta, ipsorum convenientiam aut dissensionem agnoscit. Ita *Virtutem esse aestimatione dignam: divitias ad nostram beatitudinem satis non esse* pronuntiamus. Cum enim *virtuti aestimationem* convenire deprehendimus, adfirmantes judicamus: cumque nullum inter *divitias*, & *beatitudinem* nexum intercedere animadvertimus, negantes judicamus. Quamobrem cum Mens *judicat*, aut ait, aut negat rem cum alia convenire.

III. *Discursus* vero sive *Ratiocinatio* dicitur ille intellectus actus, quo duo judicia simul componit, & ex iis tertium colligit. Puta si judicavimus illam esse veri nominis virtutem, quae ad Deum refertur, tum etiam Ethnicos illam ad Deum minime retulisse; hinc deducimus non fuisse veram eorum virtutem.

IV. Postremo *Methodus* dicitur certa quaedam perceptionum, judiciorum, & ratiocinationum series, qua haec omnia recte & apposite ad verum aperiendum disponuntur.

Quamobrem in totidem partes Logica dividatur oportet, quot scilicet modis ad veritatem inquirendam Mens ipsa ducitur.

Illud hic ultimo loco animadvertendum volumus,

Tom. I.

H

mus,

mus , Artem Logicam a sophistica longo intervallo distingui ac separari . Haec enim inani subtilitate verborumque tricis rixandi libidinem fovet : eapropter *ἐπισιχη* , h. e. *contentiosa* a Veteribus appellata communi omnium suffragio repudiatur ac rejicitur ; quippe veritati densissimas potius tenebras obducit , quam lucem affundit .

LOGICAE ELEMENTORUM

P A R S I.

Primum nostrae Mentis gradum , quo ad rerum cognitionem progreditur , illum esse , cum quidpiam cogitatione complectitur , jam diximus . Porro quia dum aliquid concipimus , illius quamdam nobis ipsi notionem efformamus , quam deinde vocibus expromimus ; propterea primo de Ideis , earumque variis generibus , tum de Vocibus quanta maxima fieri potest brevitate differemus .

C A P U T I.

De Ideis .

IDea , (Gr. *Ἰδέα*) quam *Speciem* , sive *Formam* , atque *Exemplar* Latine dixeris , appellatur id quod Mens sibi praesens esse sentit , dum ipsa aliquid percipit . Sic dum *Triangulum* cogito , quod Menti cogitanti obversatur , vocatur Idea .

Cave

Cave autem putes *Idae* vocabulo illum exprimi concipiendi modum, quo *Mens* imagines quasdam in cerebro depictas intuetur. Id enim *phantasia* vocatur, sive *Visio* aut *Visum*, ut Latine reddit Tullius: atque ad *Imaginationem* spectat. Cujusmodi est imago illa, quae mihi dum *florem* cogito, *florem* ipsum exhibet.

Licet autem ita comparati sumus, ut fere nihil nisi corporea quadam indutum imagine percipere possimus; multa tamen sunt, quae sub *Imaginationem* non cadunt. Ita si *Triangulum* considero, facile est illius effigiem exprimere. Verum si *chiliogonum* mente concipiam, nunquam assequi potero, ut hujus figurae species mihi obijciatur: quamvis *chiliogonum* percipiam, atque illius proprietates perspectas habeam.

Ut igitur veram *Idae* notionem assequamur, expungamus oportet quascunque sensibiles imagines, quas veluti depictas in cerebro *imago* nobis offert. Ea cogitatio, quae nobis obversatur, quam nobis inesse sentimus, cum aliquid percipimus, erit *Idea*.

§. I.

De Ideis secundum originem inspectis.

JAM vero *Idearum* multa sunt genera. Nam si earum attendas originem, aliae dicuntur *Adventitiae*, aliae *Factitiae*, aliae *Innatae*.

Adventitiae, quas etiam *acquisitas* vocant, sunt quae a rebus externis per sensus veluti per totidem vias ad *Mentem* perveniunt; cujusmodi

H 2 sunt

sunt ideae omnes rerum corporearum, quae sensibus hauriuntur.

Factitiae appellantur illae, quas ipsa sibi Mens efformat : cum ex ideis comparatis aut componendo, aut separando, aut alio quovis pacto novas effingit. Veluti cum humano capiti cervicem equinam jungimus : vel longitudinem neglecta latitudine & profunditate contemplamur.

Innatas tandem eas quidam Philosophi dixerunt, quas vel facile & necessario adquirimus, vel insitas & quasi in animo consignatas habemus.

§. II.

De Idearum Proprietatibus.

Idae ratione suarum affectionum consideratae I. sunt *Clarae*, aut *Obscurae*. Porro in huiusmodi claritate definienda vehementer dissentiunt Philosophi ; neque mirum, cum nominum definitiones ab hominum pendeant arbitrio. Sed quoniam verborum sententia ad communem usum, & vocum proprietatem exigenda est ; hinc accuratius eam definiendam ducimus.

Idae *clarae*, atque *obscurae* denominatio ab externa visione desumpta est. Harum igitur vocum sententia non aliunde rectius hauriri poterit, quam ex eo, quod clarum aut obscurum esse perhibetur in iis, quae oculis subjiciuntur. Nam *haec vel summa laus est verbi transferendi, ut sensum feriat id, quod translatum sit*, ait Tullius (a). Res

(a) *De Orat. Lib. III. cap. XLI.*

Res autem corporeae *clare* oculis conspici vulgo dicuntur, cum ita nobis repraesentantur, ut figuram, colorem, ceterasque ipsarum proprietates perspiciamus. Contra vero ea *obscure* cernere dicimus, quorum vix specie inspecta nullas peculiare dotes deprehendimus.

Quamobrem illa *clara* Idea appellanda esse videtur, quae rei objectae proprias, non communes duntaxat cum aliis proprietates repraesentat; *obscura* vero, cujus ope non peculiare, sed communes cum aliis proprietates exhibentur.

Haec autem claritas atque obscuritas major aut minor esse potest; illae enim Ideae clariores erunt, quae plura & magis propria rei attributa praeseferunt: quemadmodum obscuriores, quae pauciora, & communiora Mentis oculis subiiciunt. Uno verbo: clarior Idea proprietates magis determinantes, obscurior minus rem definientes prae se ostendit.

Rem exemplo illustrabimus. Procul homo apparet, cujus neque speciem neque motum aliquem aspicimus; rem extensam ac stantem duntaxat intuemur. Atque hinc longe positum hominem *obscure* cernimus. Idea igitur, quae nobis obversatur, obscura est; propterea quod existentiam & extensionem duntaxat percipimus, quae quidem sunt proprietates illi cum aliis rebus communes. Nimirum hominem illum longe positum nobis repraesentamus veluti rem quamdam *indefinite*. Deinde paulatim adventantes, formam aliquam, motum aliquem deprehendimus; sed nec vultum, nec membra, nec incessum cernere licet. Hinc autem minus *obscure*

ille nostris oculis objicitur . Quae igitur illius idea intellectui nostro sistitur , minus obscura erit . Sunt enim minus communes , quas deprehendimus proprietates . Donec tandem cum prope adesse datur , os artusque hominis , ceterasque ipsius dotes oculis subjectas dilucide perspicimus . Hic vero quemadmodum *clare* illum videmus , ita clara illius idea nobis obversatur . Quippe proprietates , quas exhibet idea , homini sunt peculiares , illumque definiunt .

Ita quoque si quis Quadratum ut figuram planam quadrilateram duntaxat conciperet , obscuram illius ideam haberet ; quippe id commune est pluribus aliis figuris . Haec autem clara erit , si illud & quatuor aequalibus lateribus praeditum , & rectangulum esse norit .

II. Claras atque obscuras excipiunt *Idaeae Distinctae* , & *Confusae* . Nonnulli claras a distinctis nihil distare adserunt ; quae enim sunt clarae , eas & distinctas esse ajunt . Verum aliquando *Idaeae* licet clarae , haud tamen sunt distinctae . Quod quidem tribus fere de causis oriri solet .

I. Fieri enim potest , ut quis privatas rei aliqujus notas cognitione assequatur , at eas non singillatim , sed universe veluti uno obtutu consideret : ita quidem , ut illas intromoscere nequeat . Ex.gr. Idea Quadrati & clara erit , & distincta , si ita illud mihi exhibeam , ut & quatuor laterum aequalitatem , & angulos rectos singillatim contempler . Verum haec confusa erit , si quis Quadrati proprietatem , qua omnes angulos rectos habet , non apte secerneret ab ea , qua latera habet aequalia .

2. Ex

2. Ex alio praeterea capite Idearum confusio proficiscitur: si nimirum rei alicujus idea simul admiscet proprietates oppositas, aut diversas ab illa, quae repraesentatur. Hoc vitio laborabat Animae idea, quam plerique veteres Philosophi habebant, qui subtilissimam quamdam materiam ipsi adscripserunt.

3. Demum illud in Ideis confusionis origo esse solet, quod rei objectae proprietates cum nostrae Mentis affectionibus permiscemus. Veluti cum calorem illum, quem manu ad ignem admota sentimus, ita confundimus, ut illum in igne esse existimemus: vel cum doloris sensum manui, non Menti inesse nobis persuademus. Si triplex hoc vitium absit, Ideae erunt Distinctae.

III. Idea aut eas exhibet proprietates, quibus res ab omnibus aliis semper secerni possit: aut non item. Si primum, Idea dicitur *Completa*; sin alterum, *Incompleta*. Si fluvium Mente concipiam aquarum congeriem esse, quae alvo continentur, & pondere suo decurrentes in mare se mittunt: completam fluminis ideam habeo. Esset autem incompleta, si flumen ut aquarum vim, quae pisces alunt, mihi exhiberem; id enim & lacui, & paludi commune est.

IV. Si proprietatum omnium, quae in re objecta reapse insunt, notiones distinctas Mente complectar: tum demum haec Idea *Adaequata* vocabitur: secus vero, *Inadaequata*.

Ex his porro patet: 1. Ideam claram esse quoque completam. Peculiares enim rei proprietates sunt, quae rem ipsam a ceteris discriminant.

2. Ideam obscuram esse incompletam. Quippe per communes proprietates res ab aliis non secerantur. 3. Non oportere adaequatam esse ideam, ut sit clara: sive ideam claram non esse adaequatam. Neque enim omnes omnino proprietates, sed eas, quae rem definiunt, perspectas habeamus oportet, ut clara nobis adsit rei idea. 4. Ideas omnes adventitias esse inadaequatas. Rerum enim, quarum ideas per sensus adquirimus, omnia ad unum attributa certo scire non possumus.

V. Ideae aliae sunt *Simplices*, aliae *Compositae*. Simples vocantur illae, in quibus ne Mente quidem plura distinguere licet. Hujusmodi sunt Ideae sensuum, sive sensationum. Nemo enim in coloris coerulei, in odoris rosae, in singularis cujusvis soni, aut saporis sensu partes ulla viderit, quas distinguere & designare possit.

Eidem simplicium classi adscribendae sunt Ideae cogitationis, voluntatis, doloris, voluptatis, aliarumque Mentis affectionum. Nam si consideremus quid sit *velle*, *judicare* &c. incassum in iis partes distinguere adnitemur.

Compositae vero dicuntur, in quibus plura distinguere, & seorsum intelligere possumus; eae nimirum sunt, quae ex pluribus Ideis simplicibus constant. Quare ideae omnium corporum sunt compositae, cum in iis possimus partes quasvis sine aliis intelligere. Eiusdemmodi sunt Ideae omnes *collectivae*, ut Civitatis, Exercitus &c. Item compositae sunt Ideae Virtutum, & Vitiorum.

VI. Tandem Ideae in *Falsas*, & *Veras* vul-

g^o distingui solent. Porro si Ideas prout Menti repraesentantur accipias, nullus in iis falsitati locus esse potest. Illae enim non sunt, nisi rerum formae animo comprehensae, fieri igitur non potest, ut id, quod Menti obversatur, ibi praesens non sit. Sic idea *Centauri*, cum Menti objicitur, perinde falsa non est, ac vox ipsa *Centaurus*, cum ore exprimitur, aut litteris consignatur.

Verum Ideae falsitatem admittere possunt, si ad aliquod exterius referantur; in hac enim relatione tacite Mens judicat eas rei externae aut convenire, aut repugnare; ex quo quidem iudicio fit, ut ipsae Ideae falsae sint.

Id autem contingit, 1. cum quis sibi persuaadet communes se habere cum aliis rerum Ideas, quae iisdem apud omnes nominibus donantur. Si enim simplices Ideae excipiantur, quas alias in aliis hominibus vix reperies: ideae ferme omnes compositae huiusmodi falsitati obnoxiae esse possunt.

2. Cum quis Ideas, quas habet, respondere rebus existimat, quae tamen in rerum natura non existunt. Hoc pacto falsa est idea *Centauri*.

3. Demum cum Ideas, quae rei alicujus omnes proprietates minime prae se ostendunt, perfecte rem exhibere Mens judicat.

§. III.

De Mentis Abstractione.

Humanæ Mentis imbecillitas, quae omnes rei objectae proprietates uno obtutu com-
pre-

prehendere nequit, in caussa est, cur res veluti in partes distributas singillatim contemplemur. Quem quidem cognoscendi modum Schola *Praecisionem* & *Abstractionem* appellat.

Jam vero *praecisionis* ope rei alicujus proprietates alias ab aliis seorsum consideramus. Hujusmodi praecisionem in *objectivam*, & *formalem* distinguere licet. Praecisio objectiva est, cum ex proprietatibus, quibus reapse res afficitur, unam & reliquas deinde ab aliis sejunctas contemplamur. Veluti cum Auri proprietates *gravitatem*, *colorem*, *ductibilitatem*, *fusilitatem* &c. alias ab aliis separatas confidero.

Formalis vero, cum is ordo in rei diversis proprietatibus considerandis servatur, qui totus ab intelligentia pendet: Si nimirum distincta in re quapiam attributa apprehendo, quae seorsum confidero: ut cum generis & differentiae rationem veluti duo distincta mente assequor: vel cum essentiam ab existentia separatam considerant Metaphysici.

Praecisionis usus perutilis est, atque omnino adhibendus in implicatis quaestionibus extricandis. Eas enim rei proprietates exquirere & discutere oportet, quae ad quaestionem solvendam solae conducunt, alias vero negligere: quae potius implicarent, quam enodarent quaestionem.

Abstractionis opera utimur, cum omissis iis, quae singulorum rerum propria sunt, ad illud attendimus, quod his omnibus commune est. Veluti cum pluribus collatis hominibus *ἀνθρωπείνην* *humanitatem* seorsum ab iis contemplamur. Hanc *universalem abstractionem* Scholae appellat.

pellant : quia per eam notio exprimitur , quae omnibus univérse ejusdem generis rebus convenit.

§. IV.

*De Ideis Singularibus , Particularibus ,
& Universalibus .*

Singularis Idea ea est , quae singularem rem quamdam , seu *ἁπλοῦς* certam exprimit : veluti est Idea hujus hominis , hujus corporis , certae scilicet cujusdam rei .

Haec autem *particularis* facile fieri potest , si rem unam quidem , non tamen definitam , *ἁπλοῦς* , ut ait Theophrastus , exhibeat : qualis est idea cujusdam hominis , cujusdam arboris .

Quod si Mens res singulares suis singulas proprietatibus spoliét , *universalis* idea exoritur , quae nimirum eas sub una eademque ratione , in qua conveniunt , repraesentat .

Jam vero hujusmodi communes notiones , quibus res considerare possumus , ad quinque classes vulgo revocantur . Eas Stoici *κοινὰς* notiones , Peripatetici *κατηγορήματα* praedicata , Scholastici vero *universalia* , & *praedicabilia* vocant , quippe quae possunt *praedicari* , h. e. dici atque enunciari de aliquo . Haec autem sunt *Genus* , *Species* , *Differentia* , *Proprium* , & *Accidens* : uti ea recensuit Porphyrius in *Εἰσαγωγή* de Praedicabilibus .

Genus est Idea attributi , quod , ut ait Cicero (a) , *sui similes communione quadam* , specie
au-

(a) *De Orat. Lib. I. cap. XLII.*

autem *differentes*, duas pluresve complectitur partes. Sic *Idea Entis* communis est tum *Substantiae*, tum *Modo*: quemadmodum *Idea Substantiae* complectitur *corpoream*, atque *incorpoream*.

Duplex autem distinguitur *Summum*, ac *Medium*. Illud summum quidem occupat fastigium, nullique subicitur: ut *Ens*, vel in Geometria *Figura*. Hoc, quod *interjectum* alii appellant, ita genus est, ut possit esse species; cujusmodi est *Corpus*, *Substantia*, atque apud Geometras *Figura plana*.

Species sunt hae, in quas, ut ait Tullius (a), *Genus sine ullius intermissione dividitur*: veluti sunt *Substantia*, & *Accidens*, quae sunt species *Entis*.

Verum hujusmodi *Idae* si ad communiores referantur, Species; si ad minus communes, *Genera* vocantur. Ita apud Geometras *Triangulum* ad *Figuram planam* relatum Species est; Genus autem, si ad *Aequilatera*, *Isoscelia* &c. referatur. Quare nonnullis ea dicitur Species, quae ejusmodi est, ut nequeat esse Genus; infima scilicet, quae proxime res singulares attingit. Hanc Stoici *ἰδος εἰδικάτων*, Scholastici vero *Speciem specialissimam* appellant.

Differentiam definit Porphyrius id, quo Species Genus excedit. Genus enim in Species dividitur; cujusque igitur Speciei idea aliquid complectatur oportet, quod Generis Idea non praese gerit: atque hoc scilicet est, quod *Differentia* di-

dicitur. Ita quod Triangulum tribus comprehendatur lineis, est illius Differentia.

Porro Differentia vel est *Specifica*, vel *Numerica*. Illa Speciem dividit a Specie; haec ejusdem distinguit Speciei individua, res nimirum singulares, quae solo numero differunt.

Attributum, quod necessario Differentiae conjungitur, *Proprium* dicitur. Ita Trianguli proprietas est, ut duo ejus latera, utcunque sumantur, majora sint tertio. Verum attributum, quod a re sejunctum nihil detrimenti hujus essentiae affert, *Accidens* appellatur; ut in cera rotunditas.

§. V.

De Ideis ad objecta relatis.

IDeae, quas sibi Mens comparat, perinde inter se differunt, ac res ipsae, quae ideis repraesentantur. Ita si *Auri* pondo mihi objiciatur, non modo illud veluti rem aliquam, quae per se constet, mihi exhibeo; verum etiam illius figuram, puta *rotunditatem*, aliquid *ordinis realitatis* habere percipio: quamvis duo haec valde inter se distare deprehendam. Quippe ita aurum existit, ut ipsius existentia propria & peculiaris non sit eadem, atque existentia aliorum corporum, quibus circumsepitur. At rotunditas sua caret existentia, sed veluti auro adhaerens existit; quippe illius existentia eadem est, atque auri, quod ea figura afficitur.

Inde igitur Substantiarum & Modorum ideae efformantur. *Substantiae* enim sive *Rei* vocabulo de-

designamus illud, quod per se constat, suam habet existentiam, seorsum ab aliis existit. *Modum* vero dicimus quodcunque propria destitutum existentia, in re, ejus modus est, existit. Nimirum Substantia est, Modus vero inest.

Verum hujusmodi ideae licet inter se discrepent, ita tamen secum conveniunt, ut altera ex altera proficiscatur. Substantiarum enim ideae constántur ex ideis modorum seu proprietatum, quas arctíssimis veluti vinculis colligatas simul cohaerere percipimus. Earum scilicet *συνήμα collectionem* unius substantiae nomine nuncupamus. Ita extensionem, divisibilitatem, inertiam, soliditatem, mobilitatem &c. simul coagmentatas *Corpus* appellamus. Ea porro quasi vincula quibus secum proprietates cohaerent, rationes sunt, quibus aliae in aliis continentur. Ita ratio divisibilitatis & figurabilitatis comprehenditur in extensione: impenetrabilitatis in resistantia &c.

Contra Modorum ideae a Substantiarum ideis lucem mutuuntur. Modus enim idem reapse est, ac Substantia ea *αὐτῶν essendi* ratione praedita, tali scilicet pacto modificata. Facilius igitur est modum assequi, si rem, cui ille inest, cogitatione complectar.

Ex his patet novam esse Substantiae notionem, quam more suo tradit Joannes Lockius (a). Is enim Substantiam definit *ὑποκείμενον*, *subiectum* ignotum, quod *substratum* est, nimirum basis ac fundamentum proprietatum, quas ope sensuum

ex-

(a) *Essai de l'Entend. Hum. Liv. I. chap. III. §. 13. Liv. II. chap. XXIII.*

existereprehendimus, & sine re aliqua *substante* esse non posse arbitramur. Atque hinc ipsum *substantiae* vocabulum factum esse subnectit; quippe exprimit id, quod *substat*, h. e. subest modis. Quamobrem singularum rerum ideas nihil aliud praesefere docet, nisi proprietatum simul existentium collectionem, quibus subest ignotum quoddam subjectum. Ita cum *Corpus* dicimus esse *rem extensam, solidam, mobilem &c.* nihil aliud intelligimus, quam nescio quod subjectum, quod veluti fulcrum subest extensioni, soliditati &c. Eadem differit Joannes Clericus, cui mos est Lockii scrinia compilare (a).

Verum non recte Lockius expendit substantiae generatim inspectae notionem, quam singularum substantiarum ideis adnectere solemus. Nimirum ea est humanae Mentis indoles, ut, singulis rebus ideam generis, ad quod illae pertinent, semper adjungat. Quod quidem eo consilio fieri quisque videt, ut rem ignotam per notam generis ideam perspectam habeamus. Eapropter in definitionibus, uti mox dicemus, genus ac differentia adhiberi solent. Ita cum concipimus *Triangulum*, nobis repraesentamus *figuram planam*, quae tribus lateribus continetur: nimirum Generis ideam praemittimus. Idem praestamus, cum aurum, cum lapidem, cum arborem, cum ceteras quasque res mente complectimur.

Porro in eo vehementer fallitur Lockius, quod hanc generis ideam illum esse subjectum docet, quod nobis ignotum proprietatibus subesse

(a) *Tom. II. Oper. Philosoph.*

esse arbitremur. Hujusmodi enim Lockii *substratum* non est, nisi vaga quaedam, communis, atque indefinita idea, quam singulis rebus adscribere consuevimus. Ita habemus ideam vagam Substantiae, Figurae, Numeri, Corporis, Arboris &c. quae tribuitur singulis substantiis, singulis figuris, singulis numeris &c. Absurdus autem esset, qui vagam hanc ideam veluti rem quamdam ignotam sibi repraesentaret, quae reapse existat, & ab ipsis peculiaribus rebus distinguatur. Nullus hominum cum triangulum figuram esse dicit tribus lateribus comprehensam, sibi persuadet quamdam figuram esse, quae diversa a spatio tribus lineis comprehenso trianguli proprietates in se recipiat.

Quamobrem cum peculiares Substantias animo complectimur, cavere debemus, ne substantiae generatim inspectae notionem cum illarum ideis temere confundamus. Frustra enim erimus, si incognitam rem investigemus, quae veluti quaedam basis simul cohaerentes proprietates sustineat. Potius igitur semota generali Substantiae notione, cohaesionem, complexionem, coagmentationem proprietatum, quae simul sunt, ac simul apparent, Mente complecti debemus.

Jam vero substantiae ipsius *Essentiam* appellamus eam proprietatem, quae prima occurrit, prima concipitur, prima reliquas antevertit, qua neglecta ceterae concipi nequeunt; quae tandem ceterarum rationes in se comprehendit. Atque hinc reliquae proprietates in duas classes dividuntur. Aliae a Substantia sine ejusdem Essentiae detrimento separari non possunt; is enim est

est illarum character, ut si a Substantiis abstractione disjungantur, res ipsas animo complecti non liceat. Aliae vero Substantiae adesse, atque abesse possunt incolumi ipsius Essentia; quippe ea est illarum nota, ut licet ipsas negligamus attendere, rei tamen cognitionem penitus assequamur.

Quae ad primam modorum classem attinent, *Essentiales proprietates*, seu *Attributa*: quae vero ad alteram, *accidentales*, seu *Accidentia* Schola Philosophorum appellat. Illa *neccessario*, haec vero *contingenter* Substantiis inesse vulgo ajunt. Ex. gr. Trianguli essentia fita est in ternario linearum numero, quibus comprehenditur. Illius essentiales proprietates sunt, quod bina quaecunque latera tertium excedant, quod anguli omnes duos rectos adaequent &c. Accidentales vero, quod rubrica pictum aut carbone Triangulum in tabula exstet.

Substantiarum & Modorum ideis *Relationum* ideae adjungi possunt. Hoc vocabula *relationis* nominatur ea idea, qua ad aliam contemplandam ducimur. Ita cum aliquem *Patrem* appello, Mens statim fertur ad *liberos*, quos genuit; quare illius idea, quae mihi obversatur, complectitur etiam filiorum procreationem.

Atque haec Relatio quamvis ad Mentem pertineat, ipsi tamen rei innititur, sive in ea *fundamentum habet*, ut Scholae loquuntur; quatenus caussam adfert, quare Mens illam cum alia comparet. Porro hujusmodi relationes innumeras esse nemo non videt; quippe nulla res est, quae nequeat alterius cogitationem excitare; vel enim singulae hujus universitatis res veluti factae at-

que e nihilo eductae ad suum Creatorem referuntur.

§. VI.

De Definitione, & Divisione.

Logicae munus esse, ut rem definiat, & genera dispertiat, jam olim advertit Cicero (a); atque illud ad simplicem Mentis Perceptionem pertinere docuit Aristoteles. Porro I. Definitio, ut ait laudatus Cic. (b) est *oratio, quae quid sit id, de quo agitur, ostendit quam brevissime.*

Est autem duplex, altera *Nominis*, altera *Rei*. Illa verborum perspicuitati consulens vocum notiones patefacit. Haec vero involutae rei notitiam aperit.

Jam porro *Rei* Definitio alia dicitur *Essentialis*, alia *Descriptiva*. *Essentialis*, quae rei naturam explicat per attributa essentialia; quorum quae sunt communia cum aliis, dicitur *Genus*; quae vero privata, *Differentia*. Veluti cum Triangulum definitur *figura plana, quae tribus lateribus continetur*. *Descriptiva* vero, qua res explicatur per proprietates, quae rei naturam non constituunt: ut cum Hominem dicimus *animal bipes, implume, capite erecto &c.*

Rectae Definitionis regulae sunt: .i. Ne angustior sit aut amplior re definita, sed cum illa
reci-

(a) *V. Tuscul. XXV.*

(b) *Orat. XXXIII.*

reciprocetur . 2. Ut brevis sit , modo non sit manca ; hoc autem fit , si proximum genus , & propria differentia adhibeatur . 3. Tandem ut sit clarior re definita .

Demum hîc monuisse supervacaneum non erit, cavendum esse, ne nominis definitionem cum rei definitione confundamus . Illa enim , cum vim verborum ex communi aut propria opinione aperiat , a nostro pendet arbitrio : haec vero nostri juris non est , sed cum re ipsa convenire oportet ; quippe quae naturam rei , seu quid res est , explicat .

II. Divisio est *totius in partes distributio* . Totum autem in Schola aliud dicitur *Logicum* , aliud *Physicum* . Logicum partes habet sibi subjectas , quas potestate quadam continet : ut *animal* , quod dividitur in *hominem* , & *belluam* . Physicum partes habet , ex quibus reapse componitur : veluti cum *homo* e corpore animoque constare dicitur .

Ut Divisio recte instituatur , quatuor serventur oportet . 1. Ut nulla pars neque praetermittatur , neque redundet . 2. Pars una aliam non complectatur . 3. Gradatim & per membra proxima procedat . 4. Non fiat in partes nimis minutas : *Dividi enim , ad rem Seneca (a) , non concidi utile est . . . Idem enim vitii habet nimia , quod nulla divisio : simile confuso est quidquid in pulverem usque sectum est* .

C A P U T II.

De Idearum signis, seu de Vocibus.

PLura sunt, quae de Vocibus disputari possent. Sed de his Grammatica potius, atque Ars Critica jure suo agunt. Quae igitur utiliora, & rei Logicae affinia videntur, duntaxat feligemus.

§. I.

De Vocum Origine.

NULLa esset humani generis societas & communitas, si quas taciti nobiscum ipsi revolvimus ideas, cum aliis communicare minime liceret. Omnino oportebat, ut aliqua suppetere signa, quae veluti cogitationum interpretes, nostri animi sensa aliis aperirent.

Nihil igitur aptius accommodatiusque ab auctore naturae excogitari potuit, quam ut internae Mentis cogitationes humanis vocibus alligerentur. Varia enim & propemodum infinita sunt, quae animus secum ipse agitare solet; ea igitur vix aut ne vix quidem alia via patefieri potuissent, nisi vocum opera adhibita, quarum sonus innumeris modis facillime flectitur.

Idae autem non ita vocibus nexae & jugatae sunt, ut naturalis vocum sit indoles, ideas per
se

se significare . Ab hominum enim pendet arbitrio , ut certis quibusdam vocabulis haec aut illa notio subjiciatur . Quod quidem adeo verum est , ut eadem voces apud diversas nationes non idem sonent , atque eadem notiones variis vocibus exprimantur .

§. II.

De Vocum Divisione .

JAM porro Voces non unius sunt generis . Nam 1. Nomina prout res , quas indicant , magis minusve patent , ita sunt aut *universalia* , aut *particularia* , aut *singularia* : ut cuivis ex his , quae de Ideis diximus , intelligere datur . Illud hic animadvertendum est , bonam nimirum nominum partem , unde diversae nationum linguae coalescunt , esse *universatium* : h. e. ea communem quamdam ideam singularibus rebus accommodatam exprimere . Quod sane mirum forte videri poterit , cum res omnes , quibus indicandis adhibentur , sint singulares .

Porro quod generalia isthaec vocabula homines procuderint , non temere , sed necessario quodam consilio factum est . Si enim singulis rebus singula nomina imposita fuissent , tanta foret vis vocabulorum , ut ea memoria complecti minime possemus . Neque haec nominum copia nostris sermonibus usui esset aut emolumento ; nam eam gigneret in dicendo obscuritatem , ut non paucorum nominum sensus auditoribus lateret . Illa igitur duntaxat privatis nominibus notari

confueverunt, quae saepe singillatim nominare oportebat. Videtis Lockium (a).

2. Praeterea nomen aliud est *συμάνυμον*, quod Schola *Univocum* appellat: aliud *ἀμύνυμον*, sive ut Latini loqui amant *Ambiguum*, sive ut Scholae arridet *Aequivocum*: aliud tandem *Analogum*. Synonyma sunt ea, quae secundum unam eandemque rationem pluribus tribuuntur, veluti vox *Homo*, quae eadem notione aequae Cajo, & Semponio adscribitur.

Contra vero Homonyma plane diversa significant, veluti vox *Aries*, quae modo belluam, modo machinam bellicam, modo signum caeleste significat.

Haec autem si propter proportionem aliquam pluribus rebus accommodantur, proprio & certo vocabulo dicuntur Analoga. Ita Ex. gr. quemadmodum *Caput* pro membro principali & summo in homine usurpamus, sic montis, arboris, aliarumque rerum fastigia eodem nomine donamus. Hujusmodi sunt voces omnes, quas *translatas* Grammatici appellant.

3. Nomen vel est *Finitum*, sive *Positivum*, quod scilicet rem certam significat, ut *homo*, *arbor* &c. Vel est *Infinitum*, sive *Negans*, nimirum quod rem non determinatam exprimit, aut rem aliquam simul, atque ipsius rei negationem vel absentiam praefert, ut *non homo*, *insipidus*, &c.

Atque haec sunt pauca e multis, quae ex
Ari-

(a) *Essai Philosoph. de l'Entendement Humain*
Liv. III. chap. III.

Aristotelis Lib. de Categoriis expromunt Scholastici; cetera enim ab usu remota sunt.

§. III.

De recto Vocum Usu.

Ejusmodi potissimum usui verba accommodata sunt, ut quibus de rebus velimus, inter nos communicemus. Eo igitur sermo intendit, ut eas in auditorum animis ideas verba excitent, quae loquentis animo obversantur. Porro cum ideas inter & vocabula nulla intercedat naturalis affinitas, sed ex hominum arbitrio proprium sensum accipiant: his sane vitio vertendum est, si sermo interdum obscuritate laboret.

Ut igitur pro eo, ac Philosophos praesertim decet; recte vocibus utamur, aliquot hic proferemus canones, ad quorum normam sermones nostros instituemus.

Et I. quidem: Eas duntaxat voces usurpare licet, quibus certae cujusdam ideae notionem destinamus. Si enim verborum nulla est vis ac ratio, inania omnino erunt perinde, atque avium citharaeque cantus.

In hoc autem peccare facile solemus, quia a teneris, ut ajunt, unguiculis voces proferre adfuevimus, ut significaremus quae aut obscurissime, aut nullo pacto noveramus. Hujusmodi sunt, ut quaedam attingam, *Casus*, *Fortunae*, *Fati* &c. nomina, quae non modo inter rerum causas retulere, verum etiam veluti numen aliquod plerique e veteribus Ethnicis coluerunt. Ita inanes

quoque voces olim obtrudebat Epicurus, cum Deos *quasi corpus*, & *quasi sanguinem* habere comminifcebatur; quod ei exprobrat Cotta apud Ciceronem (a).

II. Obscurae aut confusae Ideae verbis adjungendae non sunt. Neque enim alio e fonte major intelligendi sermonis difficultas proficiscitur, quam e vocibus, quibus obscura, aut confusa subjicitur sententia.

Hoc quidem vitio laborant Scholastici, qui res vagis vocibus definiunt, & proprietates secum pugnantes simul admiscunt: veluti cum Motum ajunt esse *actum Entis in potentia quatenus in potentia*: aut cum Naturae *Vacui horrorem, antipathiam, sympathiam* adscribunt; aut cum edisserunt *Naturam appetere formas perfectiores: possibilem esse materiam spiritualem*: atque id genus alia.

III. Quare ad obscuritatem fugiendam a vocibus ambiguis accurate abstinere debemus. Cum illae in duas pluresve sententias accipi possint, nisi earum vis facile dignoscatur, obscuram reddunt orationem.

Quod si res suum nomen, & proprium vocabulum non habet . . . necessitas cogit, quod non habeas, aliunde sumere, ut ait Tullius (b). Verum hujusmodi translationes prudentes esse oportet, ut idem monet (c), ut cum ratione in consimilem rem transeat: atque ita translatae voces ad-

(a) *De Nat. Deor. Lib. I. cap. XXVII.*

(b) *De Orat. Lib. III. cap. XL.*

(c) *Seu Auctor ad Heren. Lib. III. cap. XXXIV.*

adhibendae, ut ex orationis contextu facile illarum sensus eruatur.

IV. Iisdem vocibus eadem semper notiones subjiciantur. Perverse enim vocibus abutimur, si haud nobis constantes iisdem verbis modo hanc, modo illam sententiam adscribimus. Cujus quidem vitii unos fere Mathematicos puros esse fatentur omnes.

V. Studiose cavendum est, ne dedita opera obscuritatem affeātemus. Peccatum hoc admittunt, qui usitatis vocabulis novos sensus affingunt, alios id praemonere negligentes: qui nova inducunt, ea non definientes: qui eo stilo utuntur, ut ipsam oratio nullas certas ideas, sed veluti quaedam aenigmata referre videatur. De hoc autem praeter alios communi sententia accusantur Scholastici, qui tot tamque insolentibus vocabulis res Philosophicas implicuerunt, ut eorum scripta Saliaris Carminis vincant obscuritatem. Ejusmodi sunt *Materia prima*, *Formae Substantiales*, *Species Intentionales*, *ιδεαίχνα*, sive *ιντελίχνα*, & alia hujus generis sexcenta.

§. IV.

De Arte Hermeneutica.

Philosophi etiam interest, ut alios probe intelligat, praesertim cum veritas non una meditationis via investigetur, sed ex aliorum quoque libris eruatur. Propterea recensitis regulis eas adnectere abs re non erit, quarum ope aliorum mentem assequi recte possimus.

Au-

Antequam ad alicujus libri lectionem accedamus, multa nobis comperta sint oportet. 1. Linguam, qua ab auctore exaratus est, omnino calere debemus; quaecunque enim elaboratissimae versiones illius mentem haud perfecte aperire possunt.

2. Curandum est, ut auctoris mores, tum etiam consuetudines, & religionem Civitatis, in qua ipse floruit, in explorato habeamus; cum sibi simillima, & patriae moribus affinia quisque scribat, ac loquatur.

3. Diligenter aetas, qua vixit auctor, inquiretur, ut eo sensu vocabula accipiamus, quo nimirum tunc temporis usurpari in more positum fuit. Nihil enim frequentiores, quam vocabula, vicissitudines subire videmus, quae pro temporum varietate varia notione donari consueverunt.

Jam vero postquam haec nobis constiterunt: 1. talem animum ad librum legendum appellamus oportet, ut quibusque praejudiciis ille liber sit & vacuus. Secus enim ea illic videre videbimur, quae ne cogitavit quidem, nedum scripsit auctor.

2. Verba sensu usitato & trito sunt accipienda, nisi vel absurdum, aut nullum sensum reddant, vel eam exprimant sententiam, quae adversa fronte pugnet cum auctoris instituto. Recta enim ratio postulat, ut sanae mentis hominem neque inanibus vocibus delectari, neque sibi non constare existimemus.

3. Cavendum est, ne Scriptori tribuatur sensus, quem metaphoricae locutiones primo ostendunt; siquidem in metaphoris sensus verborum
ad

ad alia significanda transfertur. Ut autem metaphoricæ locutiones facile unusquisque dignoscere possit, quatuor, quas Critici recensent regulas, adhibendæ sunt.

Prima est. Cum auctor proluxa oratione rem eandem iisdem fere verbis inculcat, metaphorice loqui censendus non est. Metaphoricæ enim locutiones quodam sensu falsæ sunt; est igitur præter rei naturam, ut sint continuæ. Quis enim dixerit auctorem perpetuis atque importunis metaphoris orationem suam consulto obscurasse, ut lectores perbelle luderet, aut incautos deciperet?

Alterâ. Locutiones, ad quas probandas auctor animum intendit, non sunt metaphoricæ. Nam illæ propria sententia acceptæ falsæ sunt, quippe aliarum vocum vices gerunt: incassum igitur niteretur, qui secundum proximum sensum, cuius comperta falsitas est, illarum veritatem ostenderet.

Tertiâ. Si ita aliquid adserat auctor, ut admirationi, aut dubitationi locum esse in suo animo ostendat, illud non metaphorice dictum esse accipiendum est. Metaphoræ enim nec dubitare, nec mirari sinunt.

Quarta tandem. Verba usitato sensu rejectis metaphoris sunt accipiendæ; 1. si familiari ac simplici, aut historico dicendi genere utatur auctor; ab eo enim abhorrent metaphoræ. 2. Si auctor homines alloquatur, quorum captum facile superant metaphoræ. Nemo enim sanæ mentis ita loquitur, ut intelligi nolit.

Quod si quid subobscurè, aut ambiguum occur-

currat, non uno sane pacto illius interpretationi lux afferri poterit. 1. Tum superiora tum inferiora consulantur, ut id, quod quaeritur, perspicuum fiat. Quippe haud raro fieri solet, ut sententia aliqua, si e reliquo orationis ambitu avulsa separatim consideretur, obscura sit: at sermonis considerato contextu perspicua evadat.


2. Praeterea loca, quae vocant *parallela*, accurate perpendantur, h. e. ubi eadem verba occurrunt, si quidem de alicujus vocis sententia agatur: aut ubi de eadem re differit auctor. Forte enim quod illic suboscure tradidit, alibi siue dedita opera siue fortuito nonnulla addens clariori methodo pertractat.

3. Juvat etiam aliorum interpretationes in eundem locum, si quae sint, consulere: atque eos aliis praeferre, qui vel discipuli, vel amici, vel coevi auctori fuerint. Ubi quoque illud advertatur ceteris paribus ei adhaerendum esse, qui auctoris linguam probe calleat, atque in eo genere, de quo agitur, optime versatus sit.

4. Perquamutile quoque est in alicujus propositionis sententia intelligenda, ut ex *praedicati* significatione *subjecti* notionem eruamus: vel contra e *subjecti* sententia sensum *praedicati* colligamus. Quod quidem in vocibus ambiguis, & ἀπαξ λεγόμεναις (quae semel occurrunt) definiendis locum potissimum habet; earum enim notionem ex adjectivis, aut verbis, quibuscum copulantur, facile investigare licet.

LOGICAE ELEMENTORUM

P A R S II.



C A P U T I.

De Judicii, & Propositionis natura.

Postquam varias rerum ideas, ac res ipsas in ideis Mens percepit, alteram alteri comparat, & quemadmodum eas convenire, aut discrepare inter se animadvertit, ita illas aut adfirmando connectit, aut negando disjungit: in quo quidem *judicare* Mens dicitur. Itaque definiri potest *Judicium*, *Perceptio relationis, quae inter duas pluresve ideas intercedit.*

Quamobrem cum Mens judicat, tria praestat: primo sibi quasdam ideas praesentes sistit, easque simul confert: tum convenientiae aut repugnantiae relationem inter collatas ideas percipit: ac tandem perceptae relationi adquiescit.

Hujusmodi autem assensus, quo Mens perceptam adprobat relationem, ita est in Mentis potestate, ut illum sustinere tamdiu possit; donec ideas accuratius expendat. Verum id locum non habet, cum ideae ea perspicuitate praeditae sunt, ut extemplo mutuam ipsarum relationem percipiamus. Veluti sunt veritates Mathematicae, quae *Axiomata* vocantur.

Jam

Jam vero haec Mentis actio si verbis exprimitur, Latinis *Enunciatio*, Graecis *Ἀπόφασις*, vulgo tamen *Propositio* dicitur. Ea autem differt a Judicio perinde, atque vocabulum ab ipsa vocabuli sententia. Est autem *Propositio oratio, quae aliquid de aliquo enunciat ajendo aut negando.*

In qualibet igitur Propositione tria comprehenduntur veluti totidem partes, unde componitur, *Subjectum* nimirum, *Praedicatum*, & *Verbum*. Subjectum est id, de quo aliquid enunciat: Praedicatum, quod enunciat de aliquo: Verbo denique Praedicatum Subjecto convenire aut repugnare declaratur. *Copulam* Scholae vocitant; ut quae Praedicatum cum subjecto copulat: quemadmodum Subjectum & Praedicatum *Terminos* vocant, seu *Extrema*; quia his Propositione utrinque clauditur ac terminatur.

Verum quamvis tria haec in Propositione concurrant necessum est, recte tamen aut duabus concludi, aut una voce absolvi potest. Verba enim *adjectiva* per *substantivum* in suas partes solvuntur, & pronomina reticeri possunt, utpote in verbis comprehensa: hinc igitur fit, ut binae voces, aut una duntaxat Propositionem constituent. Velut si dicam, *Mens cogitat*, quod tantumdem valet, ac *Mens est cogitans*: aut *Cogito*, *Disputo*; perinde enim sunt, atque *Ego sum cogitans*, *Ego sum disputans*. Quare celebre illud Caesaris *Veni, vidi, vici*, tres integras complectitur Propositiones.

C A P U T II.

De Propositionis Divisione.

Ratione partium, unde coalescit, & proprietatum, quibus afficitur, multifariam dividi solet Propositio. Innumeras species, prout eam varie considerant, recensent Scholastici, qui in hac parte multi sunt. Nobis tamen ut modum adhibeamus, suadet vetus adagium, *Ne quid nimis*.

§. I.

De Propositionibus Simplicibus, Complexis, Compositis, & de Compositarum vario genere.

SI Praedicatum & Subiectum, quae Propositionis *materiam* appellant Scholae, inspiciamus; plures distingui possunt Propositionum species. Nam 1. si illa unico tantum Praedicato & Subiecto constat, *Simplex* appellatur: ut, *Corpus est divisibile*.

2. *Complexa* erit Propositio, si aliam Propositionem, quae *Incidens* dicitur, complectatur: idque vel *ὁριστικῶς*, sive *determinationis*, vel *ἐξηγητικῶς*, sive *explicationis* atque ornatus gratia. Ita *Triangula*, quae sunt *isoscelia*, *angulos ad basin aequales habent*. Cujus complexae propositionis.

sitionis incidens subiectum determinat. Explicationis vero caussa incidens adjicitur in sequenti propositione: *Homines, qui sunt mortales, immortalitatis spe tenentur.*

3. Quod si plura Subiecta aut Praedicata in Propositione occurrant, ea erit *Composita*: velut: *Odium & amor sunt utilia & noxia.*

Jam vero Propositionum Compositio non uno pacto fieri potest; vel enim disertis verbis exprimitur, vel latet. Priores *Explicite*, posteriores *Implicitae* seu *Exponibiles* apud Dialecticos audiunt.

Compositio igitur aperta est & manifesta, cum Propositio est 1. *Conjuncta*, in qua nimirum plura Praedicata & Subiecta *copulativis* particulis sive expressis, sive tacitis conjunguntur. Talis est illa apud Horatium (a):

*Non domus aut fundus, non aeris acervus &
auri*

*Aegrotò domini deduxit corpore febres,
Non animo curas.*

2. *Disjuncta*, quae scilicet e simplicibus Propositionibus per disjunctivas particulas separatis coalescit. Ita apud Eundem (b),

Imperat, aut servit collecta pecunia cuique.

3. *Hypothetica*, h. e. cujus simplices Propositiones hypotheticis particulis copulantur: ubi quidem Propositio, quae ab hujusmodi particulis regitur, dicitur *antecedens*, altera *consequens*: licet

(a) I. Epist. II. 47.

(b) Ibid. Epist. X. 47.

cet interdum ordo sit praeposterus, ut in illo
Ejusdem (a):

*Hoc opus, hoc studium parvi properemus &
ampli,*

Si patriae volumus, si nobis vivere cari.

4. *Causalis*, cujus nimirum partes *causalibus*
conjunctionibus colligantur. Ita illa apud Eumd. (b):

Ut jugulent homines, surgunt de nocte latrones.

5. *Discreta*, quae per conjunctiones *adversati-
vas* diversa exprimit. Sicut Idem ait (c):

*Caelum, non animum mutant, qui trans mare
currunt.*

6. *Tandem Relata*, cujus una pars refertur
ad aliam. Ita Tullius: *Tantum damni feci, quan-
ti quaeque res amissae valebant* (d).

Porro nonnunquam Compositio abdita est, &
paullo obscurior: eaque quinque Propositionum
classes constituit, *Exceptivam*, *Exclusivam*, *Com-
parativam*, *Inceptivam*, & *Desitivam*.

Exceptiva est, quae aliquid de re quapiam
ita adfirmat, ut simul partem aliquam de ea ex-
cipiat. Velut, *Omnia sunt mortalia praeter spi-
ritus*: quae sane Propositio duas complectitur,
tum *Spiritus sunt immortales*, tum *cetera mor-
talia*.

Exclusiva dicitur, quae aut omne aliud Prae-
dicatum ab eodem Subiecto, aut omne aliud Sub-
jectum ab eodem Praedicato excludit. Haec Pro-

Tom. I.

K

pos.

(a) *Ib. Epist. III. 28.*

(b) *Ib. Epist. II. 32.*

(c) *Ib. Epist. XI. 27.*

(d) *De Fin. Lib. V. cap. XV.*

pos. *Oculus videt tantum*, ita oculo visionem attribuit, ut illum neque audire, neque odorari &c. posse doceat. Contra haec altera, *Deus duntaxat est aeternus*, ita Deo aeternitatem adscribit, ut aliis convenire neget. In his autem compositionem latere nemo non videt.

Comparativa appellatur, quae inter duas pluresve res comparisonem instituit: ut, *Achilles Hectoris fortior fuit*: ubi quidem duo adfirmantur, *Achillem* atque *Hectorem fortes fuisse*, tum *Achillem ipso Hectoris fortiolem*.

In Inceptivis, & Desitivis, quae nimirum aliquid incipere, aut desinere declarant, duo Iudicia contineri clare patet. Unum enim statum respicit, in quo res antea erant, alterum vero, quem posthac acceperunt.

§. II.

De Propositionibus Universalibus, Particularibus, & Singularibus.

EX ampliori aut minori Subjecti significatione *Universales, Particulares, & Singulares* Propositiones oriuntur. In quo quidem sita est Propositionis *quantitas*, quam Scholae appellant. Cum enim subjectum quae late patet accipitur, universalis est propositio: veluti: *Omnes homines in Adam peccaverunt*. Hinc quaecunque subjectum veluti genus exhibent singulis formis commune, universalem efficiunt propositionem. Quod si subjecti sententia minus patet, propositio particularis dicitur, ut: *Aliqui homines sapiunt*.

Voces igitur *aliqui*, *nonnulli* &c. quae subiecti extensionem indeterminate restringunt, particularem constituunt propositionem. Tandem cum subiectum unum est ac singulare, Propositio singularis appellatur.

Quod si vero Subjectum nullo apposito adjuncto determinetur, ea *indefinita* est Propositio: ut cum ajunt, *Senex est morosus*. Haec autem talis esse censetur, qualem sensum edit. Particularis nimirum, aut universalis erit perinde, atque recte habet, ac sententiam ejus, qui dicit, proprie exprimit.

Jam porro quod ad Universales Propositiones attinet, advertere juvat 1. eas interdum non ita vagas esse, ut nullam unquam exceptionem admittant; cujusmodi est illa apud Horatium (a)

*Omibus hoc vitium est cantoribus, inter amicos
Ut nunquam inducant animum cantare rogati,
Injussi nunquam desistant.*

Neque enim omnes omnino cantores hoc vitio laborant. Hujusmodi Propositionem *Universalem moralem* nuncupant Scholae, ut eam distinguant a *Metaphysica*, quae nulli subjicitur exceptioni, velut: *Omnis circulus radios habet aequales*.

2. Nonnunquam Propositio Universalis non singulas respicit ejusdem generis partes, sed omnes duntaxat illius species. Veluti cum dicitur, *omnia animantia in Arca Noachica Diluvii aquas evasisse*.

3. Tandem nonnullae sunt Propositiones, quae Universalis speciem mentiuntur, licet reapse sin-

(a) I. Satyr. III.

gulares censendae sunt ; id quod in nominibus *Civitas*, *Exercitus*, aliisque, quae *collective* usurpantur, usuvenire solet.

§. III.

De Propositionibus Affirmantibus, & Negantibus.

Omnis Propositio aut ait, aut negat: atque id ad ipsius *qualitatem* pertinere ait Schola. Ait, si Praedicatum adjungitur Subjecto; negat vero, si removetur. Prior dicitur *Ajens*, & vulgo *Adfirmans*; posterior *Negans*.

Porro accurate Propositionis tum adfirmantis, tum negantis naturam perpendere juvat. Duo autem in antecessum advertenda sunt. 1. In qualibet idea *comprehensionem* ab *extensione* distinguere oportet. Ideae comprehensionem appello quidquid proprietatum in se illa complectitur. Puta *trianguli* idea comprehendit spatium, tria latera, tres angulos, angulorum duobus rectis aequalitatem &c. Extensionem vero intelligo id omne, cui ipsa idea communis est. Ita trianguli extensio tantum patet, quot trianguli species sunt. 2. Notandum est praedicati notionem latius patere, quam subjecti sententiam; pluribus enim illud adscribi potest.

Jam vero Propositionis adfirmantis ea est indoles, ut praedicatum subjecto adnectatur, juxta ac si unum idemque essent. Quantum igitur in praedicati idea comprehenditur, totum id subjecto tribuitur. Si quid enim praedicati idea comple-

plecteretur, quod subjecti notioni non inesset :
 remove potius, quam praedicatum subjecto ad-
 necere oporteret. *Triangulum* esse *figuram* ajo ;
 triangulo igitur adscribo quidquid figurae notio
 continet.

Verum necesse non est, ut subjectum & prae-
 dicatum eandem notionis latitudinem habeant .
 Praedicatum enim si latius pateat, quam subje-
 ctum ; hujus veluti modulo illud metiamur oportet.
 Ita *Triangulum* esse *Figuram* ajo, licet non
 omnia, ad quae *Figura* extenditur, in *Trianguli*
 idea locum obtineant. Propositionis igitur adfir-
 mantis subjectum universam praedicati notionem,
 non autem illius latitudinem comprehendit.

Contra vero Propositionis Negantis natura in
 eo sita est, ut res quaequam eadem cum alia esse
 negetur . Atqui id verum est, quamvis aliquid
 secum commune habeant : dummodo quod uni-
 proprium est, totum id alteri desit. Recte igitur
 negatur *triangulum* esse *quadrilaterum*, quamvis
 in ratione *Figurae* conveniant . Unde & illud
 proficiscitur, quod in Propositione negante prae-
 dicatum qua late patet divellitur a subjecto .
 Nam si in praedicati extensione includeretur sub-
 jectum, huic illud non repugnaret : Cum igitur
triangulum quadrilaterum esse nego, tum inte-
 gram *quadrilateri* notionem, tum quidquid *qua-*
drilaterum est ab illo sejungo.

§. IV.

De Propositionibus Oppositis.

INter alias Propositionum proprietates est earum *Oppositio*, quae est pugna duarum Propositionum, eodem constantium praedicto & subiecto. Haec autem repugnantia fit vel secundum *qualitatem*, vel *quantitatem*, vel utramque.

Propositiones, quae qualitate dissident, at quantitate conveniunt, si sunt universales, dicuntur *contrariae*, ut *Omnis homo est liber: Nullus homo est liber*. Quod si fuerint particulares, vocantur *subcontrariae*, sive *contrariae particulares*, ut *Aliquis homo est justus: Aliquis homo non est justus*.

Quae vero qualitate consentiunt, at quantitate discrepant, *subalternas* appellat Schola, nonnulli vero *consequentes*, ut *Omnis homo est liber: Aliquis homo est liber*.

Tandem *contradictoriae* appellantur, quae & qualitate, & quantitate pugnant: velut hae, *Omnis homo est liber: Aliquis homo non est liber*. Verum vulgo recepta consuetudine eas propositiones *Contradictorias* dicimus, quarum altera ait quid, altera negat.

Multa hic addere solent Dialectici de Propositionum *isoduraxia*, quam *Aequipollentiam* vocant, & de earumdem *Conversione*: per hanc subiectum & praedicatum incolumi Propositionis qualitate reciprocantur; per illam autem Propositiones oppositae conciliantur. Verum his olim fuit

fuit honos , cum Sophistarum disputationes in pretio erant ; nunc autem ea negligere , quam vel leviter attingere fatius esse ducitur .

C A P U T III.

De Propositionum Veritate & Falsitate.

CUm ea sit Propositionis natura , ut Praedicatum Subiecto aut adnectat , aut amoveat ; inde oritur , ut ipsa vera sit aut falsa . Si enim conjungenda componit , & sejungenda separat , vera erit Propositio ; sin contra , falsa erit .

Ut igitur Propositionis alicujus veritatem aut falsitatemprehendamus , tria servemus oportet : primo ut quae Propositio enuntiat perspecta habeamus : deinde ut ea invicem conferamus : ac tandem utrum ea aliquam vel nullam relationem inter se habeant , expendamus . Id autem facile in Propositionibus simplicibusprehendere licet : at paullo difficilius est Propositionum compositarum veritatem examinare , quippe quae plures ideas complectuntur .

Quamobrem 1. quod ad Complexas attinet , advertatur Propositiones *incidentes* , quae ad majorem quamdam explicationem adhibentur , nihil principalium veritati , aut falsitati officere ; quae vero rem definiunt , tam arcte cum illis colligari , ut earum veritas & falsitas in totam redundet Propositionem .

2. In Propositionibus conjunctis partes omnes,

e quibus constant, verae sint oportet, ut ipsae verae esse dicantur.

3. Disjunctae Propositionis veritas in eo sita est, cum inter partes, unde coalescit, nihil medium est.

4. In Hypotheticis solius consequentiae veritas spectatur, quae potest recto stare talo, etiam si utraque pars falsa sit.

5. Ut Causales sint verae, oportet ut id, quod exprimitur, vera sit alterius causa.

6. Discretae veritatem adfert partium oppositio; nam si partes non sint oppositae, licet verae sint, Propositio tamen aut falsa, aut saltem inepta erit.

7. Relatae Propositionis veritas pendet ex recta relatione; ita quidem ut si haec falsa aut inepta statuatur, etiam illa falsa sit aut inepta.

8. Tandem Propositionum, quas *Exponibiles* a Schola nuncupari diximus, Exclusivae quidem & Exceptivae verae censendae sunt, si quae a Praedicato aut Subiecto excluduntur, recte excipiantur. Comparativae autem tum demum verae sunt, cum ea, inter quae comparatio instituitur, praedicatum, in quo comparantur, habeant commune.

Quae de Propositionum oppositarum veritate & falsitate multis prosequuntur Dialectici, libenter omittimus, quippe cum ea non sint ex usu. Nonnulla potius subnectere par est, quae ad variorum sensuum veluti latebras in Propositionibus detegendas tradi solent: ea potissimum de causa, ut diversae *Distinctionum* formulae Scholis usitatae addiscantur.

Et

Et 1. quidem Propositio vera aut falsa esse potest vel *ὑλικῶς*, h. e. *materialiter*, cum scilicet Praedicatum Subiecti quidem vocabulo, non autem rei convenit; vel *ἰδρικῶς*, h. e. *formaliter*, cum nimirum de re, quae per vocem exprimitur, Praedicatum enuntiatur. Hinc in illo apud Senecam (a) syllogismo: *Mus syllaba est; mus autem caseum rodit; syllaba ergo caseum rodit*: prima Propositio sensu materiali, altera autem sensu formali vera est.

2. Vera nonnunquam aut falsa est Propositio sensu *litterali*, qui nimirum proxime verbis exprimitur, ut illud in Evang. *Ego & Pater unum sumus*, vel sensu *metaphorico*; cum voces translate accipiuntur: veluti, *Ego sum vitis, vos palmites*.


3. Vera esse aut falsa dicitur Propositio sensu *diviso*, cum Praedicatum non eodem manente Subiecti statu ipsi convenit: aut sensu *composito*, cum illud Subiecto non repugnat, dum idem perseveret. Ver. gr. haec Propositio, *Sedens stare non potest*, vera est sensu composito, at falsa sensu diviso.

5. Tandem his addere licet sensum *collectivum*, *distributivum*, *disiunctivum*, prout nimirum Propositionis voces hoc vel illo pacto usurpantur: tum sensum *relativum*, cum scilicet Praedicatum Subiecto convenit, quatenus ad aliud referatur.

L O.

LOGICAE ELEMENTORUM

P A R T I S III.



C A P U T I.

De Natura Ratiocinationis.

Quae a nobis comparantur Ideae non omnes ea perspicuitate donantur, ut mutuae, quae inter illas intercedit relatio, facile & prima fronte dignoscatur. Ad hujusmodi igitur relationem aperiendam clariorem ideam investigamus, cui alias comparantes earum convenientiam aut repugnantiam colligimus. Ideas enim, quas discutiendas aggredimur, si cum hac tertia convenire percipimus, eas componendas esse ducimus. Sin altera quidem congruit, altera vero non item, aut utraque ab illa dissentit, eas secum repugnare judicamus.

Quamobrem Ratiocinationem recte definire possumus Intellectus actum esse, quo ipse instituta duarum idearum comparatione cum tertia, jungendae istae sint, an separandae, cognoscit. Ex qua quidem idearum comparatione tria judicia a Mente efformantur, cum aliud ex alio ratiocinatione deducit: quorum primum est, quando Praedicatum cum tertia adscita idea confertur: alterum, quo eidem Subiectum comparatur: postremum vero, quo Subiecti cum praedicato con-

ne-

nexio colligitur. Quamvis simplex atque unicus sit Mentis actus, quo nimirum ex eo, quod duas ideas cum tertia convenire deprehendit, earum percipit nexum, & relationem.

Ita si Tellurem conglobatam esse deprehendere nequeam, continuo Telluris & rotunditatis ideas expendam, atque ita ex perceptis rem, quam non percipio, deduco. Experimento novi corpora globosa, si luminari, quod ipsis majus est, objiciantur, conicam umbram projicere. Sic igitur comparisonem inter has ideas instituens mecum agito. *Quae corpora majori luminari obiecta finitam umbram in coni speciem projiciunt, ea sphaerica sunt. Atqui in Eclipsibus Lunaribus Terrae umbra hujusmodi figuram praeseferre deprehenditur. Globosa igitur est Telluris superficies.*

C A P U T II.

De vario argumentandi genere.

§. I.

De Syllogismo.

Primum Syllogismo locum adscribimus, quippe cum perfecte Ratiocinationi respondeat, atque ad illum reliquae argumentationum species, quas paullo infra recensebimus, facile revocentur. Est autem Syllogismus argumentatio quaedam tribus Propositionibus composita inter se

se eo pacto connexis , ut postrema ex prioribus proficiatur.

Jam vero harum Propositionum prima *πρόπαισις*, altera *λήμμα* ab Aristotele , a Latinis vero *Propositio* & *Assumptio*, tertia Gr. *συμπέρασμα*, Lat. *Conclusio* dicitur . Verum vulgo in Scholis prima *Propositio major*, secunda *Propositio minor*, postrema *Consequentia* appellari consuevit . Major autem dicitur , non quia principem locum obtinet , sed propterea quod *majorem terminum*, Praedicatum scilicet Conclusionis complectitur : quemadmodum altera ob *minorem terminum*, h. e. Subjectum Conclusionis , quod continet , Minor nominatur . Atque hae Propositiones *praemissarum* etiam nomine donantur apud Scholas . Inventum autem illud seu *argumentum*, cum quo veluti cum aliqua norma Praedicatum & Subjectum Conclusionis comparantur , *medium terminum* nuncupant Scholastici .

Syllogismus itaque tres omnino *terminos* comprehendit : quippe duarum Propositionum altera Praedicatum , altera Subjectum cum medio termino comparat : Conclusio vero novum terminum non invehit , sed superiora connectit .

In Syllogismo Scholastici *materiam* & *formam* considerant . Materiam quidem appellant tum terminos & medium , tum Propositiones inde conflatas ; formam vero legitimam Conclusionis illationem .

§. II.

De Syllogismi Figuris & Modis.

Syllogismi *Figurae* Scholasticis dicitur apta mediæ cum duobus terminis ad concludendum colligatio. Cumque medius terminus quatuor modis connecti cum illis possit, quatuor Syllogisticae figurae emergunt. Medius enim terminus 1. subjectum est in Propositione majore, & praedicatum in minore: 2. praedicatum in utraque: 3. subjectum in utraque: 4. praedicatum in majori, & subjectum in minori Propositione. Ultimam hanc figuram, quae *Galenica* vulgo dicitur, ab Aristotele repudiatam ferunt. De ea tamen legendus Arnaldus (a).

Modum autem Syllogismi appellant praemissarum connexionem secundum quantitatem & qualitatem. Hujusmodi quatuor & sexaginta recensent, prout Propositiones adfirmantes & negantes, universales ac particulares varie complicari possunt. At undeviginti duntaxat ceteris posthabitis, quippe inutilibus, tradi solent in Scholis. Eos vulgo insulsis aequae ac horridis versiculis comprehensos proferunt Scholae: in quibus vocalium duntaxat *A E I O* potestas attenditur. Scholasticis enim *A* propositionem universalem adfirmantem, *E* vero negantem exprimit: *I* particularem adfirmantem, *O* negantem denotat.

Ab hujusmodi Figuris & Modis recensendis
con-

(a) *L'Art de Penser Part. III. Chap. IV,*

consulto abstinemus, atque ea tantum a limine, ut ajunt; salutasse satis esse duximus: *ne*, ut apposite ad hanc rem ait Seneca, (a) *verba nobis dentur, & aliquid esse in illis magni ac secreti boni judicemus*. Haec sane laborem quidem docendi ac discendi augent, at nullius fere sunt usus. Nemo unus enim, ne illis quidem exceptis, qui in penitioris Scholasticae Dialecticae penetralibus enutriti nil nisi Scholasticum sapiunt: nullus, inquam, dum ratiocinatur eo animum intendit, ut in *BARBARA* potius, quam *FRISESOMORUM* Syllogismos procudat.

§. III.

De Syllogismi Vitiis.

Vitium in Syllogismo subesse potest ratione & materiae & formae. Peccat Syllogismus in materia, quoties Propositionum, unde componitur, aliqua falsa sit. Quare quae superius de veritate Propositionum differuimus recolantur.

Ratione autem formae claudicat Syllogismus, si Conclusio ex praemissis non consequatur. In hanc rem exempla proferre superfedemus; ea enim prosequi dabitur, cum de Fallaciis deinde disputabimus.

§.IV.

(a) *Epist. L.*

§. IV.

De Veri Syllogismi fundamento .

ARistoteles ceterique veteres Dialectici plures regulas tradidere, quibus singulae Syllogismorum Figurae, singuli eorumdem Modi efformarentur, ita quidem ut nullus in iis falsitati locus esse posset. Verum haec inventa esse acutius, & dicta subtilius jamdudum viri docti adnotarunt. Eapropter ne tanta canonum copia adolescentum memoria fatigetur, generale quoddam & diligenter exploratum principium, quod Cl. Arnaldo (a) acceptum referimus, hic proponimus: ad quod, veluti ad lydium lapidem, cujuscunque generis Syllogismos, num recte procedant, an non, explorare possimus.

Hic porro Canon in ipsa Syllogismi natura innitur. Nimirum illuc intendit Syllogismus, ut quaestionis alicujus veritatem demonstret. Dicitur autem *quaestio* Propositio demonstranda, quae Conclusionis locum in Syllogismo occupat. Porro cum quaestionem aliquam probandam agredimur, in eo toti sumus, ut clariorem propositionem, quae illam complectatur, investigemus. Eam autem continere nequit eisdem verbis, secus enim nihil lucis quaestioni afferret; quippe & ipsa in quaestionem veniret. Quamobrem aliam adjungimus propositionem, quae in
prio-

(a) *L' Art de penser Part. III. chap. X.*

priori propositione quaestionem comprehendendi planum faciat.

Exemplum accipite. Si demonstrandum suscipiam *ex Deo solum suam beatitudinem hominem haurire*, id efficiam clariori propositione, quae propositam quaestionem complectatur: nimirum si dicam *beatum esse, qui immenso bono fruitur*: tum alteram adjungam, unde in adducta propositione quaestio contineri ostenditur: scilicet si subnectam, *Deum esse immensum bonum*. Ita igitur ratiocinationem expediam:

Qui immenso bono fruitur, beatus est:

Atqui solus Deus immensam bonitatem complectitur.

Ex Deo igitur duntaxat suam homo haurit beatitudinem.

Sane patet hujus Syllogismi Conclusionem in majori Propositione comprehendere, idque in minori clarius aperiri, quippe quae *immensam Deum complecti bonitatem* demonstrat.

Atque id, quod in Syllogismis *adfirmantibus*, quorum scilicet Conclusiones ajunt, locum habet, obtinet etiam in *negantibus*, h. e. quorum Conclusiones negant. In his enim Syllogismis praemissarum alterutra negat, neque negatio nisi in negatione includi potest. Conclusionem igitur in ea Propositione, quae negat, comprehendere debere clare patet. Velut si hoc Syllogismo ostendam avaros non esse beatos:

Ille beatus est, qui sorte sua contentus vivit:

Nullus autem avarus sorte sua contentus est;

Nullus igitur avarus beatus est.

Hic procul dubio apparet majorem Propositionem

nem in medio ponere Conclusionem , quae in minori veluti latitabat. Cum enim nego *omnem*, qui sit *avarus*, esse *contentum* : non modo *avarum contentum* esse, sed & *beatum* nego ; quippe *beatus*, nisi qui *sorte sua contentus vivat*, esse nequit.

Ex his porro patet eam esse legitimi Syllogismi indolem, ut Conclusio in praemissis comprehendatur. Syllogismus igitur tum demum recte consistet, cum Propositionum altera Conclusionem complectitur, altera vero in illa comprehendi explicat. Nimirum, ut Scholarum more loquamur, praemissarum altera *comprehensiva*, altera *explicativa* sit oportet.

At inquires: qua arte, quibusve regulis Conclusionem in praemissis inclusam assequar? Nimirum eâ perspicientiâ, qua quis ideae comprehensionem atque extensionem, de qua supra diximus, deprehendit. Haec enim duo perspecta sint oportet: 1. quatenam in subjecti, & praedicati ideis proprietates comprehendantur: 2. quatenam in eadem idea secum conveniant. Quae quidem cum cognoveris, facile assequi licebit, num Conclusio in praemissis contineatur, nec ne. Id potius igitur attendendum est, ut in ideis effingendis, discutiendisque, earumdem claritati ac distinctioni quam maxime consulamus. Tum etiam in eo studium collocemus, ut subjecti ac praedicati ideas conferentes, in quo secum conveniant, aut inter se dissentiant, inquiramus. Qui ea mentis acie instructus est, ut id perspiciat, is syllogismi veritatem vel ipsis Scholarum regulis destitutus plane deprehendet. At qui nover-

cam naturam habuerit, nec quae diximus, nec ipsos Scholasticos Canones intelliget (a).

In-

(a) *Non abs re esse duco hic apponere, quae ad hanc rem apposite tradit Augustinus de Doctr. Christ. lib. II. Cap. XXXVII. Is enim cum Dialecticae usum atque utilitatem prosequeretur, praeceptorum, quae potissimum ratiocinationem respiciunt, disciplinam ut plurimum inutilem scita comparatione demonstrat. Illa vero (Dialectica) conclusionum, & definitionum, & distributionum plurimum intellectorem adjuvat: tantum absit error, quo videntur homines sibi ipsam beatæ vitæ veritatem didicisse, cum ista didicerint. Quamquam plerumque accidat, ut facilius homines res eas assequantur, propter quas assequendas ista discuntur, quam talium praeceptorum nodosissimas & spinosissimas disciplinas. Tamquam si quispiam dare, volens praecepta ambulandi moneat, non esse levandum posteriorem pedem, nisi cum posueris priorem, deinde minutatim quemadmodum articulorum & poplitum cardines oporteat movere describat. Vera enim dicit, nec aliter ambulari potest: sed facilius homines haec faciendo ambulant, quam animadvertunt cum faciunt, aut intelligunt, cum audiunt. Qui autem ambulare non possunt, multo minus ea curant, quae nec experiendo possunt attendere. Ita plerumque citius ingeniosus videt non esse ratam conclusionem, quam praecepta ejus capit: tardus autem non eam videt, sed multo minus quod de illa praecipitur: magisque in his omnibus ipsa specta-*

Inutilia igitur prorsus ducimus universa argumentationum praecepta, quae vulgo tradi in Scholis consueverunt. Quamvis enim illa usque ad nauseam inculcentur, nunquam legitime ratiocinandi facultatem Menti comparabunt. Nam ea rectae rationis societate destituta, subtilis sterilisque cognitionis fructum edunt. Recta & bene composita ad judicandum ratio ea est, unde veritatem in differendo adquirimus, ac perversitatem omnem in ratiociniis veluti persentiscimus. Hanc autem veri fallique aestimationem frustra quaeres a praeceptis ac minutis regulis: eam praeter naturalem sagacitatem a scientiarum fonte haurire licet. Porro inter eas, quae potissimum intellectus culturae destinatur, Mathesis est; Geometricis enim demonstrationibus assueta Mens eam contrahit recte ratiocinandi consuetudinem, ut quidquid abnorme ac perversum in ratiociniis occurrit, sentiat etiam, nedum intelligat. Optandum itaque, & quam maxime curandum, ut Matheseos studium Adolescentes strenue prosequantur; quo legitimis ratiociniis affuescant.

L 2

Jam

Etacula veritatis saepe delectant, quam ex eis in disputando aut judicando adjuvamus. Nisi forte quod exercitatoria reddunt ingenia; si etiam maligniora aut inflatiora non reddant, hoc est ut aut decipere verisimili sermone atque interrogationibus ament, aut aliquid magnum, quo se bonis atque innocentibus anteponant, se affectuos putent, qui ista didicerunt.

Jam porro recti Syllogismi Canon, quem Arnaldo praeunte tradidimus, argumentandi vim totam complectitur. Minutissimae quidem quaeque leges in Scholis usurpatae ad illum facillime revocantur. Et sane duobus veluti cardinibus tota harum legum complexio vertitur: 1. ut termini latius non sumantur in Conclusionem, quam in praemissis: 2. ut medius terminus semel saltem universaliter accipiatur. Atqui haec ab ea, quam tradidimus regulam, unice pendent. Huic igitur principio Scholasticae leges innituntur.

Nam 1. si amplior esset in Conclusionem, quam in praemissis terminorum sententia; qui fieri posset, ut haec in illis comprehenderetur? 2. Vocum, quas particulares appellant, proprietas est, ut definita non sit illarum extensio; illudque propterea contineant, quod in ipsorum idea includitur. Ut igitur hujusmodi terminus Conclusionis terminum complectatur, omnino oportet illum saltem semel universe usurpari. Puta si probandum est, *aliquem esse Dei amicum, qui egestate laboret*, idque vellem inde ostendere, quod *aliquis sanctus pauper sit*: isthaec Propositio Conclusionem non comprehendet, nisi alia praecedat, ubi vox *Sanctus*, quo medio termino utor, universe accipiatur. Si enim dici nequeat *omnem sanctum esse amicum Dei*, nunquam efficiam *aliquem amicum Dei pauperem esse*: propterea scilicet, quod Conclusio in praemissis non continetur.

Antequam manum de tabula, juvat aliquot Syllogismos exhibere, ut ope recensiti Canonis
de

de eorum veritate judicemus. Sit primus ille Senecae (a) Syllogismus:

Qui id beneficium dedit, quo est aliquid melius, potest vinci:

Pater dedit filio vitam, est autem aliquid vita melius:

Ita pater vinci potest.

In hoc quidem Syllogismo minor Propositio, quae aliquid melius esse vita docet, quam a patre filius accepit, aperte ostendit Conclusionem in majori comprehendì.

Verum si vulgare illud sophisma expendamus;

Qui ait te esse animal, verum dicit:

Qui autem ait te esse anserem, ait te esse animal;

Igitur qui ait te esse anserem, dicit verum.

Si hoc, inquam, sophisma ad trutinam revoce-
mus, statim se ita nobis offert Conclusio, ut
nullo pacto in praemissis comprehensa delitescat.
Nam *te animal* certum quoddam animalis genus
exprimit: minor autem Propositio in eo genere
anserem comprehendì non docet; fieri igitur ne-
quit, ut Conclusionem major Propositio comple-
ctatur.

Idem feratur iudicium de sophismate illo,
quod quidam Dialecticus Diogeni proposuit apud
Gellium (b):

Quod ego sum, id tu non es.

Homo autem ego sum;

Homo igitur tu non es.

L 3

Cui,

(a) *De Benef. Lib. III. cap. XXXV.*

(b) *Noct. Attic. Lib. XVIII. cap. XIII.*

Cui, cum Conclusionem veram esse negasset Diogenes, facete respondit: *Et si id verum fieri vis, a me incipe.*

§. V.

De ceteris Argumentationum speciebus.

E N T H Y M E M A.

Nonnunquam in Syllogismis. Propositio, quae per se ipsa constat, atque ab auditoribus facile intelligitur, reticere solet: quod apud Oratores, & in privatis colloquiis latissimum usum habet. *Enthymema* isthaec argumentatio vocatur a Dialecticis. Tale est elegans illud Medae Ovidii, quod a Quintiliano (a) laudatur:

Servare potui: perdere an possim rogas?

Quod perinde est, ac si dicas: *Servare potui; ergo possum perdere.*

E P I C H I R E M A.

Quemadmodum Enthymema claras atque apertas reticet Propositiones: ita contra *Epichirema*, si qua minus clara occurrat Propositio, huic probationem adnectit; quare modo quatuor, modo quinque propositionibus componitur. Ex. gr.

Hu-

(a) *Lib. VIII. cap. V.*

*Humanæ voluntatis appetitus immensus est ;
nam quo affluentius voluptates haurimus , eo
gravius ardentiusque sitire experimur .*

*Atqui quæcunque hujus vitæ bona finita sunt ,
& certis limitibus circumscripta ; quippe e
nihilò condita .*

*Beatitudo igitur , quam appetimus , a creatis
rebus hauriri nequit .*

P R O S Y L L O G I S M U S .

AD Epichirema proxime accedit *Prosyllogi-*
smus ; fit autem cum uni Syllogismo ita
alius subnectitur , ut primi Conclusio sit etiam
alterius major propositio . Veluti si ita arguerem :

Spiritus partium expers est :

Mens autem spiritus est ;

Mens igitur partibus caret :

*Sed quod partibus caret , corruptionem subire
nequit ;*

Mens igitur nec discerpi , nec distrahi potest .

Penultima autem Propositio *subsumtum* , seu
minor subsumta vulgo appellari consuevit .

S O R I T E S ,

Quem Latino verbo *acervalem* appellat Ci-
cero , alii vero *Gradationem* , est argumen-
tatio pluribus Propositionibus composita ,
ita quidem connexis , ut attributum unius sit
subjectum alterius , atque ita deinceps , donec
primæ subjectum cum postremæ prædicato in

Conclufione jungatur. Sic apud Senecam (a):

Qui prudens est, & temperans est:

Qui temperans est, & constans:

Et qui constans, & imperturbatus est:

Qui imperturbatus est, sine triftitia est:

Qui sine triftitia est, beatus est;

Ergo prudens beatus est: & prudentia ad beatam vitam fatis est.

Hic tamen fedulo cavendum, ne qua intermedia Propofitio falſa fit aut ambigua; totum enim Soriten contaminat. Talis eſt ille Epicuri apud Ciceronem (b), ut Deos hominum ſimiles eſſe oftenderet:

Deos beatos eſſe conſtat:

Beatus ſine virtute nemo eſſe poteſt;

Virtus ſine ratione conſtare non poteſt:

¶ *Nec ratio eſſe niſi in hominis figura;*

Ergo ſi Dei ſunt beati, & hominum ſimiles erunt.

D I L E M M A

EST argumentatio compoſita, quæ totum in partes diſpeſcit, atque ajendo aut negando de toto concludit, quod de ſingulis partibus oftendit. Ita in Terris vitam beatam degi non poſſe hoc Dilemmate oftendam:

Unuſquiſque in hac vita aut cupiditatibus ſeſe addicat, aut iſdem obluſcetur oportet.

Si illis indulget, infelix eſt; tum quia maxi-

mo

(a) *Epist. LXXXV.*

(b) *De Nat. Deor. Lib. I. cap. XXXII.*

*mo id probro est, tum vero quia earum sitim
explere nunquam poterit:*

*Si iisdem resistit, miser erit: quippe nihil hoc
intestino bello molestius, quod quis secum
ipse gerit.*

*Nemo hic itaque vere beatam agere vitam
potest.*

Porro non raro elegantius Propositio, quae
totum partitur, reticere solet. Ita olim Chrysippus Remp. administrandam non esse suadere
nitebatur:

*Si quis in Rep. administranda bene agit, of-
fendit homines; si male, offendit Deos;*

Ergo a Reip. administratione est abstinendum.

Ubi sane desideratur Propositio, quae partitionem
comprehendit, h. e. *Si quis Remp. administrat,
aut sancte, aut prave eam gerit.*

Jam vero in Dilemmate nonnulla sunt ani-
madvertenda, ut eorum vis non corruat. 1. Pro-
positio generalis, quae toti convenit, sive ea
exprimatur, sive non item, (quod saepius fieri
solet) vera sit oportet. Quamobrem laudatum
Philosophi Dilemma in eo peccat, quod Propo-
sitio subintelligenda, nimirum *molestum esse quod
sine Deorum aut hominum offensione fieri nequit*,
falsitatis arguitur: quippe molestum non est ho-
mines offendere, si, quin in Deum peccemus,
vitari non possit.

2. Propositio disjunctiva, cui Dilemma inni-
titur, omnia membra, in quae dividi totum
potest, complectatur. Nihil igitur efficit Di-
lemma illud, quo ad mortis timorem amolien-
dum nonnulli olim utebantur:

Aut

*Aut Mens humana una cum corpore occidit ,
aut diu permanet :*

*Si occidit , cum sensu careat , malis obnoxia esse
non poterit :*

*Si permanet , beatior erit , quippe e corporis
vinculis soluta ;*

Mors igitur timenda non est .

Alia enim post mortem potest esse animae condi-
tio , si nimirum poenis & cruciatibus addicatur .

3. Conclusiones , quae ex partibus deducuntur ,
sint legitimae . Quare superius Chrysippi Dilem-
ma etiam in eo peccat , quod verum non est ,
neminem posse in administranda Rep. recte se
gerere , quin homines offendat .

4. Tandem ejusmodi sit , ut in eum , qui
illud opposuit , retorqueri nequeat . Ita in Chry-
sippum Dilemma retorqueri posse testatur Ari-
stoteles :

*Si Remp. male administres , placebis homini-
bus ; Si recte , Deo ;*

Ergo administranda .

Quamvis id rationi absonum sit , cum homini-
bus facere satis in Deum peccantes non possi-
mus (a) .

IN-

(a) Hujusmodi vitium , quod in dilemmata po-
tissimum subrepere solet , argumenta efficit arti-
spicua , ut Graeci dicebant , quae nimirum in-
verti ac retorqueri in auctorem suum possunt .
Cujusmodi apud veteres celebratur illud , quo
Protagoram adversus discipulum suum Evatblum
usum fuisse ferunt : uti legere est apud Gellium
Noct.

I N D U C T I O

EST argumentatio , quae ex pluribus particularibus enumeratis aliquid universale commune omnibus colligit : sive recensitis omnibus rei alicujus partibus , adeo ut aliquid de iis adfirmet aut neget , idem de tota re ait aut negat . Ut si quis dicat :

Sin-

Noct. Attic. V. 10. *Cum enim ille eloquentiam hunc docuisset ea conditione , ut pactae mercedis dimidium antea sibi persolveret , reliquum daturus , ubi primum causam dicens vicisset ; cumque Evathlus postquam illum audierat causas nullas reciperet ; in jus ipsum vocavit Protagoras , atque hoc argumento eum ad incitas redigere contendebat .* Disce , stultissime adolescens , utroque id modo fore , ut reddas quod peto ; sive contra te pronunciatum erit , sive pro te ; nam si contra te lis data erit , merces mihi ex sententia debebitur , quia ego vicero , sin vero secundum te judicatum erit ; merces mihi ex pacto debebitur , quia tu viceris . Ad ea respondit Evathlus : *Petui , inquit , huic tuae tam ancipiti-captioni esse obviam , si verba non ipse facerem , atque alio patrono uter : sed majus mihi in ista victoria prolubium est , cum te non in causa tantum , sed in argumento quoque isto vinco .* Disce igitur tu quoque , magister sapientissime , utroque modo fieri , uti non reddam quod petis , sive contra me pronunciatum erit , sive pro me . Nam si judi-
ces

Singuli sive summo sive infimo loco nati curis exeduntur.

Unaquaeque aetas sua patitur incommoda.

Juvenes aliorum voluntati obtemperant oportet; natu vero majores magna negotia sustinent.

Hic improbos corporis fert labores; ille studiis animum fatigat.

Praesens igitur hominis vita non est ab omni parte beata.

Porro ut inductio sit vera, tum quod de singulis adfirmatur aut negatur, verum sit oportet; tum etiam nulla pars praetermittenda est. Hinc facile est, ut hoc ratiocinationis genere erremus, & decipiamur.

C A P U T III.

De Fallaciis Argumentorum.

QUoniam altius animis inhaerent exempla eorum, quae fugienda, quam quae imitanda sunt: originem propterea, unde fallacia

ces pro causa mea senserint, nihil tibi ex sententia debetur, quia ego vicero; sin contra me pronunciaverint, nihil tibi ex pacto debebo, quia non vicero. Id porro Coracem inter Rhetorem Siculum, & adolescentem discipulum, quem Tisiam appellat Hermogenis Scholiastes, evenisse tradit Sextus Empiricus lib. II. adversus Rhetores pag. 307. Edit. Lipsiae an. 1718.

lacia omnis in argumentationes derivatur , aperire juvat . Quapropter fallaces ratiocinationes , quae παραλογισμοί , παρεξίτεγχοι , σοφίσματα dici apud Graecos consueverunt , hîc continenti serie producemus : neglectis iis , quae pueriles sunt , & nisi stupidissimum non decipiunt (a) .

1. *Aliud probare, quam quod est in quaestione.* Quod Sophisma ἐπιροζήτης Graecis dicebatur : ab Aristotele autem Ignoratio Elenchi , illius scilicet , quod ostendendum est . Atque id ex fraude plerumque admittitur , nimirum cum quis contra adversarium probare nititur , quod ille non negat , ut quod revera ab eo negatum est , evincere videatur : aut ea adversario adfingit , quae reapse non docuit , quo illum oppugnare penitusque convellere videatur .

Hujus sophismatis exemplum accipite ex Lactantio (b) . *At idem (Epicurus) nos metu liberat mortis his verbis . „ Quando nos sumus , „ mors non est : quando mors est , nos non sumus ; mors ergo nihil ad nos . . . „ Quam argute nos fefellit ! Quasi vero transacta mors timeatur , qua jam sensus ereptus est ; ac non ipsum mori , quo sensus eripitur .*

2. *Quod in disquisitione positum est pro argumento sumere .* In Scholis Principii petitio appellari

(a) Captiosa hujusmodi argumenta , quibus Megarici , Stoici , alique apud Graecos delectabantur , vide si lubet apud Georgium Walchium in Pargergis Academicis de Orig. Log. lib. I. cap. 2. §. II. & lib. II. cap. I. sect. 1. §. 14.

(b) Lib. III. cap. XVII.

lari solet . Ita principium petit Spinoza , cum unam esse in rerum natura substantiam inde evincere conatur , quod unius substantiae ideam habeamus .

Huc pertinet illud Sophismatis genus , quod Graecis ἡ ὑπὲρ περιστροφή , h.e. *pistilli circumactus* nuncupatum , vulgo *vitiosa circuitio* ultro citroque in se rediens appellatur : nimirum cum idem probatur per idem . Veluti si quis sidera inerrantia propterea scintillare dicat , quod omnium maxime a nobis distent : atque ea a nobis longe distare ex eo probet , quod scintillent .

Hic tamen praetereundum non est , vitiosam non esse circuitionem , cum ex iis , quae aliunde evincere possumus , vel per se constant , aliquid ostendimus ; quo probato rursus ad ea inde demonstranda regredimur . Ita Physici Tellurem conglobatam esse vel ex hoc colligunt , quod Soli objecta conicam umbram projiciat ; tum ex ipsius figura sphaerica illius umbram in coni speciem esse deducunt . Quamobrem temere Catholicos vitioso circulo implicari obganniunt Setaarii , quasi e Scriptura Ecclesiae ἀσφαλίαν , *infalibilitatem* , tum ex hujus infallibilitate illius auctoritatem ostendant . Cum enim nulla sit inter ipsos & Catholicos de Scripturae auctoritate controversia , hinc recte Ecclesiam infallibilem esse demonstrant .

3. *Tamquam rei causam accipere , quae causa non est* . Veluti cum quis humani generis infortunia in sidera & cometas transfert : vel cum Peripatetici in naturae phaenomenis explicandis ad nescio quas occultas qualitates confugiunt :
vel

vel tandem cum pro caussa propria & proxima communis aliqua & remota adhibetur. Hujusmodi erat illa Ethnicorum in Cristianos criminatio. *Dum Cristianismus vigere coepit, mille calamitates Romanum orbem oppresserunt. Cristianismus igitur omnium calamitatum caussa fuit.* Quod sophisma prae ceteris elegantius solvit Terullianus (a).

Huc revocari etiam debet fallax illa conclusio, cum aliquid ex aliquo oriri colligitur, quia post illud evenit: *post hoc, ergo propter hoc.* Ut enim Tullius inquit (b): *Causa non sic intelligi debet, ut quod cuique antecedit, id ei causa sit, sed quod cuique efficienter antecedit.*

4. *A sensu diviso ad compositum, & contra a composito ad divisum gradum facere.* Id autem, quod fallacia Compositionis & Divisionis dicitur, fit cum ea conjunguntur, quae recte intelligi nequeunt, nisi disjungantur; aut ea dividuntur, quae dividenda non sunt. Veluti si quis diceret: *Senatus in Rep. summa rerum potitur; Quilibet ergo Senator Reip. dominus est.*

5. *A dicto secundum quid ad dictum simpliciter.* Nimirum cum ex eo, quod certa quadam ratione verum est, Conclusio generalis colligitur. Quemadmodum est vetus illud sophisma a Gelio relatum (c): *Quod nix est, hoc grando non est: nix autem alba est; grando igitur alba non est.*

. 6. Vi-

(a) *Apologet. cap. XL. XLVII.*

(b) *De Fato XXVI.*

(c) *Noct. Attic. Lib. XVIII. cap. XIII.*

6. *Vitiosa Enumeratione*, sive *Inductione uti*. Cum non omnes modi, quibus res afficitur, enumerantur: aut cum ex paucissimis partibus recensitis, quod de iis probavimus, universe ad totum pertinere colligimus. Vitiosa igitur esset Inductio, si quis, quod oleum, vinum, urina &c. dum vi frigoris in glaciem concreescunt, condensantur, omnes omnino liquores congelatos in minus spatium redigi concluderet; quippe aquam glacie concretam rarefieri experimenta docent.

7. *Vocum ambiguitate abuti*. Quod quidem admittitur, quoties idem nomen, quod diversa significat, inspecta una ipsius sententia cum subiecto, altera vero cum praedicato copulatur. Porro hujus generis sophismata perraro imponere solent; quippe puerilem argutiam praeseferunt. Verum paullo difficilius ambiguitas deprehenditur, cum res eadem varia potest ratione considerari, cum scilicet eadem idea plures partes complectitur. Veluti si quis Extensioni sensum non repugnare inde argueret, quod homo, qui corpore componitur, sensum habeat.

C A P U T IV.

De Causis Errorum.

Quae haecenus sophismata recensuimus in ratiocinando decipiunt: alia sunt praeterea, quae facilem aberrandi occasionem Menti praebent. Hae autem errorum causae repetendae sunt

sunt ex *Praejudiciis*, *Cupiditatibus*, *Philantia*; *Negligentia*, & *Praecipiti Judicio*: quas hñc aperire praestat, ut in veritate investiganda sedulo ab iis caveamus.

I. Mentis nostrae ratiocinatio certis quibusdam principiis regitur: inde fit, ut quae falsa sunt, si loco illorum habeantur, eam pervertant omnino ac labefactent. Porro haec *Praejudicia*, sive *praejudicatae opiniones* appellantur, quasi dicas praeconcepta citius quam par est animo judicia; ante nimirum, quam diligenti instituto examine rerum cognitione animus informetur. Plura vero sunt, quae aditum praejudiciis praebent. Baco quidem Verulamius, qui Philosophiae instaurationi primus manum admovit, in plures classes praejudicia dispersit; eaque, ut tunc aetas ferebat, insolentibus ac speciosis vocabulis, sed quae magnum aliquid sonant, designavit (a). Non abs re vero ea repetere licet ex *partium studio*, *auctoritatis aestimatione*, *disputationis amore*, & *multitudinis sensu*.

Tom. I.

M

I. Non-

(a) Ea ipse idola vocat concinno quidem vocabulo, quasi vanas dixeris imagines, quae verarum notionum speciem mentiuntur. Appellat idola Tribus, quae in ipsa hominis natura & in tribu seu gente hominum fundantur: idola Fori, quae ex foedere verborum & nominum se insinuant in intellectum, & ex vulgi opinionibus dimanarunt: idola Specus, quae ex ingenii & temperamenti diversitate ortum habent: idola tandem Theatri, quae ex diversis Philosophiarum dogmatibus

1. Nonnulla sunt quae aut falsa, aut saltem dubia a plerisque reputantur; quorum tamen veritas probatur ab aliis, si diversae nationis, vel diversae disciplinae fuerint, aut diversam sectam profiteantur. Unde tam dispar sententia? Rerum veritas variationis nescia una est & sibi constans. Illud quidem studium, quo suas quisque vel ultro oblatas vel quaesitas partes sibi tuendas putat, hanc judicandi varietatem inducit. At quantum in hoc est ad veritatem assequendam impedimentum! Hujusmodi enim studium adeo plerumque incenditur, ut pro eorum etiam, quae non probantur, veritate acriter dimicetur. Hinc plerique sunt, qui, ut ait Tullius (a), *certis quibusdam destinatisque sententiis quasi addicti & consecrati sunt, eaque necessitate constricti, ut etiam quae non probare soleant, cogantur constantiae causa defendere.*

2. Praejudicatis opinionibus imbuimur, cum ita ex alienis judiciis pendemus, ut etiam sine ratione apud nos valeat auctoritas. Id autem potissimum usuvenit, cum primis aetatis nostrae annis praeceptoribus instituendi tradimur. Nostrum enim iudicium adhibere per aetatem nondum valemus: quae igitur praeceptores docent,

ea

tis hominum animis infederunt: inde ducta denominatione, quia quot Philosophiae receptae aut inventae sunt, tot fabulas productas & actas censemus, quae mundos effecerint fictitios & scenicos, ut ipse ait. Videndus ipsius liber, cui titulus, Novum Organum Scientiarum.

(a) *Tuscul. Quaest. lib. II. Cap. II.*

ea probata animo recondimus. Haec porro, cum adoleverit aetas, expendere negligimus: quae propterea ejusmodi radices in nobis agunt, ut veluti a natura nobis insita esse ducamus. Ab hujusmodi igitur praejudiciis maximopere caveamus: idque curemus, ut non quo nos miserint praeceptores, sed quo duxerint, eamus.

Itaque cavendum etiam nobis est, ne praestantium virorum auctoritate permoti, ipsorum opinionibus servi pecudis more insistamus. Omnino, ait Plato (a), *non quis dixerit, sed quam recte dicatur, considerandum est*. Tum & Tullius (b) apposite admonet: *Non tam auctores in disputando, quam rationis momenta quaerenda sunt. Quin etiam obest plerumque iis, qui discere volunt, auctoritas eorum, qui se docere profitentur. Desinunt enim suum judicium adhibere. Id habent ratum, quod ab eo, quem probant, judicatum vident. Nec vero soleo probare id, quod de Pythagoricis accepimus, quos ferunt si quid adfirmarent in disputando, cum ex eis quaereretur, quare ita esset, respondere solitos: Ipse dixit: ipse autem erat Pythagoras.*

3. Disputationis usus utilis est, & quaestionis veritati aperiendae non minimum conducit. Cum enim hominis animus secum ipse tacitus in re aliqua perspicienda occupatur, languet plerumque illius vis ac torpescit: igniculis quibusdam excitetur oportet, unde incendatur. Disputationis igitur laqueis implicatus animus se se expedire

M 2

con-

(a) *In Charmide.*(b) *Lib. I. De Nat. Deor.*

connititur, atque obiectionibus facturus fatis, quaestionis nodum solvere quanta maxima contentione conatur. At si cupiditatum aestus, & privatae opinionis tuendae studium accedat, disputatione perverse abutuntur homines. Eo enim deveniunt, ut rationibus nunquam cedentes cuique rei probandae rationes investigent, verum falso admisceant, utrumque aeque probent, contra dicendi duntaxat studio abrepti. Inde autem praejudiciorum ingens copia. Illud enim ratum habetur, quod ab adversariis negatur: contra a veritate abhorrere ducitur, quodcumque iis probatur.

4. Praejudicia tandem molestissima nobis insinuantur ex vulgi opinionibus, pessimi veritatis interpretis. Errorum enim nostrorum causa est, quod vivimus ad exempla, nec ratione componimur, sed consuetudine abducimur. Quod quidem Senecae (a) verbis aptius exprimi non posse censeo: *Tritissima quaeque via & celeberrima maxime decipit. Nihil ergo magis praestandum est, quam ne pecorum ritu sequamur antecedentium gregem, pergentes non qua eundum est, sed qua itur. Atque nulla res nos majoribus malis implicat, quam quod ad rumorem componimur, optima ratio ea, quae magno assensu recepta sunt, quorumque exempla nobis multa sunt: nec ad rationem, sed ad similitudinem vivimus, Inde ista tanta coactio aliorum super alios ruentium. Quod in strage hominum magna evenit, cum ipse se populus premit, nemo ita cadit, ut non alium in se*
at-

(a) De Vita beata cap. I.

attrahat : primi exitio sequentibus sunt . Hoc in omni vita accidere , videas licet : nemo sibi tantummodo errat , sed alieni erroris causa & auctor est . Nocet enim applicari antecedentibus , & dum unusquisque mavult credere , quam judicare , nunquam de vita judicatur , semper creditur : versatque nos & praecipitat traditus per manus error , alienisque perimus exemplis . Quamobrem , ut idem Auctor (a) monet , aestimemus singula fama remotâ ; & quaeramus quid sint , non quid vocentur .

II. Cupiditates , quibus hominis animus occupatur , veritati assequendae quamplurimum adversantur . Res enim objectas perinde inspicimus , atque ad nos referuntur : prout nimirum cupiditatibus , quibus afficimur , congruunt illae , aut repugnant . Ejusmodi igitur de illis judicium ferimus , quale nobis cupiditates ipsae suadent : adeo quidem , ut rerum veritas atque utilitas unum idemque nobis fiat . Id autem ex eo profiscitur , quod hominis animus cupiditatibus ita immutatur , ut quaecunque ad eas referuntur , etiam mutata ipsi videantur . Quamobrem sibi quisque attendat , & postquam quibus maxime ducatur cupiditatibus , deprehenderit , earum conclusionum veritati diffidat , in quibus efficiendis affectuum vis valere potuerit : ideas accuratius expendat , diligentius examen instituat , donec nullum cupiditatum consiliis locum esse adverterit .

III. At longe majus impedimentum in rerum aestimatione , & turpior humani intellectus aber-

ratio proficiscitur ex Philautia. Hominis animus natura ipsa suadente se amat; huiusmodi igitur amor plerumque in caussa est, cur quae nobis arripet sententia, ea vera esse, & cuique probanda videatur. Et sane, ut advertit supra laudatus Verulamius (a), *adamant homines scientias & contemplationes particulares, aut quia auctores & inventores se earum credunt; aut quia plurimum in illis operae posuerunt, iisque maxime assueverunt.* Id autem turpe admodum est, & errorum non levium origo. Inde enim proficiscitur, ut propriae sententiae rationes rimari homines non curent, aliorum rationibus aures accommodare negligant; veritatem sola auctoritate metiri contendant, despiciatui habeant ac temeritatis accusent quoscunque suis opinionibus adversari deprehenderint.


IV. Veritati comparandae adversatur etiam Negligentia, & taedium laboris, quem in quaestionibus discutiendis ferre oportet. Evenit enim plerumque, ut alicujus quaestionis instituto examine post aliquot tentamina, post aliquot repudiatas conjecturas, ei tandem assensus praebeatur, quae ultima occurrit. Hanc Mens laboris persequendi taedio capta ultro amplectitur, eamque, licet omnium sit pessima, sibi tuendam statuit. Quandoque etiam laboris difficultas efficit, ut veritatis assequendae spem Mens dejiciens in supina ignorantia contabescat.

V. Errandi tandem causam affert Praeceptum Judicium. Cum enim objectas nobis ideas mature non expendimus, in subjecti & praedicati con-

ve-

(a) *Nov. Org.* 53.

venientia & repugnantia deprehendenda facile fallimur. Maxime igitur opere curandum est, ne perceptae idearum relationi extemplo ac temere adquiescamus. Sed contra assensum nostrum usque sustineamus, donec ideis accuratius expensis, in quo secum illae conveniant aut discrepent; exploratum sit. Id enim sapientis est, auctore Tulio (a): *Ego maximam actionem puto, repugnare visis, obistere opinionibus, & assensus lubricos sustinere.* Hic autem advertendum duco, ne iudicii suspensione abutamur. Nimirum non eo usque deveniendum est, ut vel ab ipsa evidentia oculos avertamus. Vietrici enim perspicuitati cedere oportet: isque veritatis certus est character, cum propositae evidentiae attendentes ad assensum impellimur.



LOGICAE ELEMENTORUM

P A R S IV.

HActenus varias Mentis *inspyias, operationes*, quibus rerum notitias sibi ipsa comparat, prolecuti sumus: superest, ut quo pacto ad veritatem investigandam aliisque proponendam iis utendum sit, videamus. Porro artem hanc, qua cognitiones nostras eo ordine disponere institui-
mur, ut ad veritatem inveniendam eamque aliis

M 4

ex-

(a) *Acad. Quaest. lib. IV.*

explicandam ducamur , *Methodum* nuncuparunt Philosophi .

Isthaec igitur *Methodus* duplex est : altera quae veritati investigandae conducit : altera quae veritas inventa docetur . Haec *συνθετική* , sive *Compositionis* , illa *ἀναλυτική* , sive *Resolutionis* *Methodus* Graecis vocabulis e Geometriae penu depromptis nominantur .

Est autem , in quo ambae convenient , & in quo discrepent . Quod inter se commune habent illud est , quod utraque a notis ad ignota gradum faciat , ita quidem ut novae semper veritates e veritatibus semel cognitis emergant . Deinde quae nota sunt , utrobique priora proponuntur , ut ex iis per conclusiones ad incognita gradus fieri possit . Ac tandem omnis haec conclusionum series in utraque propositionibus inter se connexis componitur .

Verum in eo discrepant , quod *Methodus analytica* veritatem investigat per resolutionem compositorum in simplicia , totius in partes , effectuum in causas . Quare in quaestione aliqua explicanda veritates , quae ad res singulares pertinent , examinat , minuta quaeque confectatur , ut paullatim ad universalia progrediatur . Hujus *Methodi* exemplum praebet *Inductio* , quae a partibus totum colligit .

Contra *Methodus synthetica* ab universalibus ad particularia descendit . Hinc generales quaedam veritates proponit , e quibus singulares deducit . Syllogismus , qui a toto partem concludit , *Syntheticae Methodo* similis est . Perinde igitur inter se differunt , ac Ratio inquirendae

Ge.

Genealogiae, cum a majoribus ad posteros descenditur, aut a posteris ad majores ascenditur.

Ut autem recte utraque Methodus instituat, nonnullae regulae proponuntur à Dialecticis, quas hic breviter recensere omnino oportet.

C A P U T I.

De Methodi Analyticae Regulis.

I. **P**rima Methodi Analyticae regula postulat, ut propositae quaestionis status probe intelligatur. Summo enim opere cavendum nobis est, ne praecipiti mente aliquid explicandum aggrediamur prius, quam constiterit quod investigare oporteat. Enim vero cum notas, quibus quod quaerendum est veluti insignitur, minime cognitae habemus, vagari & errare cogimur: neque illud affecutos esse, si assequi contigerit, neque a scopo aberrasse, si unquam aberraverimus, animadvertere licet.

Quaevs enim quaestio etsi aliquid, quod lateat, comprehendit; secus enim nihil quaerere oporteret: tamen quod ignotum est quibusdam notis & conditionibus circumscribitur: unde nimirum fit, ut hanc rem potius, quam aliam quaeramus: ac si eam invenisse dabitur, inde colligamus affecutos esse, quod quaerere propositum fuerat.

Atque illud imprimis advertendum est, ut in conditiones, si quae sint, animum intendamus: illis,

illis quidem ita prospicientes, ut neque alias adjicere, neque ex iis, quas quaestio complectitur, aliquas omittere curemus. Quippe hujusmodi conditiones, nisi intelligantur, obscuram reddunt quaestionem; intellectae vero saepe ejus solvendae viam aperiunt.

Praeterea ad statum quaestionis probe intelligendum juvat etiam, immo necesse est, ut singulorum verborum sensus sedulo inspiciatur, ac determinetur. Quare verbis perspicuis atque ab omni ambiguitate liberatis exprimatur; ne quot sunt propositionis sensus, totidem quaestiones enascantur.

Ita (ut quaestionis analyticæ solvendae exemplum proponamus, ac deinceps prosequamur) si quaeratur causa Soni: in id primo incumbendum est, ut quaestionis sensum assequamur, & statuamus. Sonitus enim nomine venit tum tinnitus aere pulsato redditus, tum ipsius sonitus *sensatio* in nervis ad id a natura institutis excitata. Idcirco sic planius quaestio proponetur: *Quid nimirum sit illud, quod tum aeri pulsato, tum ex hujus percussione auribus accidit, unde soni perceptio excitatur.*

II. Hanc excipit altera regula, quae diversas ideas in quaestione occurrentes, separandas esse jubet, ut: in plures peculiares quaestio soluta facilius expediatur. Quippe fieri nequit, ut recte expendantur, quae confusa & simul permixta contemplamur. Qui enim plura, quam potest, mente complecti nititur, se ipse perturbat, neque aliquid certe de iis judicare potest: non secus quam qui oculis plura uno obtutu temere confusa intuetur.

Ni-

Nihil igitur antiquius habendum est, quam ut quaestionem in sua capita dividamus: tum ea singillatim expendamus; eo sane ordine, ut ab iis initium sumamus, quae simplicioribus ideis constant: neque ad alia discutienda progrediamur, nisi priora nobis certo constiterint.

Quare ut propositae quaestioni insistamus, in haec membra eam partiemur. 1. *Quid Aeri pulsato contingat, & quid praestet*: 2. *Cui tribuenda sit communicatio inter corpus sonorum & aures*: ac 3. *Quid auribus ipsis accidat*.

III. Sequitur deinde tertia regula, nimirum: Aliquo ingenii conatu retegendas esse medias ideas, seu quos *terminos medios* Schola appellat, quarum ope peculiares quaestiones solvi possint; ut iis definitis atque in unum conjunctis inveniat, id, quod quaerebatur. Quamobrem in memoriam revocare oportet, quae de ea re, de qua agitur, nobis comperta sunt; ut ex his mutuemur ideas, quae in instituto examine locum habere possunt.

Itaque ad trutinam revocabimus singulas quaestiones de Causa Soni. Et 1. quidem, ut propositionem, quae primas obtinet in quaestione explicemus: nihil aliud, Aeri Campano, dum percutitur & sonum edit, contingere observamus, nisi tum motum, quem vocant *oscillatorium* totius Aeri, tum motum tremulum exiguarum partium ejusdem. Deinde experientia demonstrante potius in tremore duntaxat exiguarum partium, quam totius Aeri Campani sonum statuendum esse comperiemus.

2. Quod ad alteram pertinet, advertemus illud,

lud, ratione cujus auditus concutitur, vel aëri, vel luci adscribi posse; quippe praeter haec nulla Aes Campanum inter & aures corpora interjecta esse constat. Cum autem lux nihil praeflet, cum noctu etiam sonus audiatur; hinc uni aëri soni communicationem tribuendam esse deducimus; praesertim quia sublato aëre nullus sentiatur sonus, licet corpus sonorum valide percutiatur.

Jam illud porro quaerendum est, quomodo per aërem sonus communicetur. Atque hic experientia nos docet tremulum Aeris Campani partium motum ita per aërem propagari, ut oscillantes illius partes proximum aërem premiant & condensent, mox recedere & sese iterum expandere sinant; atque ita deinceps aëre veluti undante tremor ad aures usque deferatur.

3. Tertia tandem quaestio enucleanda superest, quidnam nimirum auribus accidat. Qua in re auris structuram consideramus: atque in ea deprehendimus exstare cavum exterius apertum aëre repletum instar canalıs, interius vero tenui quadam membrana, quod *Tympanum* dicitur, ab externo cavo separari; atque ibi varios canales ex materia ossea & elastica occurrere: hisque tandem nervum cohaerere. His animadversis colligimus motum tremulum Tympano communicatum diffundi per interius cavum, ita ut omnia in aure ejusmodi motu afficiantur.

IV. His tandem quarta regula succedit, qua admonemur, ut singulis propositionibus, in quas quaestio secta est, discussis, quidquid inventum fuerit colligatur in unum, quo propositae quaestionis solutio habeatur. Ut

Ut igitur quae in Causa Soni expendimus in compendium redigamus, ita satis quaestioni fieri poterit. Cum corpus sonorum percutitur, motus partium tremulus aëri adjacenti deinceps communicatur, ita quidem ut ipse aër in Tympano contentus eundem motum concipiat: atque hinc ossa omnesque auris partes eodem motu cientur, qui nervo cohaerenti communicatus soni sensum in Mente excitat.

Atque hae sunt potissimae Methodi Analyticae regulae; quibus illud addere juvat, quod si absoluto examine, non adhuc quod investigatur elucet: iter omne, ut ita inquam, diligentius relegendum est: tum relectis iis, quae inutilia ad quaestionem solvendam fuisse videmus, accuratius cetera, & si quid supersit, quod usui esse queat, excutiantur,

C A P U T II.

De Methodi Syntheticae Regulis.

Quaenam sit Syntheseos indoles ex iis, quae supra innuimus, satis liquet. Postquam nimirum veritatem aliquam invenire, aut quaestionem explicare licuit, ordinem quaerere omnino oportuit, quo partium ipsius nexu facile intelligeretur; atque illius veritas ita ceteris probaretur, ut nihil in dubium revocare possent.

Id autem facilius peragi non aliter potuit, quam si propositis generalibus principiis, quorum veritas aut per se constet, aut probetur, inde

cog.

conclusiones colligerentur: atque is ordo servaretur, ut posteriora a prioribus derivarentur.

Porro ut Methodus isthaec fini, cui intendit, apte respondeat, plura sunt quae servanda moment Logici. Quod autem praecepta in subiecta materia, ut ajunt, facilius intelliguntur: idcirco Methodum, quam adhibent Geometrae, prosequemur; praesertim cum ea persuadendae veritati communi sententia accommodatior censeatur.

Cum igitur Geometris ea proponere in animo sit, quae evidentia essent, atque *εὐαρίστητα* (h. e. *quibus nihil obijci potest*) haec accurate exsequenda sibi ipsi praescripserunt. 1. Ut a vocabulis ambiguus abstinerent; quamobrem vocum, quibus utuntur, definitiones in antecessum exhibent. 2. Ut ratiocinia iis principiis adstruerent, quae suam perspicuitatem atque evidentiam cuique probarent; itaque apud ipsos *Axiomata* praecedunt, quorum veritas tanta luce fulget, ut noctem quamdam potius ipsis affunderet, si quis ea evincere niteretur. 3. Tandem ut omnia *ἀποδεικτικῶς*, *demonstrativis*, ut ajunt, argumentis ostenderent; atque hinc est, ut ipsorum *Theoremata* & *Problemata* Definitionibus, atque Axiomatis, aut Propositionibus demonstratis innituntur.

Ad haec quidem capita revocari possunt quaecunque praestant Geometrae, cum veritates, quas investigarunt, demonstrant. Ut autem Methodus haec Geometrica clarius intelligatur, quinque regulas, quas a Cll. Arnaldo (a) & Cle-

(a) *L' Art de Penser Part. IV. chap. III. IV. &c.*

Clerico (a) mutuati sumus ; hic tradere utile erit ; quarum primae duae Definitiones , tertia Axiomata , ceterae Demonstrationes respiciunt .

I. Prima regula praecipit , ut nullum vocabulum subobscurum aut ambiguum sine definitione adhibeatur . Ut enim aliquid evidenter demonstretur , perfecte intelligere oportet quae dicuntur : at nullo pacto id assequetur , qui obscuris aut ambiguis vocibus rem pertractaverit . Quod si igitur huiusmodi voces usurpandae sunt , earum notio perspicue aperiatur .

Id autem potissimum praetermittendum non est , cum in quibuscunque Scientiis aut quaestionibus explicandis vocabula *τέχνη* usurpantur , quae nimirum *cuique Arti sunt propria* . Ea enim accurate definire oportet ; quippe quae plerumque auditoribus incognita sunt : atque hinc vel maxime confusio orietur , si illa aliter , ac res postulat , accipiantur .

II. Ut definitiones usui sint atque emolumento , in definitionibus nullis vocabulis , nisi notissimae significationis , aut jam explicatis utamur . Ejusmodi scilicet sint vocabula , ut quanta maxima fieri potest perspicuitate eam ideam exhibeant , quam verbo , quod definimus , subesse volumus .

Nam cum non satis nitide idea exprimitur , quam voce aliqua designamus , sensim sine sensu ad aliam prorsus ideam transgredi solemus . Quod vitium inde dignoscere licet , si quoties vox ea occurrit , ipsi definitionem antea traditam sufficiamus .

At-

(a) *Oper. Philosoph. T. I. P. III. cap. IX.*

Atque huius vitii ne ipsum quidem Euclidem purum fuisse nonnulli animadvertunt. Is enim angulum definit *duarum linearum in eodem plano se mutuo tangentium, & non in directum jacentium alterius ad alteram inclinationem*. Atqui hanc definitionem cum re definita reciprocari non posse, ubicunque *Angulus* ab Euclide usurpatur, ipsi ajunt. Cum enim Angulum bifariam secare docet, se alio sensu eam vocem intelligere aperte ostendit. Quippe non duarum linearum inclinationem, sed spatium ab illis, si earum extrema jungerentur, interceptum dividi arbitrantur. Verum legantur Guilielmi Whistoni Ad-ditamenta in Tacquetium (a).

Ex his autem illud colligatis volo, quod licet nominum definitiones a nostro pendeant arbitrio: omnis tamen cura in eo collocanda est, ut perquam perspicue idea explicetur, quam vocabulo, quod definitur, adfingimus. Ita enim fiet, ut eadem illud notione semper accipiatur; & vocis definitae vices definitio gerere usque possit.

III. Regula, quae ad Axiomata spectat, ea est, ut nihil, quod non sit evidentissimum, loco Axiomatis habeamus. Quamobrem ne in hisce statuendis errori obnoxii simus, duo observanda proponimus.

1. Cum in propositione subjecti ac praedicati mutua relatio mediocri attentione adhibita ipsa per se animo objicitur: axioma erit ea propositio. Nimirum ea perspicuitate praedita est, ut de-

(a) *Schol. ad Propos. XVI. Lib. III. num. 7.*

demonstratione non egeat. Ubi advertatur distinguendam esse demonstrationem ab explicatione, quae nihil officit Axiomatum indoli.

2. Quod si, propositione inspecta, subjecti ac praedicati relationem continuo deprehendere non licet; illa inter axiomata non est recensenda: sed adscitis aliis ideis debet demonstrari. Ita quod omnes anguli cujuscunque Trianguli duobus rectis sint aequales, axioma non est; quippe id ex comparatione tertiae ideae, linearum scilicet parallelarum demonstratur.

IV. Tandem quod ad Demonstrationes ipsas attinet, hae servandae sunt regulae. 1. Ut nihil in iis adhibeatur, praeter definitiones constitutas, Axiomata, & Propositiones jam demonstratas. 2. Ut nunquam abutamur ambiguitate vocum, eas alio sensu ab illo, quem in Definitionibus tradidimus, accipientes.

Atque haec de Methodo Syntheseos, quae a Geometris potissimum adhibetur, dixisse fatis. Haec autem aliis Scientiis & Quaestionibus pertractandis omnino accommodari non potest. Neque enim in quibuscunque Scientiis Definitiones & Axiomata proponi, atque eundem prorsus ordinem servari res patitur: quin etiam nonnunquam obscuritatem potius & confusionem gignit, quam lucem affert. Hinc Geometricum hujusmodi apparatus, ut reliquis imponant, a nonnullis adoptari scite advertit Cl. Alembertius (a). Exterior enim iste Matheseos veluti cortex ab

(a) *Mélanges de littérature T. IV. Essai sur les élémens de Philosophie §. V.*


iis adhibitus, qui aut erroribus abripiuntur, aut sublestae sunt fidei, eo intendit, ut tum ipsi tum reliqui decipiantur. Affectatam praeterea sapit diligentiam, quin ineptam ac puerilem imitationem, cum quis summa religione praeter Geometricum ordinem, & Geometrica vocabula a ceteris abstinet. Quasi nimirum voces *Theorema*, *Corollarium*, *Scholion* &c. arcana quadam virtute demonstrationis vim omnem contineant; ac si ad calcem propositionis adjicitur *Q. E. D.* in demonstratis habeatur, quod adhuc indiget demonstratione: ut idem laudatus Auctor ait (a). Quamobrem in eo duntaxat omnis industria collocanda est, ut in vocum ambiguitate fugienda, in iisdem definiendis, atque in recte ratiocinando Geometrarum vestigiis insistamus.

ME.

(a) *Ibid.* §. XX.

METAPHYSICAE

ELEMENTA.



ANTELOQUIUM.

DE A Philosophiae pars, quae res ab omni corporis contagio sive reapse immunes, sive vi Mentis abstractas contemplatur, vulgo *Metaphysica* nuncupari consuevit. Eo autem nomine donata est: vel quia *μετὰ τὰ φύσιν*, post res *physicas* ipsi locus datus fuerit, cum collecta Aristotelis scripta Andronicus Rhodius digessit; vel quia sit *μετὰ φυσικὴν*, quippe res pertractat *supra physicam conditionem corporum* constitutas.

Omnis porro *Metaphysica* doctrina aptissime in tres partes distribuitur, quarum altera de Ente, ejusque affectionibus agit: altera humanae Mentis naturam, ejusque dotes prosequitur: tertia tandem Dei existentiam, atque attributa rationis lumine perscrutatur.

METAPHYSICAE ELEMENTORUM


PARS I.

ONTOLOGIA.



CAPUT I.

De Principiis Cognitionis Humanae.

S est nostrarum cognitionum ordo & nexus, ut aliae ex aliis profectae omnes certis quibusdam principiis, quorum veritas evidenti perpicuitate fulget, innitantur. Quae autem humanae cognitioni subjiciuntur, aut res sunt *necessariae*, quae nimirum uno prorsus pacto determinari possunt; aut *contingentes*, quarum scilicet determinatio magis haec, quam illa necessaria non est. Itaque primum omnium hujusmodi principia, quibus Mens nostra fuleitur, statuenda esse duco.

§. I.

De Principio Contradictionis.

INtimo Mentis nostrae testimonio aperte docemur ita natura comparatos esse, ut cum aliquid

quid esse judicamus, idem simul non esse haud judicare possumus. Id sane nemo unus, nisi qui reclamantem conscientiam contemnit, in se experiri inficias iverit. Quis enim quavis vi interposita ab intellectu impetrare poterit, ut dum solem intuetur, sibi que conscius est, quod eum videat, illum non intueri sibi persuadeat?

Huic interiori Mentis experimento innititur satis illud vulgatissimum Axioma: *Impossibile est idem simul esse, & non esse*. Hoc porro *Contradictionis* principium appellari consuevit propterea, quod contumaces sibi ipsos *contradicere* ostenditur, cum aliquid, quod illi negaverint, per hoc principium *indirecte* demonstratur.

Jam vero vulgo in Scholis recensitum Axioma veluti primum cognitionis principium proponitur. Verum ita omnia confundunt, ut quonam sensu humanae cognitionis principium illud dicatur, intelligi nequeat. Ne igitur quae proficere disputationibus huc & illuc trahantur, quaestionis statum constituamus oportet.

Quamobrem nulla hic controversia instituitur, num huic Axiomati primae adscribendae sint partes propter evidentiam, qua fulget, haec enim omnibus communis est. Neque nunc expendimus, utrum illud primum omnium nostrae Menti occurrat; mox enim hoc persequi dabitur. Illud duntaxat quaerimus, num laudatum Axioma ejusmodi sit, ut non modo veritas omnis nostrarum cognitionum, quae in rebus necessariis versantur, inde proficiscatur: sed etiam earundem demonstratio in eo innitatur, atque ad illud revocetur. Quos sane characteres si hoc Axioma

prae se ferat, veluti humanae cognitionis Principium jure habebitur.

PROPOSITIO. *Contradictionis Principio humanarum cognitionum, quae res necessarias respiciunt, veritas innititur.*

Prob. I. Illud veritatis basis est & fundamentum, quo stante cognitionum suarum certa Mens est; contra illo convulso veritas omnis intercedit. Atqui is est character Contradictionis Principio peculiaris. Ergo.

Minor Propos. demonstratur. Finge idem esse, & non esse eodem temporis vestigio: nullus amplius erit veritati locus. Certi enim esse non possumus trianguli rectilinei duo latera tertium excedere, nos id percipere; cum nihil vetat, quin eodem horae momento trianguli duo latera reliquo non sint majora, idque minime percipiamus. Si igitur contradictionis principium convellatur, veritas omnis pessum ibit.

II. Adeo constat hoc Axiomate nostrae Mentis cognitiones fulciri, ut inde notionum, quas sibi comparat, veritatem veluti e nativo fonte hauriat. Earum enim aliae res necessarias, aliae possibiles, aliae tandem impossibiles respiciunt. Atqui haec omnia ad Contradictionis Principium revocantur. Ergo.

Nam I. propterea aliquod necessarium, sive unico modo, ut ajunt, *determinabile* esse adferimus, quod oppositum ejus esse nequit, quippe contractionem involvit. Nimirum si quod necessario opponitur, verum esse admitteretur, res eadem simul esset & Non esset. Notio igitur rei necessariae ad Contradictionis principium revocatur.

tur. Ita in triangulis rectilineis inde colligitur, necessario tres angulos duos rectos adaequare, quod si eodem manente laterum numero, eademque linearum specie fieri posset, ut angulorum quantitas immutaretur, eadem figura simul esset, & non esset triangulum rectilineum.

2. Eo etiam res redit, cum quidpiam possibile esse deprehendimus. Tale enim esse statuimus, quod nullam contradictionem complectitur: unde scilicet non oritur, quod res eadem simul esset, & non esset. Ergo ex laudato axioma rei possibilis notio profiscitur.

3. Tandem impossibile habemus quodcumque contradictionem comprehendit: quod scilicet si statuatur, idem de eadem re affirmatur, & negatur. Ita cum Geometrae ostendunt fieri non posse, ut duo circuli, quorum alter alterum contingat, sint concentrici: ex hypothesi, quod idem habeant centrum, efficiunt radium minoris aequalem esse debere radio majoris circuli, h. e. partem aequalem toti. In quo contradictio exprimitur; eadem enim pars esset tum minor, tum aequalis toti. Ergo rem impossibilem esse ex laudato axioma definimus.

Quamobrem praesens Axioma plurimum valet ad comprimendam eorum audaciam, quibus jure aut injuria omnia quamvis certa negare mos est. Ad eas enim incitas rediguntur, ut suismet affirmationibus induantur, & jugulentur. Quod ex demonstrationibus, quas vocant *indirectas*, quibus Geometrae potissimum utuntur, unicuique colligere datur.

III. Eodem contradictionis principio Mens du-

citur, ut rerum omnium proprietatum ideas recte efformet. Nam ex eo, de quo loquimur, Axiomate necessario efficitur, unum idemque Ens proprietates complecti non posse, quae secum ita pugnant, ut altera alteram subvertat. Quod sane quanto nobis sit usui, atque emolumento, ne temere cognitiones nostrae procedant, nemo est, qui non agnoscat.

Quae cum ita se habeant, nihil causae esse video, cur nonnulli huic Axiomati cognitionis humanae Principii nomen abjudicandum esse existiment. Id fortasse eos falsos habuit, quod animum induxerunt, illud veluti cognitionis principium eo haberi, quia, inde humana eruditione profecta, veritates omnes in eo quasi quodam semine delitescentes explicantur. Lockius sane id sibi persuasum fuisse ostendit, cum laudatum Axioma cognitionis principium esse propterea neget, quod nemo unus scientiae alicujus systema in eo inniti monstraverit: neque quis dixerit illius ope novas rerum notitias acquiri, aut veritates abditas e tenebris ad lucem evocari (a). Quibus quidem querelis nullus relinqueretur locus, si quaestionis status definiretur.

At enim dixerit quispiam. Infinita est Dei scientia ac potentia. Quae igitur nobis impossibilia videntur, ejusmodi non sunt, si ad Deum referantur. Ergo divina potentia fieri potest, ut idem sit & non sit eodem temporis vestigio. Atqui hoc semel admissio Contradictionis principii veritas cadit. Nostrarum igitur cognitionum principium temere statuitur. Re-

(a) *Essai de l'Entend. Humain Liv. IV. Cb. IV.*

Respondeo a vero aberrare recensitam de *æstæis impossibilitate* opinionem. Quod enim *absolute* impossibile est, ne a Deo quidem fieri potest: ut inferius demonstrabitur. Nullis vero limitibus Dei potentiam coercet, qui Ipsum impossibilia præstare, & pugnancia secum frontibus adversis componere negat. Neque enim est divinæ potentiae *objectum*, quod nihil est; cujusmodi sane est, quod idem simul sit & non sit. Hi quidem perinde magnifice de Deo loqui videntur, ac qui illius potentiam eo celebraret, quod possit facere *bliri*: quæ vox nihil significat.

§. II.

De Principio Rationis Sufficientis.

Veritates, quas *contingentes* appellamus, Rationis sufficientis principio innituntur. *Ratio* autem *sufficiens* nuncupatur a Philosophis id omne, unde intelligitur, cur aliquid sit. Ex. gr. Inde apparet aquam e tubis superne clausis, si invertantur, non effluere, quod pressio aëris inferioris major est, quam pondus columnæ aqueae in tubo contentæ. Experimenta enim docent, quod si tubus duos & triginta pedes excedat, aqua quidem effluet usque ad pedum duorum & triginta altitudinem; propterea quia duæ columnæ, altera aëris, aquæ altera, cum habeant eandem diametron, ad hanc altitudinem æquilibrium servant. Pondus igitur columnæ aëris, quæ tubi orificio subjicitur, est *Ratio* sufficientis, cur aqua non effluat e tubis, qui ex parte una occlusi invertuntur.

Jam vero eam experimur Mentis nostrae indolem; ut nihil admittat, nisi unde illud sit assequatur. In naturae quidem effectibus rimandis non adquiescimus, nili aliquid occurrat, unde veram illorum rationem deprehendamus. Quod si illam assequi non liceat, haud quidem ullam adesse negamus: sed eam nobis esse incompertam ingenue fatemur. Quae cum ita sint; hinc est, quod Philosophi asseverare non dubitent, nihil omnino esse sine Ratione sufficiente. Nimirum omnia, quae aequae esse ac non esse, aut hoc vel alio pacto esse possunt, ab aliqua ratione, cur potius sint, quam non sint; aut hoc magis, quam alio pacto sint, determinari oportere.

Rationis igitur sufficientis principium respicit essentiam, existentiam, possibilitatem &c. rerum omnium, sive spirituales illae sint, sive corporeae. Illud tamen advertatur necessum est, quod effectuum omnium, qui in hac rerum universitate producantur, Ratio sufficiens dicitur quodcunque in causa est, cur illi producantur: ita tamen ut deprehendere sit, quemadmodum effectum a causa proficiscatur. At Ratio sufficiens, unde liberae causae ad agendum sese determinant, sita est in boni & mali rationibus, quae in re objecta deprehendi possunt: & quae propterea proprio vocabulo *motiva* a Philosophis appellantur.

Ne qua porro difficultas ante, quam ad quaestionem probandam aggrediamur, vobis obversetur: illud primum planum faciam, quemadmodum fiat, ut stabilito Rationis sufficientis principio, Dei & hominis libertas incolumis perse-

veret. Enimvero si tanquam exploratum statuatur Divinam atque humanam Mentem sine motivis ad agendum se nunquam determinare, forte quis suspicari poterit libertati officere hujusmodi motiva.

Verum omnis suspicio prorsus evanescit, si rem diligenter attendamus. Nam quod I. attinet ad humanam voluntatem: motiva, quibus illa agitur, ut sese determinet, ejusmodi non sunt, ut naturali quadam necessitate ipsa feratur. Motiva enim alia sunt *completa*, quae nimirum ita rem Menti objiciunt, ut nulla mali species ipsi inhaereat: alia vero *incompleta*, cum in re, quae Menti considerata objicitur, aut boni defectus, aut mali ratio deprehendi potest. Incompleta porro motiva sunt, quae, cum aliis antecellunt, voluntatem determinant.

Jam vero potestas ad opposita, in quo sita est voluntatis libertas, nihil detrimenti patitur, cum a motivis incompletis voluntas ducitur. Haec enim ita Menti repraesentantur, ut nunquam motivis oppositis locum non relinquunt. Licet igitur voluntas certo atque ἀσφαλῶς infallibiliter, nulla tamen naturali necessitate impulsam secundum motiva sese determinat. Naturali quidem necessitate voluntas determinatur, cum objectum totum explet ipsius appetitum. Explet autem, cum nulla ipsi inest ratio mali, aut defectus boni: cujusmodi est *bonum in communi*, & *Deus clare visus*. Atqui bona quaecunque peculiariter ita comparata sunt, ut quamvis in ipsis aliqua boni species appareat, mali tamen rationem, & boni defectum deprehendere possimus. Ea igitur
omnia

omnia naturali necessitate voluntatem ad se trahere nequeunt.

II. Quod vero ad Deum attinet : duplici e fonte motiva hauriri possunt, vel enim a rebus objectis desumuntur, & ea *objectiva* licet appellare: vel ex ipso agente proficiscuntur, & ea idcirco *subjectiva* nuncupamus. Cum autem dicimus nihil a Deo fieri sine Ratione sufficiente, ex motivis subjectivis illum determinari adferimus.

Deus enim rerum omnium rationes comprehendit, atque universa quae agit, ad seipsum veluti postremum rerum omnium finem referuntur. Ergo motiva, quibus sese ad agendum libere determinat, ex objectis desumere non cogitur: sed, ut qui sibimet ipse sufficit, ex infinita sui natura illa haurit. Haud igitur Rationis sufficientis principium Divinam laedit libertatem.

His itaque scrupulis evulsis, quam antea significavimus quaestionem, in proxima Propositione probandam suscipiamus.

PROPOSITIO. *Nihil est sine Ratione sufficiente cur potius sit, quam non sit.*

Demonstratur Propos. argumentis, quae vocant *indirecta*. Cuicumque enim hoc principium negandi libido est, is quidem non pauca *ἀδύνατα* & *ἀποσδιόρυστα*, *impossibilia* atque *absurda* vera esse fateatur oportet.

I. Esto, nulla adsit Ratio sufficiens, cur aliquid potius sit, quam non sit; nihil igitur erit, unde intelligatur, cur hoc sit. Ergo propterea hoc existit, quod nihil erat, unde oriretur. Atqui hoc absurdum esse nemo non videt. Quis enim sanae mentis dixerit nihilum fieri, aut efficere aliquid? Ergo.

Pro-

Propositum argumentum exemplo illustremus. Ponamus aquam frigidam calefieri. Si nulla suppetit ratio, per quam intelligere detur, cur aqua potius calida, quam frigida sit; nihil erit aut intra, aut extra aquam, cui calor acceptus referatur. Aqua igitur, quae modo erat frigida, calorem concepit, cum nihil esset, unde calor proficisci poterat. Aut igitur nihil in aqua calorem induit, aut nihil extra aquam illum effecit. Sed vulgo notum est axioma, *Nibili nulla sunt praedicata.*

II. Everso Rationis sufficientis principio veritas omnis uno duntaxat temporis momento consisteret. Rem enim eandem perseverare, ac quae modo erat, in explorato habemus, dummodo nulla mutationis adsit ratio sufficiens. Atqui fieri potest, ut singulis momentis res mutationi subjiciantur, si quid sine ratione sufficiente esse potest. Ergo,

III. Eodem sublato principio nulla esset ratio, quare universam rerum compagem providentissimo supremæ Mentis consilio conditam esse adfereremus. Nam res, quarum nulla est ratio sufficiens, esse possunt: nihil igitur prohibet, quominus & ipse Mundus nulla moderante natura, sed casu effectus esse dicatur.

IV. Si e medio laudatum principium eripias, nullum vigiliam inter & somnum erit discrimen: atque omnia in rerum natura perinde evenirent, ac quae in nescio quo mundo, quem cerebro calente effingimus, contingere jocandi causa commiqüiscimur. Enimvero cum in somniis vanæ finguntur species, ut nec pes, nec caput
uni

uni reddatur formae : aut cum in Mundo commentitio ea omnia , quae aniles fabellae venditant, fieri narrantur ; nulla sane ratio reddi potest, cur haec ita se habeant . Horum igitur similibus locus esset in praesenti rerum universitate, si cur singula fierent , nulla adesset ratio sufficiens . Hujusmodi argumentum e somno & fabuloso Mundo petitum etiam atque etiam premit Wolfius (a).

Quae vulgo objici solent eo potissimum respiciunt ; quod falsum sit homines rationes confectari, cum quidpiam agendum sibi proponunt : tum etiam quod Rationis sufficientis principium Menti necessitatem inferre videatur.

Et I. ajunt. Voluntas non raro sine motivis sese determinat. Nulla igitur datur ratio sufficiens actuum nostrae Mentis. Antecedentis Propos. veritas ex intimo conscientiae testimonio aperte patet. Finge enim duos cuidam ejusdem pretii nummos offerri, ut alterutrum eligat, quae- nam excogitari potest ratio, cur hunc, quam illum eligere ipse malit? Nullo igitur motivo impulsus alterutrum sumet. Ergo. Vulgaria haec sunt, sed quae Mentis nostrae indolem aperte produnt:

Respondeo. Impudenter nos provocant ad conscientiae testimonium, unde unusquisque monetur nunquam fieri, ut ipse aliquid agat, cujus si quis rationem sciscitetur, nullam praestare poterit. Quin imo adeo difficile est, aliquid sine motivis nos capeßere, ut in rebus arduis cum
nul-

(a) *Ontolog.* §. 77. 493.

nulla, qua ducamur, ratio nobis obversetur, ad amicorum consilia confugiamus.

At enim nonnunquam nulla esse videtur ratio, quare aliquid agamus. Verum cum desunt rationes rebus ipsis intrinsecus, tum demum quaecunque vel levis ratio extrinsecus satis erit, ut voluntatem impellat: aut saltem consuetudo agendi nobis familiaris ratio erit, cur aliquid prae alio seligamus. Hinc ille, cui duo nummi appositum sunt, ut alterutrum accipiat, eum eligit, qui manui propior est, qua semper utitur, cum quid de mensa sumere solet. Legatur Wolfius (a).

Quod si motiva, quae in rebus objectisprehendimus, pari robore praedita sint: voluntas ita anceps erit, ut in neutram partem propendeat, nisi qua accedat ratio, quae ipsam in unam potius, quam in alteram impellat. Statum hunc, quem vocant *indifferentiae*, nemo est qui per saepe non experiatur.

Ajunt II. Nulla adest ratio, cur velimus ea, quae deteriora judicamus. Atqui fere semper licet meliora videmus, deteriora tamen sequimur. Nullis igitur ducta rationibus saepe voluntas agit.

Resp. Major distinguenda est: Sine motivis se Mens determinat, cum ea vult, quae deteriora judicat judicio *practico*, concedo; judicio *theoretico*, nego. Atque eodem pacto distinguenda Minor: Meliora videmus, deteriora sequimur, quae ejusmodi esse duximus judicio *theoretico*, concedo: judicio *practico*, nego. Plane constat voluntas-

(a) *Psycholog. Empirica* §. 899. 900.

tatem nihil amare, nisi quod per intellectum bonum esse deprehenderit : neque fieri posse , ut ipsa objectum malum propterea quod malum est, velit & amet. Verum Mens res objectas non uno pacto considerat . Eas enim generaliter & in se ipsis inspicere solet ; in quo situm est iudicium theoreticum . Easdem praeterea intuetur , prout ipsa versatur in eo statu, in quo agit ; quod sane iudicium practicum propterea dicitur , quod actionem proxime praecedat . Bonas igitur res quandoque Mens iudicat generaliter inspectas : at si illas perinde inspiciat , atque ad suae conditionis statum, ad cupiditates , quibus tenetur , ad praepudia, quibus imbuta est, illae spectant ; bonas non esse iudicat . Atque hinc est , quod licet objectum aliquod bonum esse iudicemus, eo tamen posthabito aliud deterius amplectimur , quippe quod appetitui nostro magis , quam illud consentaneum ultimo iudicio exhibeamus .

Ajunt III. Si voluntas non sine motivis se determinat, neque contra motiva se determinare poterit . Ergo motiva eam inferunt voluntati necessitatem , ut nihil illa velle possit, nisi quod ipsa obijciunt, quodque ipsa obiecerint, omnino velle debeat . Voluntas igitur libera non erit .

Respondeo ex iis , quae antea in hanc rem diximus , perspicuum esse , nulla Menti veluti vincula injici , etiamsi rationibus ducatur , ut agat . Necessario enim secundum motiva se Mens determinaret, si nulla alia suppetere motiva , quae in re objecta ab ipsa considerari possent . Verum penes Mentem est alia aliis omissis motiva inspicere , & pro diverso ipsorum genere

varie se determinare . Quamvis igitur non sine motivis se determinet (quod sane ad ipsius dignitatem conducit), libere tamen se determinat.

Quod vero Mens nequeat agere secus , quam rationes suadent , verum est : dummodo aliae in re objecta deprehendi non possint , quae illis praevaleant . Hoc autem libertati non officit : quin etiam ipsius voluntatis ingenio est apprimè accommodatum . Esto enim praeter motiva voluntas aliquid faciendum aggrediatur ; id quidem Mens amplectetur , quod tamquam malum sibi repraesentat : atque aversabitur , quod ut bonum ipsa intuetur . Malum igitur prout malum est , amore , bonum prout bonum est , odio voluntas persequeretur . Id vero a voluntatis indole prorsus abhorrere in confesso est apud omnes . Quod igitur voluntas nec sine motivis , nec praeter motiva se determinare potest , tantum abest , ut libertatem laedat , ut maxime eam perficiat ,

§. II.

De Criterio Veritatis .

Nihil equidem in rerum cognitione assequenda proficeret humana Mens , si nullae suppetere notae , aut characteres , quorum ope vera a falsis , certa a dubiis internoscerentur . Quamobrem modo dijudicandum est , quinam sit character Menti ad rerum veritatem detegendam praelucens , quod Graeca voce *Criterium* appellatur .

Philosophi ferme omnes in eo conveniunt , ut veritatis Criterium in Evidentia statuendum esse existiment . Haec autem pro diversa cogno-

scendae veritatis ratione triplex est, *Metaphysica*, *Physica*, & *Moralis*.

Evidentia Metaphysica in scientiis purae, ut ajunt, intellectiōnis locum habet. Est autem summa illa perspicuitas, qua attributum aliquod subiecto convenire aut repugnare cognoscimus. Duplex porro est, alia quae dicitur *simplicis Intuitionis*, alia *Demonstrationis*. Illa quidem habetur, quoties duarum vel plurium idearum convenientiam aut repugnantiam statim, ac illae sese nobis offerunt, uno mentis intuitu deprehendimus. Hujusmodi sunt Axiomata apud Mathematicos. Haec vero, cum idearum convenientia aut repugnantia e certis principiis necessaria illatione deducitur: uti Theoremata apud eosdem.

Evidentia Physica obtinet in iis, quae sensibus percipiuntur. Ea autem ex constanti & manifesto sensuum testimonio proficiscitur. Ita duo corpora aequalia mole, at inaequalia pondere si in aquas demittantur, quod gravius est, velocius descendere, physica Evidentia constat. Nam clare & constanter eam esse naturae legem sensibus percipimus, ut quo ponderosiora sunt corpora, eo majori velocitatis gradu in aquas mergantur.

Evidentia tandem Moralis in iis versatur, quorum cognitionem nec ratiocinii, nec sensuum opera, sed aliorum testimonio comparamus. Innititur porro constanti & publico hominum testimonio. Ita Romam, postquam septem Regibus paruit, regno sublato a Consulibus administratam fuisse, atque intestinis bellis agitatam in Caesaris potestatem incidisse, evidentia constat morali.

Quaerunt Philosophi, quaenam illarum ceteris

antecellat : & tum physicae, tum morali metaphysicam Evidentiam longe praestare communi sententia pronuntiant . Nam 1. metaphysica clarior est, atque interiori cernitur obtutu . 2. Quod metaphysicae veritati opponitur , *intrinsecus* & *absolute* impossibile est : quod autem physicae aut morali adversatur , *physice* duntaxat, & *moraliter* repugnat .

Verum illud advertatur velim , physicam scilicet & moralem ipsa metaphysica Evidentia fulciri . Nam 1. evidenter percipimus fieri non posse , ut sensus nobis a Deo attributi , quo externas res cognoscamus , & nos , & ceteros homines semper decipiant . Id autem in causa est , quamobrem vera esse ducimus , quae luculenter & constantissime sensibus haurimus . Physica igitur evidentia Metaphysica innitur .

2. Constanti hominum testimonio fidem adjungimus , ducti Metaphysica evidentia . Nobis enim evidenter constat fieri non posse , ut homines aut locis aut aetate inter se dissiti , quique diversis semper studiis abripiuntur , in id tacite conspirent , ut commentum aliquod obtrudant . Quae igitur Moralis dicitur evidentia ad Metaphysicam revocatur .

PROPOSITIO. *Adest nobis veritatis Criterium, illudque in Evidentia situm est.*

Demonstratur pars prima Proposit. I. Sibi suaeque ordinatissimae providentiae legibus debet Deus, ut ea homini suppeditet, quibus consequi id valeat , ad quod propriae naturae conditione agitur . Atqui flagrantissimo veritatis inquirendae studio , quod nisi ab institutore naturae nobis con-

signari non potuit, unusquisque se incendi experitur. Divini igitur muneris partes sunt, ut hisce nos instruat auxiliis, quibus veritatem assequamur.

II. Veritatis amorem Deus ipse nobis iniecit: Ergo & illius assequendae rationem praebeuit. Si enim adipiscendae veritatis arte destitutos nos voluit, vel impotens esset, vel nos inani appetitu misere torqueri in deliciis haberet. Atqui id a tanta Dei praestantia & bonitate omnino alienum est, Ergo.

Demonstratur pars altera. I. Illud veritatis Criterium appellamus, quo verum a falso, certum a dubio secernimus. Hoc autem per Evidentiam assequimur. Ea igitur veritatis Criterium esse recte statuitur. Minor prob. Vera a falsis, certa a dubiis id sane discriminat, quod quae vera sunt & certa ita Menti objicit, ut ea vera & certa non esse Mens sibi persuadere nequeat. Atqui unius Evidentiae character is est, ut Mentem ad assensum impellat.

Et revera quis unquam suae Mentis compos non plane perspicit omnino oportere, ut si duarum idearum relationem perspicue intueatur, in ea perceptione adquiescat? Quis non experitur internum quemdam stimulum, aut tacitas veluti rationis querelas non persentiscit, cum quod evidens est, verum esse fateri nolit? Adeo verum est, quod, apposite Tullius (a), *ut necesse est lancem in libra ponderibus impositis deprimi; sic animum perspicuis cedere.*

Cum igitur id praestet Evidentia, ut quam-

ma-

(a) *Lib. IV. Academ. cap. XII.*

maxime certos nos faciat attributum aliquod sub-
jecto reipsa convenire aut repugnare ; jure illa
tanquam veritatis Criterio utemur.

II. Ad veritatis cognitionem comparandam in-
fuso quodam appetitu ferimur. Atqui si veri Cri-
terium non esset Evidentia , h. e. si quae evi-
dentia nobis obversantur , vera non essent ; non
modo innatum hoc desiderium nunquam explere-
tur , verum etiam ad falsa potius ageremur ; quip-
pe evidentibus natura cedimus. Una igitur Evi-
dentia est , qua vera a falsis internoscere licet.

III. Evidentia , ut in se quisque experitur , vel
invitos ad assensum impellit. Nos igitur aut ad
veritatem , aut falsitatem amplectendam cogit. Si
falsa nobis persuadet ; Deus tanquam erroris au-
ctor traducendus est ; quippe ejusmodi nobis na-
turam indidit , ut evidenter perceptis assentiamur.
Atqui id in divinam bonitatem cadere posse ne-
mo dixerit. Sin autem vera sunt , quae evidenter
percipimus ; ergo veri Criterium Evidentia est.

§. IV.

Confutatur Scepticismus.

HIs de veritatis Criterio constitutis , facile
est Scepticorum audaciam retundere , qui
in veritatis perniciem veluti conjurati eam pro-
fligare quammaxime connituntur , Fuerunt enim
olim ex Academia Philosophi , quibus & Pyrrho-
nici se adjunxerunt ; qui , ut inquit Tullius (a) ,
nihil cognosci , nihil percipi , nihil sciri posse dixe-

O 3

runt.

(a) *Lib. I. Academ. cap. XII.*

runt: angustos sensus, imbecillos animos, brevia curricula vitae, & in profundo veritatem esse demersam: opinionibus & institutis omnia teneri: nihil veritati relinqui: deinceps omnia tenebris circumfusa esse dixerunt.

Hi propterea Sceptici nuncupati, quod res duntaxat *σύντοτοι* considerant, nihil decernentes: Acataleptici, quod omne *ἀκατάληπτον*, nihil nimirum comprehendendi posse dixerunt: Ephectici *παρὰ τὴν ἐπίχραν*, quippe iudicium, de omnibus cohibebant: Aporetici tandem, quasi dicas haesitatores, ut qui de omnibus rebus dubitabant.

Scepticorum autem vestigiis nuper institerunt Auctor libri *de Imbecillitate Mentis humanae*, quem Episcopo Abrincensi Petro Danieli Huetio ab aliquo Pyrrhonista falso attributum fuisse suspicatur Cl. Muratorius (a): & praeter ceteros Petrus Bayle, qui Scepticorum speciosiora argumenta collegit, exornavitque in *Diction. Historico-Critico*.

Horum igitur argumenta, five potius delirantium somnia convellere instituti ratio suadet. Univerfa quidem ipsorum argumenta, quibus tot veluti machinis veritatem demoliri aggressi sunt, eo respiciunt, ut 1. nullum esse veritatis Criterium, 2. Evidentiam falsitati obnoxiam esse, 3. tandem nihil prorsus cognosci posse ostendant.

Age igitur in scenam Sceptici producantur. Hi quidem ita I. veritatis Criterium adoriuntur.

Ut vera a falsis internoscantur, aliquo criterio opus est. Ut autem huiusmodi criterium adipi-

sca-

(a) In Praef. lib. de Viribus Intell. Hum.

scamur, verum a falso criterio discernere oportet. Illud igitur prius quaerendum nobis est, num certos veritatis characteres criterium prae se ferat. Ergo criterii aliud criterium, atque hujus aliud praeterea, atque ita deinceps inveniatur oportet. Quo sane pacto nec veritas, nec veritatis criterium poterit comparari.

Resp. Negamus verum a falso criterio esse distinguendum. Neque enim illud ejusmodi est, ut nisi per longas ratiocinationes expiscari minime possimus. Verum ita nobis praesto est, ut attentam duntaxat Mentem postulet, quo illud assequamur. Id quidem unicuique inspicere datur, si ad constitutam veri regulam, Evidentiam scilicet oculos intendat. Haec enim per se ipsa ita nostrae Menti obversatur, ut nulla dubitatione aestuantes illam certam esse veritatis comitem agnoscamus. Ridemus igitur fallaces Scepticorum conclusiunculas non secus, atque risu exciperetur, qui ut lucem intueamur, alia nos luce indigere contenderet.

II. Urgent nos Sceptici. Esto inveniant tandem Philosophi veritatis criterium: quale istud erit? Ferme omnes in triplici Rationis, Sensuum, atque Auctoritatis Evidentia tuto sibi collocasse videntur. Atqui neque in Ratione, neque in Sensibus, neque in Auctoritate aliquod veritatis criterium statui potest. Ergo.

Non in hominum Auctoritate, ut a postremo exordiamur. Hanc enim repetimus vel a paucis, vel a multis, vel ab omnibus. At hujusmodi testimonium alicujus rei gestae veritatem persuadere nequit. Ergo.

1. Re enim vera difficile non est, ut non rara docent experimenta, paucos admodum deceptos esse sive sensuum fallacia, sive levibus conjecturis, sive tandem falsis adductos vulgi rumoribus.

2. Quod si paucis imponi potuit, potuit & pluribus. Non pauca suppeditat monumenta tum profana, tum Ecclesiastica historia, unde satis liquet plurima per longam aetatem tanquam vera habita fuisse, quae sero tandem Criticorum acies falsa esse apprehendit.

3. Quod vero ad consensum omnium spectat, qui rem aliquam gestam fuisse tradant: cum non omnes, sed pauci admodum, aut paullo plures rei gestae adfuerint; horum duntaxat ratio habenda est. Quis autem eos deceptos non fuisse plane sibi persuadeat?

His adde nullo pacto exploratum esse, quod quicumque rem aliquam narrant alios decipere noluerint: praesertim cum constet persaepe homines studium omnemque operam in aliis decipiendis collocasse, atque aniles fabellas pro veris historiis extrusisse.

Quae cum ita sint, humanae Auctoritatis testimonium infirmum prorsus esse ac suspectum colligunt Sceptici.

Respondeo haec omnia, quae tanto apparatu proferunt Sceptici, non modo puerilia esse & inepta, verum etiam falsa. Id primum ipsi advertant necessum est, non omne hominum testimonium tanti a nobis haberi, ut pro veritatis criterio adhibeatur: sed oportere, ut certos quosdam prae se ferat characteres, quibus legitimum

veritatis fundamentum esse possit.

Nimirum his potissimum dotibus historici exornati esse debent, tum ut ipsi, decepti non sint, tum vero ut alios decipere noluerint. Quae quidem si nobis constiterint; cur aliquis dubitationi locus esse possit, nullus video. At enim: hoc scilicet est, ajunt Sceptici, quare fidem hominum testimonio adjungendam esse negamus. Quî enim eos neque falli, neque fallere certo nobis constare poterit?

Atqui haec nobis explorata esse possunt. Et I. quod historicus deceptus non fuerit, inde colligere licet. 1. Si ea testetur, quae suis subiecta sensibus fuere. 2. Si ea referat, quae a suis popularibus, quos inter versatus est, visa, audita, percepta sunt. 3. Si ea quae narrat, sui vestigia & monumenta posteris animadvertenda reliquerint. 4. Si quae tradat, in publico hominum conspectu gesta sint, ita quidem ut eos omnes repugnantes offenderet, si res secus, atque evenerunt, recenseret. 5. Si ex publicis analibus, quae refert, exscripserit. 6. Si nullo partium studio abreptus ea perhibeat, quae ad ipsum non pertinent, ita ut illius animum minime commovere potuerint.

II. Quod autem decipere noluit, satis id constat. I. Cum ea narrat, in quibus si mentitus esset, publicas querelas & contumelias in se cepisset. 2. Cum neque sua, neque suorum interest in aliqua re mentiri. 3. Cum ea suo operi intermiscet, quae sui suorumque popularium decus offendunt. 4. Cum non dissentit ab aliis historicis, qui per eandem aetatem floruerunt.

5. Cum

5. Cum ea, quae scribit, non abhorrent a suae aetatis & patriae moribus, dictione, &c. 6. Cum loco, tempori, quo res evenisse narrantur, apte respondent.

His igitur de hominum auctoritate regulis constitutis, nugae sunt quae obijciunt Sceptici. Quamvis enim pauci sint, qui gestam rem aliquam nobis tradiderunt; dummodo tamen veri historici personam sustinere deprehendimus; fidem perinde illis adjungemus, ac si quae narrant nostris oculis usurpare contigisset.

Quod vero ajunt paucos aequae, ac plures decipi posse, falsum omnino est. Quippe magis acutum plures, quam pauci cernunt: atque opinionum commenta delet dies: veritatem vero magis magisque confirmat. Neque ad rem faciunt exempla, quae a veteri historia arcessunt. Nam id certe diffiteri non audent Sceptici, rei nimirum falsitatem a Criticis deprehensam fuisse. In quo quidem vineta caedunt sua. Cum enim rei alicujus falsitatem Criticos affecutos esse ajunt, licet inviti fatentur regulas nobis suppetere, quae aliorum testimonia perpendere, & verum a falso secernere possimus.

Quod tandem ad consensum omnium spectat, inepte garriunt Sceptici. Cum enim non pauci, sed plures, immo omnes, quotquot litteris res gestas consignarunt, rem eandem, cujus omnes testes sunt, constanti & unanimi consensione recenseant: fieri nequaquam potest, ut universi veluti ex condicto in errorem conjuraverint: Neque obtudant Sceptici variis homines distrahi cupiditatibus; quippe id majorem nobis ingerit
fi.

fiduciam. Quid enim, ut ante innuimus, nisi ipsa rei veritas diversos hominum animos in idem conspirare adegisset?

At instant Sceptici. Ii omnes, quorum testimonium tanquam veritatis criterium suscipitur, jam supremum diem obierunt, testari igitur nequeunt. Quis enim vita defunctos testes produceret?

Respondeo defunctorum hominum testimonium potiori jure fidem mereri, quam si inter vivos versarentur. Quippe, dummodo integritatis fama superstes fuerit, certi sumus eos sese non revocasse. His adde, quod quae ipsi tradiderunt, verba non sunt demissa per aures, quae illico transeunt; sed oculis subjecta fidelibus manent communi consensione probata. Ceterum cum in comperto sit, genuina esse scripta, quae posteris transmiserunt; cum ea legimus, perinde prorsus est, ac si praesentes audiamus.

Quae adversus divinam Auctoritatem objiciunt Sceptici, ne in alienam messem falcem injiciamus Theologis discutienda relinquimus.

III. Pergunt porro Sceptici, ut quammaxime elevent sensuum testimonium.

Et I. ajunt. Sensuum testimonium verum esse inde probatur, quod tanquam falsus Deus esset traducendus, qui corporum, quae nusquam sunt, nobis ideas ingereret. Atqui id omne infirmum est, & nimis probat. Ergo. A primis enim Mundi incunabulis ad nostram usque aetatem universi homines in ea fuerunt opinione, ut colores, odores, sapes rebus ipsis inesse existimarent. Id autem falsum esse politiores Philosophi docent.

Quod

dolere, similem vero dolorem experiri aliquem, cui manus abscissa jamdiu fuerat: si haec aliaque accurate perpendam, nae ego is non sum, ut eandem, quae a me percipiuntur, in corporibus qualitates inesse pronuntiem. At quo attentius corpora inspicio, eorumque ad meos sensus ap-
 pullus considero; eo difficilius est mihi persuade-
 re, ut corpora reapse non existant, atque ea non sint, nisi aliqua Mentis meae perceptio.

Quamobrem fallaciae hotam vitare atque effu-
 gere Deus non posset, si universa Mundi com-
 pago reapse nulla esset: licet homines non deci-
 piat, quod hujusmodi nobis attribuerit sensus,
 quibus qualitates, quae corporibus non inhaerent,
 veluti ipsis inesse experiamur. Ita enim me com-
 paratum esse sentio, ut quemadmodum non pos-
 sum, quin corpora *sapida*, *colorata*, &c. mihi
 videri adferam, ita negare possim aliquid meae
 sensationis simile corporibus adhaerere. Verum
 mihi temperare non possum, quin pro explorato
 habeam reapse corpora esse; quorum ictus in
 proprium corpus excipiens certis quibusdam co-
 gitationibus occupari persentisco. Jure igitur Deo
 fallacia adscribenda esset, si circa corporum ex-
 sistentiam falleremur.

2. Objiciunt Sceptici. Plura sunt, in quibus
 sensus nos decipiunt. Sensuum igitur testimonium
 fallax est.

Resp. Libenter concedimus sensuum testimo-
 nio interdum nos decipi, si singuli seorsum ac-
 cipiantur, ac rationis ductu destituantur; quippe
 remus in aqua fractus apparet; turris, quae pro-
 pe quadrata surgit, attritis procul angulis rotunda

cernitur ; navi infidenti littus urbesque recedere videntur, &c. Verum negamus sensus semper nos fallere, aut falsa esse, quae ope sensuum constantissime omnes homines percipiunt.

Nonnulla igitur advertenda sunt, ne errandi occasionem nobis praebeant sensus. Et 1. curandum, ne sensus aliquo vitio laborent, sed integri atque incorrupti sint. Quare in subsidium etiam adsciscantur instrumenta, quibus eorum imbecillitas adjuvetur.

2. Intervallum inter corpora objecta & sensuum organa ipsorum potentiae sit contentaneum. Haec duo prosequitur Tullius (a). *Meo iudicio ita est maxima in sensibus veritas, si & sani sunt & valentes, & omnia removentur, quae obstant & impediunt. Itaque & lumen mutari saepe volumus, & situs earum rerum, quas intuemur, & intervalla aut contrahimus aut diducimus: multaque facimus usque eo, dum aspectus ipse fidem faciat sui iudicii.*

3. In rerum examine, si fieri poterit, plures sensus adhibeantur; ut omnis erroris suspicio auferatur.

4. Quod si plures sensus testes appellare non liceat, quia nimirum corporum qualitates sunt, quae unico sensu percipiuntur: eas sensu illo, quo hauriuntur, iterum ac tertio experiamur.

5. Tandem cavendum est, ne in iis, quae sensibus percipimus, praepropere judicemus. Omnium enim errorum origo non proficiscitur, nisi ex praecipiti Mentis consilio, quae sensibus regendis

(a) *Academ. Qu. Lib. IV. cap. VII.*

dis minime intenta perverse de rebus judicat.

Ajunt 3. Sceptici erroris causam non ex regulis, quas negligimus, sed e sensibus esse repetendam, quippe qui omnino nos fallere debent. Nam veras corporum proprietates sensibus assequi non licet. Ita Ex. gr. cum oculi, veluti lentes opticae, alii aliis magis minusve convexi sint; quo majorem vel minorem convexitatem habent, eo majores vel minores exhibent rerum externarum imagines. Vera igitur rerum magnitudo oculis percipi nequit.

Respondeo neminem inficiari *physicam* & *absolutam* corporum magnitudinem, gravitatem, duritiem &c. nobis esse incognitam. Haec enim omnia *relative*, sive prout sensibus nostris apparent, cognoscimus. Verum inde neque ipsorum fallacia, neque inutilitas erui potest; quippe nihil hoc ab Auctore naturae fieri potuit aptius. Propterea enim nobis sensus attribuit, ut eorum opera quas cum nostro corpore externae *res relationes* habent, assequeremur: satis igitur est, ut tranquillam vitam agamus, si prout nobis apta, aut contraria esse sentimus, corpora cognoscamus.

IV. Rationis sive Metaphysicam Evidentiam ita impugnant Sceptici. Si Evidentia norma esset, qua vera a falsis discernentur, nunquam ea duce in gravissimos errores laberemur. Atqui per saepe non paucos hujusmodi Criterio innixos errare videmus. Immerito igitur Evidentiae veri Criterium adscribitur.

Respondeo, immane interesse discrimen inter veri nominis Evidentiam, & falsam sive *putatam*, ut ajunt. Qui enim manifestos errores tuentur,

at-

atque ab Evidentia se duci clamant; hi quidem evidenter res percipere videntur: licet reipsa nulla adsit Evidentia. Facile porro est veram a falsa Evidentia distinguere; quippe haec ita Mentem afficit, ut ipsa assensum cohibere possit: illa vero Mentem cogit, & licet invitam ad assensionem impellit. Certus igitur Evidentiae character est *invincibilitas*, seu *resistendi impotentia*.

Haec autem resistendi impotentia *physica* & *antecedens*, non vero *moralis* & *consequens* sit oportet. Sunt enim nonnulli, quibus adeo brevis Mens est, ratio tam imbecillis, ita depravati affectus, atque animus praepredicis imbutus, ut si quae ipsis vel modica luce perfusa, & levi momento munita obijciantur, consequenti & morali necessitate ad ipsis assentiendum abripiantur. Quod sane mirum non est: quippe quemadmodum infirmos oculos vel tenue lumen perstringit; ita his hominibus quae vix verisimilia sunt, invincibilia videntur.

Verum quivis intelligit resistendi impotentiam, quae hujusmodi originem habet, non esse nisi moralem & voluntariam. Quamobrem si in id sedulo incumbimus, ut judicandi libertatem augere studeamus, assensum usque sustinentes, donec nullo abrepti studio accurate, atque ad communem optimorum sensum res expendamus: tum demum nullo pacto fieri poterit, ut falsa Evidentiae imagine decipiamur.

V. Tandem Acataleptici impetum dant, ac nihil evidens, nihil certum esse, sed omnia ignorantiae tenebris sepulta jacere alte inclamant. Et

1. recentiores Pyrrhonistae Cartesii auctoritate

ab-

abusi ita nos laceffunt . Nemo unus negaverit , omnia fore incerta , fi nobis minime conftet , utrum femper fallamur , necne . Atqui hoc latet adhuc . In tenebris igitur toti verfamur . Et fane *infixa quaedam eft Menti meae vetus opinio, Deum efle , qui poteft omnia unde autem fcio illum non feciffe . . . ut fallax , quoties duo & tria fimul addo , vel numero quadrati latera , vel fi quid aliud facilius fingi poteft ?* Cartefii verba funt (a) . Nullo igitur pacto in rebus ipsis , quas evidentiffimas efle ducimus , minime nos decipi conftare poterit .

Refpondeo eam ipfam , quae animis noftris Dei fumme potentis inſedit opinio , & illud fuadere , quod in iis , quae evidenter percipimus , non decipiamur . Nemo eft qui negaverit falſi nullam efle ſcientiam & cognitionem ; quippe falſum quod neque eft , neque *τὴν ἀπὸ τοῦ οὐκ ὄντος* rationem complecti poteft . Is igitur peculiaris eft falſitatis character , ut eorum , quae falſa funt , quae nimirum nulla funt & nuſquam , claras & perſpicuas ſibi fingere notiones Mens nequeat . Et fane quotuſquique erit , qui cum teneat , quid pars ac totum ſit , quidve cauſſa atque effectus , partem toto majorem efle , effectum ſuam antecedere cauſſam evidenter percipiat ? Contra veritas ſibi conſtat , atque immutabilis eſt . Neque enim fieri poteſt , ut res eadem modo vera ſit , modo rurfus falſa . Ipla igitur infinita ſupremi Numinis potentia rerum veritatem arbitrato ſuo fingere , ac mutare nequit . Quamobrem fieri

Tom. I.

P

non

(a) *Medit. I.*

non potest, ut perspicuis atque evidentibus falsi notionibus animos nostros Deus informaverit.

Atque hinc est, quod licet haec animo inhaereat opinio, Deum scilicet suo cuncta decernere arbitrio; certus tamen sum, in iis, quae mihi evidentia obversantur, decipi non posse. Nam a divina potentia abhorret, ut falsa mihi persuadeat, quorum perspicuas atque evidentes notiones Mente complector.

Quae cum ita sint: non immerito viri docti Cartesium castigare videntur, quod nihil esse omnino certum docuerit, nisi antea Deum esse bonum & benignum in explorato habeatur. Quod enim forte Cartesius non advertit, haec ipsa sententia omnem prorsus nobis aditum intercludit, ut ad Dei summe boni cognitionem perveniamus. Nam ita ipse (a) Deum existere, atque ab omni fallendi voluntate alienum esse a nobis deprehendi docet: Me existentem cognosco; Deus igitur, qui me condidit, sit oportet. Rursus insitam in me Dei notionem esse percipio, quam ipsum omnino Deum auctorem habere potuisse cognosco. Quidquid igitur in ea clare ac evidenter cognosco, verum sit oportet. Atqui ex ea notione omnem fraudem ac deceptionem a Deo abesse deprehendo. Ergo Deum non esse fallacem comperio. Verum unde quaeso sciam, notionem illam Dei, tamen evidentiissima mihi videtur, fallacem non esse & commentitiam? Legite Cudworthum (b) atque ibi Moshemium.

Ob-

(a) *Medit. III.*

(b) *Syst. Intellect. Cap. I. Sect. I. §. 94.*

Obijciunt 2. Nihil certi perciperemus, si cognoscere non liceret, num subjecto attributum aliquod conveniat, aut repugnet. Atqui... Ergo. Prob. Minor. Ut aliquid de re quapiam enunciemus, illius essentiam cognitam habeamus oportet. Essentia autem rerum omnium incomperta est. Ergo. His adde quod acque nobis lateant naturae vires, ac plerique ipsius effectus. Neque igitur quid valere, neque quid efficere possit natura, nobis tuto adferere licet.

Respondeo falsum esse, quod ut attributum alicui subjecto adscribendum, aut abjudicandum esse sciamus, omnino oporteat, ut comperta nobis sit illius essentia. Quoties enim rei proprietates aliquas perspectas habemus, profecto nosse poterimus, num attributum aliquod ipsi rei conveniat, nec ne. Nam quemadmodum attributum cum aliqua rei proprietate pugnare aut componi posse deprehendimus: ita inde colligimus attributum illud rei convenire, aut repugnare. Sic quoniam in explorato nobis est Mentem cogitare, & materiam extensam esse: ex eo efficimus materiam cogitare non posse, quod cogitationem extensioni repugnare aperte perspicimus. Fieri quippe nequit, ut res eadem proprietates, quae secum pugnant, complectatur.

Quod vero incompertae sint naturae vires: fatemur quidem, ignotum nobis esse, quousque sese illae extendant; at quo ultra prodire nequeant aperte constat. Naturae autem effectus, qui ad nostram utilitatem minime conferunt, latere libenter damus; quippe cui bono horum effectuum scientia? At eos, qui ad usus, & vitae commo-

ditates quam maxime conducunt, fere omnes nobis compertos esse solus amens negaverit.

3. Tandem ajunt Acataleptici. Si quid certum esset, aut comprehendi posset, nulla esset inter homines de aliqua re dissensio. Atqui universa Philosophorum natio in contraria omnia scinditur; quod enim alius ait, negat alius: quod alius certum sibi esse profitetur, hoc alius certum sibi esse inficiatur. Penes quem igitur veritas stabit?

Ad haec innumera sunt, quae adhuc natura in profundo abstrusa coërcet: ita ut vix, aut ne vix quidem supersint, quae se scire jactitant Philosophi, licet ea nullo pacto assequantur. Nihil igitur certum, nihil quod comprehendi possit.

Resp. Pueriliter quidem faciunt Acataleptici. In iis enim, quae clare, atque evidenter percipiuntur, ad unum omnes unanimi consensione conspirant. Philosophorum vero controversiae rerum veritatem non respiciunt, sed in eo versantur, ut earundem causas inquirent.

At enim multa sunt, quae latent adhuc: non diffitemur, dummodo & ipsi fateantur, multo plura esse, quae nobis comperta sunt. Quin imo si hoc *latere* ajunt, quod est non *adaequate* res cognoscere, ne tam alte inclament: ignorantiam ingenue fatemur. Neque enim eam Menti humanae perspicientiam vindicamus, ut intimas rerum essentias persequere, aperire, ac dividere possit, atque adaequate omnia noscere.

Verum quod nihil certi percipi possit, hoc scilicet est, in quo Acatalepticos insanire sollemniamus. Longum enim esset ea omnia

re-

recensere, quae tam certo scimus, ut de iis vel minimum dubitare non liceat. Verum Acatalepticos sciscitari liceat, num cum ipsi nihil comprehendi posse aiunt, id ipsum comprehendant, nec ne. Si percipere ajunt; est igitur quod percipi potest; temere igitur nihil comprehendi posse pronuntiant. Sin autem ne hoc quidem excipiunt, qua igitur audacia quidquam esse negant, quod percipiatur, cum hoc ipsum minime percipiant?

§. V.

De prima Veritate cognita.

QUaerunt Philosophi, quaenam inter veritates, quas cognoscimus, prima omnium nostrae Menti occurrat: atque in ea statuenda in diversa omnia abeunt. Sunt qui Aristoteli adhaerentes Contradictionis Principium, de quo superius verba fecimus, primum nobis innotescere contendunt. Cartesius vero axioma illud *Cogito, ergo sum*; primum nobis sese offerre voluit. Aliis placuit hoc, *Quidquid est, est*, aliis autem illud, *Quodlibet est, vel non est*.

Quid in tanta opinionum varietate? Nempe illud antea definiendum puto, unde humana cognitio exordiumumat, quae scilicet prius Mens percipiat, singularia ne, an vero universalia; tum etiam qua cognitione circa ea primum versetur. His enim expensis facile est, ut veritatem, quae prima ad intuendum nobis proponitur, deprehendamus.

PROPOSITIO I. *Mens singularia prius cognoscit.*

Prob. I. Omnis nostra cognitio e. Sensu tum

intimo, tum externo originem ducit. Quae autem duplici huic Sensui subjiciuntur, singularia sunt. Singularia igitur prima omnium Menti cognoscenda obversantur. Major demonstrabitur, cum in Psychologia de Idearum origine differemus.

II. In ea primum Mentis oculos intendimus, quae nos afficiunt. Quibus autem afficimur, reapse existant oportet; quod enim nusquam est, affectionem aliquam sive animae, sive corpori inducere nequit. Sed universalia non existunt, quippe quae sunt *Entia rationis*, ut Scholae ajunt. Igitur singularia prius, quam illa cognoscuntur.

III. Ea primum cognosci nequeunt, quae ex aliorum cognitione proficiuntur. Sed universalium cognitio enascitur e particularibus: ut ex iis, quae in Logicis de Mentis abstractione diximus, aperte patet. Haud igitur universalia, sed singularia priora cognoscuntur.

PROPOSITIO II. *Per characteres communes res prius cognoscuntur.*

Prob. I. Ii characteres primum nobis in quolibet re affulgent, qui majore, quam ceteri, luce veluti Mentis oculos feriunt. Atqui hujusmodi sunt notae, quas singulae quaeque res cum aliis communes habent. Mens igitur prius per characteres communes, quam peculiare objectas res intuetur.

Porro id nemo in dubium revocaverit, qui r. Mentis nostrae imbecillitatem secum reputet. Non enim tam acris est ipsius acies, ut statim, ac rem quampiam intuetur, privatas omnes notas, quae illa a ceteris discriminatur, deprehendere possit.

2. Qui illud attendat, quod res perinde a nobis cognoscuntur, atque nos afficiunt. Objecta autem tum Mentis oculis obversantur, tum in corporis sensus ita incurrunt, ut antea proprietates communiores, quam peculiare exhibeant. Hinc igitur fit, ut qualitates in rebus objectis, quae ipsas minus definiunt, quam quae magis determinant, prius cognoscamus.

Et re quidem vera cum quidpiam eminus apparet, prius deprehenditur illud corpus esse, quam animal: prius animal, quam homo: prius tandem homo, quam quivis certus homo. Nimirum primae rerum cognitiones obscurae sunt.

Facile autem est haec cernere in primis puerorum aetatulis. Eos enim nisi communiores rerum notas perspectas non habere vel illud argumento est, quod singulos quosque obvios patris, aut matris nomine salutant; quippe prius hominem a non homine, quam hunc aut illum ab alio distinguant.

• II. Cum quidpiam primum cognoscit intellectus, a potentia, ut ajunt, transit ad actum. Is autem est ordo, cum aliquid a potentia ad actum procedit, ut antea ad imperfectum, quam ad perfectum actum perveniat. Atqui Intellectus completus actus est, cum distincte ac determinate rem deprehendit: imperfectus vero, cum eam obscure cognoscit. Prius igitur obscure, h. e. per characteres communes, qui minus rem definiunt, quam per proprietates peculiare magis rem determinantes ab intellectu res cognoscuntur. Legendus in hanc rem D. Thomas (a).

PROPOSITIO III. *Se ipsam existere Mens primum cognoscit.*

Prob. I. Illud primum omnium cognoscimus, quod magis nobis intime adhaeret. Sed nihil Menti magis intimum est, quam ipsa sibi Mens sit. Antequam igitur alia Mens cognoscat, seipsam viventem, atque existentem novit.

II. Quenadmodum oculis ea primum perlustramus, quæ nobis præsentia sunt: ita quæ Menti præsentia obversantur, ea prius Mens intuetur. Seipsam igitur, qua nihil est præsentius, intrinsecus Mens videt. *Quid enim tam cognitioni adest, quam id, quod Menti adest? aut quid tam Menti adest, quam ipsa Mens?* ut Augustini verbis utar (a).

III. Illa inter alias cognitiones principem sibi locum vindicare dicenda est, a qua ceteræ quæcunque cognitiones dependent. Atqui quod alias veritates percipiat, sibi Mens persuadere non posset, nisi prius seipsam existere agnosceret. Prius igitur, quam alio Mens oculos intendat, hanc veritatem percipit, quod ipsa existat.

At enim si quod Mens primum cognoscit, est sui ipsius existentia: hoc erit primum cognitionis principium. Cur igitur Contradictionis principio principem locum vindicavimus?

Verum si primi principii nomine intelligas, quod primum Menti occurrat, cognitio propriae existentiae primas obtinebit. At si veniat illud, unde nostrarum cognitionum veritas proficiscitur, Contradictionis principio primas partes esse ad-

(a) *Lib. X. de Trin. cap. VII.*

adscribendas superius proposita argumenta suadent. Ceterum Mens cum seipsam novit, per communem existentiae characterem se novit. Quare quemadmodum ita se existere sentit, ut simul se non existere sibi persuadere nequeat: ita fieri non posse, ut quodcunque existit, simul non existat, aperte apprehendit.

C A P U T II.

De Ente, ejusque Formis.

Q UOD Graecis Philosophis *ὄν*, Latinis jam tum a Quintiliani *ens* appellatur, vox simplex est ac *simplicissima*, quae per alias definiri voces haud potest. *Ens quod est*; huic *Nihil* opponitur, *quod nimirum non est*. Prima positiva notio est, altera negativa; quippe negat quod est. Hinc notio *Nihili directe* negationem, *indirecte* *Ens*, quod negat, completitur. Vulgo tamen ajunt, Nihilo nullam respondere notionem, Nihili nulla esse praedicata: quia scilicet notionem & praedicata, quae affirmat, minime continet aut exprimit: verum quae negat, indirecte notat.

Cum *Ens* generatim accipitur, omnia sane *transcendit*, ut Scholae loquuntur, *ὁ πᾶσι ὑπερβαίνων*, per omnes nimirum res vagatur, eadem ratione, qua *Nihil*. Cum vero particulatim, ad ea, de quibus sermo est, contrahitur.

Ens generatim acceptum vel ad *Essentiam*,
vel

vel ad *Existentiam* exprimendam refertur : nimirum in *Ente* duo primum considerata sese nobis offerunt, id quod aptum est, ut sit, quod *Essentiam* dicimus, atque ipse *esse* *effendi* actus, quam *Existentiam* nuncupamus. Quoniam autem *effendi*, atque *exsistendi* ratio varie considerari potest; hinc 1. *Ens* dividitur in *Reale*, aut *Rationis*. 2. *Possibile*, aut *Impossibile* : 3. *Necessarium*, aut *Contingens* : 4. *Substantiam*, vel *Accidens*.

§. I.

De Essentia atque Exsistentia.

I. **E**ssentia definitur *id per quod res est id, quod est*. Multiplex distinguitur, alia *Physica*, alia *Logica*, alia *Metaphysica*.

Prima est id, per quod *Ens* intrinsecus tale, ac est, constituitur, non aliud. Itaque completitur proprietates omnes, quae certum quoddam *Ens* constituunt ac determinant.

Alterā est id, per quod *Ens* a nobis *Mente* concipitur tale, & non aliud. Comprehendit igitur non omnia, sed ea tantum attributa, quae a nobis in *Ente* cognoscuntur.

Tertia tandem est id, quod primum in *Ente* concipitur, attributum scilicet illud, quod in *Ente* primum est, & a quo reliqua deinceps, quae illius sunt propria, derivantur.

Ex hac porro triplici *Essentiae* notione colligendum est, nos cum incompetas esse rerum essentias dicimus, *reales* sive *physicas*, non vero

nominales essentias intelligere. Quamvis enim rerum omnes omnino proprietates perspectas non habemus : pleraque tamen earum attributa satis adsequimur . Quae igitur inter rei proprietates ejusmodi est , ut ceteras omnes quasi radix & fundamentum quodammodo complectatur ; hanc , cum alia non suppetit , Essentiam nominamus .

Jam vero rerum Essentiae dupliciter inspicere possunt , vel prout in Mente Dei continentur , vel prout extra Deum existunt . Illae quippe sunt *ἀρχαὶ*, *primigeniae* scilicet Entis *imagines* Intellectui Divino praesentes , aeternae sunt atque immutabiles : hae vero , cum sint eductae res extra sui nihilum , atque extra suas causas jam constitutae , mutationi subjiciuntur .

Cave autem tibi persuadeas *intelligibiles* rerum essentias in Divina Mente sic existisse , quasi creatae res ab aeterno habuerint nescio quam *ἀόρατον* *entitatem*, ut quibusdam visum est, quam *Ens diminutum* appellant . Neque existimes eas fuisse veluti substantias quasdam incorporeas ab ipso Deo sejunctas & separatas ; quam sententiam Platoni nonnullos adscribere in Synopsi Histor. animadvertimus . Etenim rerum omnium essentiae *objective* atque *eminenter*, ut ajunt, in Deo sunt, quatenus Divino Intellectui obversantur, atque infinita sua virtute iis omnibus Deus aequivalet .

II. Existentiam vulgo definiunt *id per quod aliquid revera existit, atque est extra suas causas* . Duplex autem distingui solet, *possibilis*, & *actualis* . Prima est, cum Ens , quod propterea dicitur *δυνάμει*, seu *potentia*, sufficientem existentiae suae rationem in alio Ente habet . Altera

vero, cum Ens *ἰσχυρίζεσθαι* actu est extra sui causam.

Ratio porro existendi non una est. Ens enim aut existit *per essentiam* sive *a se*; aut non item, sive *ab alio*. Per essentiam existere dicitur, quod ita existit, ut ipsa sua essentia sit ratio, cur existat. Quod unius Dei proprium est. Contra Ens ab alio, seu, quod per suam essentiam non existit, est quod in sua essentia rationem, quare existit, minime complectitur; cujusmodi sunt res omnes creatae.

§. II.

De Ente Rationis & Reali.

ENS *Rationis*, seu *intelligibile* vocatur illud, quod a ratione, h. e. Mente pendet, ut existat: sive reapse ab ea efficitur, ut universi nostrae Mentis actus: sive in Mente tanquam in subjecto inhaeret, veluti omnes ipsius affectiones: sive tandem ut Ens a Mente concipitur, licet reapse, non existat; cujusmodi sunt ideae omnes factitiae, abstractae, universales &c.

Contra Ens *Reale* est illud, quod non modo *ὡς εἶναι νοούμενον*, esse nimirum *intelligibile* habet, verum etiam *θεωρεῖν positivum*: sive actu sit, iive saltem esse possit.

§. III.

De Ente Possibili & Impossibili.

Possibile dicitur quidquid non est, sed esse potest. Possibilium duo statuuntur genera. Alia enim dicimus *intrinsecus* & *absolute*, alia vero *extrinsecus* & *relative* esseabilia.

Primo sensu possibile dicitur id omne, quod nullam contradictionem complectitur: veluti *figura chiliogona*, *alter Mundus* &c. absolute possibilia sunt, quippe non repugnant.

Altero vero sensu possibile vocatur, si referatur ad causas, a quibus effici potest. Cum autem duplex sit causa, unde aliquid, quod non est, esse potest, *φύσικη* una sive *naturalis*, *ὑπερφύσικη* sive *supernaturalis* altera; ideo aliud est *naturaliter*, aliud *supernaturaliter* possibile. Hoc quod naturae vires prorsus excedens sola Dei virtute esse potest: illud autem quod naturae viribus effici potest.

Possibili adversatur Impossibile, quod nimirum existere nequit; ejusque totidem sunt species, quot Possibilis enumeravimus. Intrinsecus enim impossibile est, quod repugnat, seu contradictionem complectitur, veluti *Circulus quadratus*, *Mons sine valle*, &c. Extrinsecus vero impossibile, quod neque a Deo, neque a naturali causa fieri potest.

Praeterea dicitur impossibile *moraliter*, quod intrinsecus quidem possibile est, attenta tamen hominum indole nunquam usuvenit; veluti ho-

mi-

minem sui compotem mortem sibi consciscere.

Illud vero hic animadvertendum est, *absolute* impossibilia esse etiam *relative* impossibilia, ita sane, ut ne Divinae quidem potentiae subjiciantur. Divinae enim potentiae ratio essentiae Dei innititur. Atqui Deus omnes per singulas rerum species dispersas ~~et~~ *divas essendi* rationes completitur. Quidquid igitur Entis rationem habere potest Dei essentia comprehendit. Quod autem *intrinsecus* est impossibile rationi Entis opponitur; est enim non Ens, nihil. Id igitur Divinae potentiae non subjicitur: propterea quod potius illud fieri nequit, quam quod Deus facere non potest. Ita D. Thomas; quem consule (a).

§. IV.

De Ente Necessario, & Contingente.

Necessarium definitur *id, cujus oppositum est impossibile*: h. e. quod non potest non esse. Multiplex distingui solet, *necessarium existentiae*, & *necessarium essentiae*: *necessarium ad existentiam*, & *necessarium ad essentiam*.

Necessarium existentiae est, quod a seipso est, nullamque existentiae suae causam habet. Necessarium autem essentiae, quod essentiam habet immutabilem; cujusmodi est solus Deus.

Necessarium ad existentiam vocatur id, sine quo aliud existere nequit. Necessarium vero ad essentiam id, sine quo rei essentia consistere nequit,

(a) I. P. Qu. XXV. Art. 3. & 4.

quit, seu illud omne, quod nunquam sine essentiae jactura a re divelli potest. Ita necessarium est, quod duo trianguli latera tertio majora sint utcunque sumta; id enim nequit a triangulo divelli, quin illius essentia pereat.

Haec autem ejusmodi necessaria sunt, ut contrarium *absolute* sit impossibile. At vero est aliud necessarium, cujus oppositum *hypothetice* duntaxat, aut *moraliter* est impossibile. Quod propterea necessarium *hypotheticum*, aut *morale* appellatur.

Porro Ens contingens dicitur, quod ita est, ut possit non esse: vel quod ita non est, ut possit esse; cujusmodi sunt res omnes creatae, & possibiles, quae ut sint, nec ne, extrinsecus pendent a causa agente.

Jam vero ex traditis Necessarii & Contingentis notionibus efficitur, 1. ut Ens necessarium sit *immutabile*. Omnis enim mutatio in causa est, cur aliquid non sit, quod antea erat. Atqui Ens necessarium ita est, ut nequeat non esse id omne, quod est. Nullam igitur subire potest mutationem.

2. Ut Ens necessarium sit *aeternum*. Aeternum est quod initium & finem excludit. Si autem Ens necessarium non esset aeternum, ita quidem esset, ut potuisset olim, vel posset aliquando amplius non esse. Ergo necessarium non esset.

3. Ut Ens necessarium sit *perfectissimum*. Si enim non esset ab omni parte perfectum, perfici posset; igitur mutabile; non igitur necessarium.

4. Ut Ens contingens sit mutabile, non aeternum, atque imperfectum. Illud enim est ab alio,

alio , atque ita est , ut possit non esse . Cum igitur existendi necessitatem non complectatur , natura sua in nihilum redire potest ; mutabile igitur . Deinde cum sit ab alio , ab eo pendet , tum ut primum , tum ut postea existat ; non igitur aeternum . Si non aeternum ; ergo imperfectum . Haec autem reciprocari clare patet : nimirum mutabile , non aeternum , imperfectum est contingens .

5. Contingentium series infinita est impossibilis . Nam quodlibet contingens ita est , ut possit non esse . Omnia igitur entia , unde series illa componitur , ita se haberent , ut non esse possent . Ipsa igitur series ita esset , ut posset non esse ; ab alio igitur penderet , ut esset . Si est ab alio , initium habet . Non igitur infinita .

6. Existunt contingentia . Omnia enim hujus rerum universitatis entia aut non sunt omnino perfecta , aut sunt composita & mutabilia . Ergo contingentia .

7. Existit Ens necessarium . Existunt contingentia . Atqui repugnat series contingentium infinita , quae Ens necessarium excludat . Ergo .

§. V.

De Substantia & Accidente .

Substantiae vocabulo ea communiter subicitur notio , ut Ens significet , quod per se constat ; atque ut sit & conservetur , ab alio Ente , tanquam subjecto , cui inhaereat , non pendet .

Quae sane in Scholis usurpata definitio satis

exprimit Substantiam esse quodcunque propriam habet existentiam, seorsum existit, cujus tandem existentia non eadem est, atque cujuslibet rei existentia: ut fusius in Logicis Cap. I. §. V. ubi etiam de Accidentibus verba fecimus.

C A P U T III.

De Attributis Entis.

§. I.

De Unitate.

OMne Ens unum est, h. e. indivisum in se, atque ab aliis distinctum. Veluti si triangulum Mente revolvam, ita illud unicum deprehendam; ut servata eadem magnitudine in duo triangula secari nequeat.

Ens porro vel est *unum simplex*, vel *unum compositum*. Illud est, cujus nullae sunt partes inter se distinctae: hoc autem, quod ex aliqua partium compositione coalescit. Partes vero dicuntur, quae coagmentatae totum aliquod constituunt.

Cum igitur quales sunt partes, tale est totum inde conflatum; quatuor idcirco unius compositi genera vulgo distinguunt, *Physicum*, *Mathematicum*, *Metaphysicum*, & *Logicum*: pro diversa nimirum partium specie, quae Physicae, Mathematicae, Metaphysicae, vel Logicae esse possunt.

Partes Physicae vocantur, quae reapse inter se distinctae sunt, atque ad totius essentiam pertinent: veluti *Anima* & *humanum Corpus* in Homine.

Partes Mathematicae dicuntur, quae separari possunt, & ad totius integritatem spectant: cujusmodi sunt *manus*, *crura*, *pedes*, *ceteraque membra* in Homine.

Partes Metaphysicae sunt, quas in Ente quolibet inesse, veluti *Essentiam*, atque *Exsistentiam* Metaphysici considerant.

Logicae tandem partes sunt notiones quaedam Mentis, quas Logica spectat, quales sunt *Genus* & *Differentia*.

His quatuor Compositis adversatur Simplex, quod prout omnes, aut aliquas partes excludit, ita hoc, vel illo sensu Simplex vocatur. Ita Mens humana dicitur *Unum simplex*, quippe partibus Physicis & Mathematicis caret. Deus vero est, & dicitur *Simplex*, tum quia a Physica, & Mathematica, tum etiam quia a Metaphysica, & Logica compositione liber est.

Unitas praeterea dividitur in *Numericam*, & *Specificam*. Illa est cujusque singularis Entis, veluti *Caji*, & *Titii*, quorum uterque seorsum unus homo est. Haec vero est eorum Entium, quae ad eandem speciem attinent. Ita Essentia omnium Circulorum dicitur *una*; non quod sit unica numero in omnibus circulis essentia; esset enim unus in rerum universitate individuus circulus; sed quia omnes circuli eadem essentiali proprietate praediti sunt.

§. II.

De Individuo, Supposito, & Persona.

Individuum vocatur Ens singulare, quod nimirum in plura talia, quale ipsum est, dividi nequit. Distinguendum porro est id, quod *naturam individuum* vocamus, ab eo, quod *Individuum naturae* dicimus.

Naturae individuae nomine intelligitur res singularis, determinata. Individuum vero naturae est id, quod *Suppositum* & *Persona* a Philosophis nuncupatur. Suppositum enim non modo Ens singulare & a ceteris distinctum exprimit: verum etiam Substantiam significat, quae est *sui juris*, atque *integrum principium suarum omnium actionum atque affectionum*. Quod si haec substantia sit rationis particeps, proprio vocabulo *Persona* nuncupatur. Hinc illa Boëtiana Personae definitio: *Naturae rationalis individua substantia*.

Nova porro est Personae notio, quam invexit Lockius, & quam in *sui ipsius conscientia* constituit. Ita quidem ipse rem exponit. (a) Quodlibet Ens cogitans & rationis particeps, cui *Personae* vocabulum proprium est & peculiare, ita comparatum est, ut seipsum idem; quod per varia temporis & loci intervalla cogitaverit, intueri possit. Id autem ex eo proficiscitur, quod suarum omnium cogitationum atque actuum con-

Q 2

scium

(a) *Essai de l'Entendement Humain Liv. II. ch. XXVII. §. 9.*

scium illud est, ea quidem conscientia, quae certa comes singulas sequitur illius actiones. Hujusmodi porro conscientia est, qua singuli homines sibi ipsi iidem prorsus videntur, & qua ipsi ab alio quovis cogitante separantur. In ea igitur sita est quae dicitur *Personalis Identitas*.

Verum in eo peccat Lockius, quod in conscientia, per quam Persona suae identitatis certa est, Personam ipsam constituit. Propterea enim unicuique nostrum persuasum est, se eandem esse Personam, ac quae antea fuit, quod praeteritarum cogitationum eadem conscientia nobis conscii sumus, quam alicujus cogitationis in praesens habemus. At nemo non videt eas esse conscientiae partes, ut per ipsam unusquisque propriam identitatem assequatur: qua nimirum fit, ut quodlibet Ens rationis particeps se eandem esse personam cognoscat.

Quorsum igitur haec nova Personae definitio praeter communem omnium sententiam? Quivis sane potissimum e populo vehementer mirabitur, si toties in ipso mutatam fuisse personam, seu occidisse, atque iterum rediisse dicas, quoties praeteritae conditionis cepit illum oblivio, & oblitteratam memoriam ipse revocavit.

§. III.

De Identitate & Distinctione.

REs dicitur *eadem*, cum loco, aut tempore mutato ipsa nulli mutationi obnoxia perseverat. *Identitas* igitur est relatio Entis ad ipsum

ipsum non mutatum, quamvis locus, vel tempus commutetur. Nimirum cum Ens quodpiam consideramus, quod hoc horae momento, his loci intervallis existit; illud deinde ad illud ipsum referimus, si diversis loci, aut temporis intervallis existat.

Porro Identitatis notio non una est. 1. Etenim *idem* esse aeque valet, ac perseverare in existendo. Ita Mundum, in quo in praesens versamur, *eundem* esse dicimus, qui abhinc mille annos fuit.

2. Identitas nonnunquam eo sensu usurpatur, ut res *eadem* esse existimetur, si non modo existere perseverat, verum etiam nullam suae conditionis vicissitudinem subiit.

3. Idem aliquando *specie* est, non *numero*. Ita aquarum congeries, quae hodie hoc conclusae alveo fluunt, idem *specie* fluvius dicitur, ac quae sexcentis abhinc annis fluxerunt: at aqua fluminis *numero* eadem non est; quippe alia aliam semper supergenit.

Huc pertinet pervulgatum illud Axioma, *Quae sunt eadem uni tertio, sunt eadem inter se*: eadem nimirum in eo duntaxat, in quo cum tertio conveniunt. Hinc eadem definit Wolfius *quae sibi invicem substitui possunt salvo quocunque praedicato (a)*. Ita duo pondera eadem esse dicimus; si in locum alterutrius, quod cum alio aequilibrium servat, alterum incolumi aequilibrio substitui potest.

Identitati opponitur *Distinctio*, quae duplicis

Q 3

est

(a) *Ontolog.* §. 181.

est generis : altera τῶ πρᾶγματι sive *Realis*, κατ' ἐννοίαν sive *Rationis* altera.

Distinctio realis est, quae in re nemine cogitante reperitur. Ea igitur inter illa intercedit, quae reapse separata existunt, vel separari possunt. Ita Solem inter, & Lunam, Mentem, & Corpus hominis &c. realis datur distinctio.

Distinctio rationis est, quae a Mente excogitatur in iis, quae revera non sunt distincta. Est autem duplex, altera, quam vocant *rationis ratiocinatae*, altera *rationis ratiocinantis*.

Prima locum habet in una eademque re, quam ita Mens considerat, ut plura veluti distincta contempletur, vel ob illius perfectionem *eminenter* multiplicem, vel ob varios, quos praestat effectus, vel ob diversa munera, quae fungitur. Ita idem frumentum modo *fructum* vocamus, modo *semen*, ac rursus *alimentum*. Fructus enim rationem distinguimus, tanquam finem antecedentis agriculturae : seminis vero, tanquam futurae initium : alimenti porro, tanquam aptum ad incrementum comedentis corpori praestandum. Ita quoque in Sole distinguimus vim, qua calefacit, ab ea, qua corpora illustrat.

Hujusmodi autem distinctio licet sit duntaxat penes Intellectum, in re tamen, ut ajunt, *fundamentum habet*, rei scilicet ipsi innititur; quippe quae ejus est naturae, ut pluribus aequivalet, sive plures praestet effectus.

Distinctio vero Rationis Ratiocinantis sine aliquo fundamento, sed ex solo Mentis arbitrio fingitur, quae rem distinctis perceptionibus apprehendit, quamvis nulla idearum diversitas ex ipsa

ipsa re objecta erui possit . Veluti cum in una eademque re rationes *subjecti* & *praedicati* , *generis* & *differentiae* veluti diversa attributa distinguimus .

Hiscæ Distinctionum generibus aliam addunt nonnulli , quam *formalem* appellant ; eamque locum habere docent inter duas *formalitates* , essentialia scilicet rei attributa .

Nimirum ea est ipsorum opinio , ut in re quapiam sicut duplex *identitas* considerari potest, *realis* , cum unum attributum de altero affirmatur , & *formalis* , cum unius essentia constituitur per alterum : ita & duplex adsit distinctio duplici huic identitati opposita . Quamobrem ajunt in una eademque re simul componi identitatem *realem* , & distinctionem *formalem ex parte rei* ; quippe ex duobus ejusdem rei attributis unum de altero affirmari potest , cum tamen unum in suo esse non constituitur per alterum .

Hoc subtile Distinctionis genus , quod ea de caussa potissimum commenti sunt , ut ea , quae in augustissimo Trinitatis Mysterio contraria videntur , conciliarent , licet irritò conatu , in res Metaphysicas etiam invexerunt . Si hujusmodi tricas persequi vacaret , commentum hoc refutaremus . Verum id monuisse satis erit , eam ut omnino inutilem rejiciendam esse . Vel enim distinctio in re adest nemine cogitante , & ad Realem pertinet ; vel fit per Mentem , & ad Rationis distinctionem refertur . Nil medium est .

§. IV.

De Veritate, & Bonitate.

I. **V**eritas triplex distinguitur, *Logica*, *Moralis*, & *Metaphysica*. Veritas Logica respicit idearum nostrarum convenientiam cum rebus objectis, quas cogitamus. Nimirum verae sunt nostrae Mentis notiones, si cum rebus ipsis revera congruant.

Moralis vero sita est in convenientia signorum externorum cum notionibus animi: atque huic opponitur *Mendacium*.

Metaphysica tandem, quam etiam *Entitativam*, & *Naturalem* appellant, est convenientia rei cum suo exemplari. Nimirum quaelibet res dicitur *vera*, cum ideae Divinae respondet: talem scilicet naturam habet, qualis est illius essentia, quae Divinae Intelligentiae obversatur.

Veritatem hoc postremo sensu acceptam inspicunt Metaphysici, cum illam cuilibet Enti inesse ajunt. Quodlibet enim Ens, utpote summa Dei sapientia, ac potentia factum non potest cum suo exemplari non convenire, ideae scilicet Divinae non respondere. Verum igitur erit: h. e. iis omnibus proprietatibus exornatur, quibus praedita est primigenia illius imago Divino intellectui praesens.

II. Bonum definit Aristoteles (a) *id, quod omnia appetunt*. Haec autem boni definitio illius
na-

(a) *Ethicor. initio.*

naturam minime aperit. 1. Cur enim bonum aliquid sit, non haec affertur caussa, quod appetitur; quin etiam cur appetatur, caussa redditur, quod bonum est. 2. Substantiae cognitione praeditae bonum cognoscendo expetant necessum est; prior igitur est boni cognitio, quam ejus appetitus.

Quamobrem ceteris anteponenda videtur illorum sententia, qui duplicem bonitatem distinguunt, unam *absolutam*, alteram *relativam*. Illa sita est in *perfectiōe*: haec vero in *apto & convenienti*.

Perfectum porro dicitur id, cui nihil deest, quod in suo genere ipsius naturae conveniat, sive quod in suo genere expletum, & cumulatum est. Aptum vero, & conveniens vocatur, quod ad usum quemdam, ac fructum sive commodum refertur. Nova non est isthaec bonitatis notio. Tullius: (a) *Ego assentior Diogeni, qui bonum definierit id, quod esset natura absolutum. Id autem sequens illud etiam, quod prodesset.*

Ita cum Deus late vagetur in immenso Entis genere, ut Ens a se; quidquid est, quidquid esse potest, quidquid entis concipi potest, ei congruit, ei convenit; propterea ita est perfectissimus, ut ne cogitari quidem possit aliquid, quo ipse careat. Hinc igitur summe bonus est, per se & absolute, & bonitatis notionem omnem exhaurit. Relative etiam sibi Deus ipse bonus est. Si quidem reipsa se amat, & amat ideo, quia bonus est, h. e. sibi convenit, & ad fruendum

Q 5

dum

(a) *De Finib. Lib. III. cap. X.*

dum aptissimus, atque in se adquiescit uno: proinde in se uno beatissimus.

Ex hac porro absoluta Dei bonitate efflorescit & altera relativae bonitatis ratio, qua Deus ipse ad res creatas refertur. Illius enim bonitatem omnes participant; quippe quia ipse bonus est, res omnes sunt: & quia sunt, propterea bonae sunt. Itidem quia in se bonus est Deus, bonus & aliis creaturis intelligentibus est; cum enim in se uno beatissimus sit, idcirco & aliis *beatificus finis* erit.

Jam vero bonitas isthaec & absoluta & relativa Entibus contingentibus aliquo pacto communis est. 1. Ea enim perfecta dicuntur, quia iis omnibus proprietatibus, quae ad eorum essentiam constituendam necessariae sunt, exornantur. Absolute igitur bona sunt: quippe iis proprietatibus destitui nequeunt.

2. Res creatae relative bonae sunt: tum quia Deo congruunt, ac tales sunt, cujusmodi esse voluit, qui eas bonas condidit: tum vero quia ipsae invicem referuntur. Vel ipsa enim hujus universitatis corpora, vi attrahente illis indita, & vi impellente apte dispertita, ita inter se omnia connexa & juncta permanent, ut quodam quasi vinculo circumdato colligata videantur. Quod quidem Leibnitius & Wolfius prosecuti sunt, & ante ipsos Newtonus.

§. V.

De Duratione.

Duratio Entis dicitur ipsius *continuata existentia*, seu *existentiae continuatio*. Durationis autem duae sunt species, *Aeternitas*, & *Tempus*.

Aeternitatis nomen 1. interdum pro diuturno tempore accipitur. 2. Iis adscribitur, quae licet initium habuerint, nunquam tamen sunt interitura. 3. Tandem ita usurpatur, ut nullum neque initium, neque finem habeat. Qua sane sententia vulgo, atque hîc a nobis accipitur.

Aeternitas porro hoc sensu accepta, quae non modo cum notione Divinitatis implicata est, sed illius etiam est peculiaris & propria, definitur a Boëtio, (a) *interminabilis vitae tota simul, & perfecta possessio*. Atque his verbis triplex dos Aeternitatis aperitur, quod scilicet a nulla perfecta initio, successionem sive mutabilitatem, ac finem excludit.

Aeternitati Tempus opponitur, quod est duratio initio & fine conclusa, quae prioris & posterioris, praeteriti & futuri successionem habet.

In eo igitur Aeternitas a Tempore quam maxime discrepat: 1. quod illa propria sit Entis necessarii, hoc autem contingentis, & creati: 2. illa initii, ac finis expers, hoc utrique subjiatur: 3. hoc prioris & posterioris differentiis mensu-

(a) *Lib. V. de Cons. Prosa VI.*

furatur: illa vero tota simul est sine aliqua successione; quippe propria Entis, quod *interminabilis vitae plenitudinem totam pariter comprehendit, ac possidet, cui nec futuri quidquid absit, nec praeteriti fluxerit*: ut ait idem Boëtius (a).

Quaerunt hic Philosophi, num nulla prorsus successio, nulla momenta, atque intervalla sint in Aeternitate, quae in Tempore deprehendimus. In qua quidem controversia dirimenda magnis motibus, atque incredibili animorum contentione jamdiu elaboratum est.

Illud autem advertendum est, Successionem, quam ab Aeternitate abhorre alii ajunt, negant alii, ambiguitate laborare. Triplex enim Successionis vocabulo in re praesenti subesse potest notio. 1. Successio dicitur, quae partes post partes habet, variis scilicet intervallis mutuo sese excipientibus, atque inter se secretis distinguitur, quippe quae rei durantis vicissitudinibus innitur: eamque *Physicam* nuncupamus.

2. Successio vocari potest, quae licet partes excludat, nimirum in spatia, momenta, &c. non dividatur, tamen utcumque dividi potest: refertur enim ad rem quamvis immotam, non tamen immobilem, cujus existentiam utcumque dimetiri licet. Hanc vero *Metaphysicam* appellamus.

4. Tandem Successio vocari potest, quae licet reipsa nulla sit: attamen κατ' ἐπιστάτην ratione eam excogitamus. *Logicam* hanc dixeris.

Harum porro Successionum Logica quidem ad
nos

(a) *Loc. cit.*

nos duntaxat pertinet, neque ad Aeternitatem referri potest. Tanta enim non est nostrae Mentis facultas, ut cum Aeternitatem nobis repraesentare velimus, omni successionis notione animos nostros immunes reddere queamus. In quo quidem, ut scite Moshemius (a), idem facimus, quod illi solent, qui navigant. His quidem navi fugiente tellus recedere & abire videtur, cum tamen quiescat illa, nec moveatur. Ita prorsus cum nos ipsi per varia vicissitudinum intervalla ad calcem vitae festinemus, Aeternitatem ipsam nobiscum una labi nobis persuademus. De hujusmodi vero Successione nulla versari quaestio potest; quippe illa extrinsecus se habet ad Aeternitatem.

Sin autem Aeternitatem ut in se est inspiciamus, quatenus Dei immutabilis propria est, tum Physica, tum Metaphysica Successio ab illius notione prorsus est eliminanda. Quod enim ad Physicam attinet. 1. Quod infinitum est, id omni termino, atque origine caret, nihil concretum, nihil coagmentatum habet. Nullae igitur ibi partes, quae secerni, ac dividi possunt. Atqui Aeternitas non est, nisi infinita Duratio. Nullam igitur in se divisionem excipit, nullis distinguitur intervallis.

2. Ubi nulla mutatio, ibi nulla Successio; Quid enim successio, nisi quaedam mutationum series? Atqui Aeternitas Dei immutabilis duratio est. Physicam igitur Successionem respuit Aeternitas.

Me-

(a) *In Notis ad Cap. V. Sect. I. §. 25. Systema. Intellect.*

Metaphysica vero Successio ab Aeternitate etiam abhorret. Mensura enim refertur ad partes, quas discernere & metiri licet. Nullae autem ex ostensis in Aeternitate infunt partes. Aeternitatem igitur, seu ipsam continuatam aeterni Entis existentiam nullo pacto dimetiri licet. Atqui id Metaphysicae Successionis nomine vulgo accipimus. Ea igitur aliena est ab Aeternitatis natura.

§. VI.

De Finito & Infinito.

UT *Finiti*, atque *Infiniti* veram nobis notionem comparemus, duplicem liceat in huius vocabulis sententiam distinguere, *Grammaticam* unam, *Philosophicam* alteram. Illa ex vi verborum sensum aperit: haec vero illius rei naturam explicat; cuius verba illa sunt propria.

Finitum igitur atque Infinitum si *Grammaticè* spectentur, illud est, quod finibus circumscribitur, hoc vero quod iisdem caret: atque ita alterum affirmantem, negantem alterum notionem habet.

At si Philosophica vis, quae his nominibus subest, consideretur, Infinitum idem omnino est, ac *perfectissimum*: adeo ut finitum sit, quod a summa hac perfectione distat.

Nimirum haec Infiniti notio fluit ex natura Entis aeterni, quod necessario per se, & sine ulla causa existere, nemo in dubium revocare potest. Quod enim per se, & necessario existit, per-

perfectissimum sit oportet. Si qua enim perfectio ab illo abesset, aut si modus aliquis illius perfectionibus imponeretur: id profecto ab aliqua causa oriretur, quae illius perfectiones limitibus circumscripsisset. Non igitur per se, & necessario existeret.

Quamobrem Infinitum idem illud proprie est, quod necessario existit. Hoc autem cum non possit non esse perfectissimum; hinc *Infiniti* & *Perfectissimi* notiones sibi e regione respondent.

Ex his autem illud clare patet, quod Infinitum haud dubie sensum habet positivum: Finitum vero notione valet negativa. Nam 1. Infinitum idem est, quod absolutissimum: Finitum vero imperfectum. Atqui illud notione positiva praeditum est: hoc vero negativa. Quare qui finitum aliquid dicit, is illud infinitum esse negat.

2. Finitum constitutos limites transilire nequit: at Infinitum omnes perfectiones in se comprehendit. Negativum autem illud est, hoc vero positivum. Ergo.

3. Infinitum *τὸ ἀπὸ ἐξουσίας* plenitudo est: Finitum vero defectus. Atqui positivum alterum, alterum negativum. Ergo.

Infiniti igitur notio externo negantis vocis cortice involuta positiva est: non secus, ac non pauca vocabula, & vulgo usurpatae dicendi rationes, quae negativae notionis speciem praeferre videntur, licet positivam sententiam comprehendant. Hujusmodi sunt *Immortalis*, *Incorruptibilis*, *Impeccabilis* &c. voces: aut cum negamus Deum posse falli, mentiri, mori, repugnantia efficere &c. Quae omnia positivam comple-

plecti notionem quisque videt.

His delibatis illud modo discutiendum superest, num Infinitatis notio extensioni, & numero adseribi possit. Quae quidem breviter prosequemur. Et 1. advertatur volo, quod cum quaeritur, num extensio, aut numerus sit infinitus, *Grammatico* sensu ea vox accipitur: utrum scilicet ea fine ac termino careant.

2. Advertendum est, duplici pacto Infinitatis notionem usurpari a Philologis, vel *relative*, vel *absolute*. Absolute infinitum vocant, quod reaspe nullis coërcetur limitibus: relative vero, cujus nulli a Mente nostra constitui possunt termini, quos ultra illud prodire nequeat.

Hoc sane sensu infinitatis notio accepta neque extensioni, neque numero abjudicanda videtur. Ita enim comparatam esse Mentem experimur, ut quantumvis uni stadio alia centum atque alia deinceps addat, aut numeros numeris, magnitudinem magnitudini perpetua serie adjungat; nunquam tamen additionum finem aliquem inveniri posse agnoscat.

At si de infinitate absoluta sermo sit, haec numero atque extensioni omnino repugnat. Extensio duarum rerum propria est, *Materiae*, & *Spatii*. Materia infinite extensa esse nequit.

Nam 1. Materia partibus constat. Partes autem finitum quoddam constituunt; ubi enim partes, ibi extremi earumdem fines: ubi autem partium fines, ibi totius limitatio. 2. Materia dividua est. Atqui infinitum dividi non potest; quod enim nihil habet extremum, neque partibus constare, neque in eas secari potest. Infinita

ta igitur Mater & dividua, & individua simul esset; quo nihil absurdius.

Spatio itidem infinitas repugnat. Infinito enim huic Spatio, quod Deus condidit, aliquid de- trahere ipse poterit, Unde autem demi aliquid potest, fines illud habeat necessum est. Ergo.

Número tandem infinitatis notio etiam adver- satur. Numerus enim non est, nisi rerum, vel actionum multitudo, quarum singulae finitae sunt, & modo suo terminatae: & ipsa igitur multitudo finita sit oportet. Atqui infinitum, quod terminis non circumscribitur. Numerus igitur, & infinitas adversa fronte pugnant.

At enim Dei actionum, & perfectionum nu- merus infinitus est. Atqui hoc ipsum a numero infinitatem abhorrere ostendit. Qui enim infini- tum esse divinarum actionum, & perfectionum numerum ajunt, licet minus proprie loquantur, profecto negant Dei opera, & perfectiones nu- merari posse; negant igitur numerari id, quod infinitum est.

Spatii hinc mentionem injecimus, quod *Inane*, *Vacuum*, & *pura Extensio* etiam nuncupatur. Hoc nomine appellant juniores Newtoniani cer- tam Substantiam primam omnium a Deo condi- tam excipiendis intra se corporibus comparatam: eamque immobilem, penetrabilem, insectilem, atque interminatam esse ajunt. Contra Cartesia- ni, quibus accessere Leibnitius, & Wolfius, ina- ne hoc nusquam existere, & puram extensionem substantiam non esse, sed modum, aut Substan- tia attributum arbitrantur. In his definiendis non immoramur; haec enim in Physicis Institu- tionibus persequi dabitur. CA.

CAPUT IV.

De Caussis.

Res universas vel ut *Causas*, vel ut *effecta* considerare possumus. Cum autem *Caussa* & *Effectus* voces sint, quas vocant *relativas*; hinc totidem sunt *Effectuum* genera, quot *Causarum*.

Caussa generatim inspecta dicitur id omne, quod *per se influit esse in aliud*: nimirum ad rem aliquam producendam utcunque concurrat. Quinque porro *Causarum* genera vulgo distinguuntur, *Efficiens*, *Materialis*, *Formalis*, *Finalis*, atque *Exemplaris*.

Caussa Efficiens est id, quod virtute sua effectum producit, illumque a potentia, ut ajunt, transfert ad actum. Sic artifex est *caussa efficiens* statuæ.

Materialis caussa dicitur id, quo res aliqua componitur, seu ex qua antea existente fit aliquid. Ita metallum, unde conflatur statuæ, *materialis statuæ caussa* appellatur.

Formalis caussa ipsius rei forma est, quæ scilicet rem definit, ut talis sit. Haec autem est *Substantialis*, quæ efficit, ut res certa quaedam substantia sit a ceteris distincta, aut *Accidentalis*, quæ ita rei adjungitur, ut abesse possit. Ita interiorum illa partium Auri dispositio, qua nimirum fit, ut Aurum potius sit, quam quævis alia

alia substantia, forma substantialis est Auri. At accidentalis corporis aurei forma est, qua illius partes ita disponuntur, ut potius rotundam, quam aliam figuram exhibeant.

Causa Finalis est finis, cujus amore & gratia causa efficiens aliquid agit. Sic lucrum vel gloria finis est, quem artifex in statua elaboranda intendit.

Exemplaris tandem causa id appellatur, quod veluti instar sibi imitandum proponit causa efficiens. Imago Caesaris, quam Mente gerit artifex in statua perficienda, exemplaris statuae causa dicitur.

Jam vero causa efficiens, quae verae causae nomen & rationem habet, 1. vel est *prima*, vel *secunda*. Illa nulli subjicitur, & per se ac propria virtute agit; cujusmodi est solus Deus. Haec vero a causa prima pendet, neque agit, nisi virtute, quam ab illa accepit: hujusmodi sunt res omnes creatae.

2. *Principalis*, aut *instrumentalis*. Altera ita effectum producit, ut in ipsa sit ratio, quare effectus existat. Altera principali inservit, atque ab illa agendi vim recipit.

3. *Adaequata*, a qua sola totus effectus producit: *inadaequata*, quae cum aliis edit effectum.

4. *Physica*, vel *moralis*. Earum altera vera & reali actione effectum producit: altera vero causae efficienti occasionem affert, ut aliquem illa effectum edat. Ignis domus incendii physica causa est; at moralis incendii causa est, qui ad domus parietes ignem admovet. Ita praecepta,

pta, minae; preces, adhortationes, consilia, quibus ad aliquid aggrediendum incitamus, causae moralis nomine appellantur.

§. Tandem *libera*, vel *necessaria*. Causas liberas eas vulgo dicimus, quae ita agunt, ut omnem physicam ad oppositum potestatem servant: necessarias vero, quae antecedenti & physica necessitate naturae vel alterius causae ita ad agendum determinantur, ut nullam ad oppositum physicam facultatem habeant.

FINIS TOMI PRIMI.

MAG 2861



